

بسمہ اللہ الرحمن الرحیم



لماں، چوڑا وعظ نہیہ کوئی، بس اتنا سِرنا نواں ہے
اِس دنیا دی ہر شے ساحل! ہک چھوٹھا پَر چھانواں ہے



پَر چھانواں

مجموعہ کلام پہاڑی



(Best Book Award 2015)

محمد مقبول ساحل



جموں و کشمیر پہاڑی مشاورتی تہ تر قیاتی بورڈ

جملہ حقوق مصنف دے حق بحق محفوظ ہیں

Name of the book:

"PARCHANWAN"

Pahari Poetry

Author: M. Maqbool Sahil

Year: 2014

Price. Rs. 450/=

کتاب دانان.....پر چھانواں
لکھاری.....محمد مقبول ساحل
ترتیب.....محمد عظیم خان
معاون.....وحیدہ اکرم
کمپوزنگ، پروف ریڈنگ تہ سرورق.....محمد اقبال کھوکھر
سال اشاعت.....۲۰۱۴ء
تعداد.....۵۰۰

چھاپ خانہ.....

ناشر: جموں و کشمیر پہاڑی مشاورتی تہ ترقیاتی بورڈ

☆☆☆☆☆☆

فہرست و ترتیب

صفحہ نمبر	عنوان	
4.....	پیغام.....	☆
5.....	اظہارِ تشکر.....	☆
6.....	انتساب.....	☆
7.....	دیباچہ..... محمد عظیم خان.....	☆
13.....	عرضِ مصنف..... مصنف.....	☆
26.....	حمد و ثناء.....	☆
32.....	نعتاں.....	☆
49.....	عظمتِ رمضان.....	☆
50.....	مرثیے.....	☆
64.....	غزلاں.....	☆
151.....	نظمیں..... (روایتی).....	☆
175.....	نظمیں..... (آزاد).....	☆
221.....	گیت.....	☆
294.....	قطعات / بیتاں / رباعی / اشعار.....	☆
3	پرچھانواں	



پیغام

ایہہ گل ہُن سہاری دُنیا اُتا ظاہر ہو رہی ہے جے پہاڑی زبان بولن آ لے لوک ریاست جموں و کشمیر دے محض کجھاں علاقیاں تکر محمد و ذہبیہ بلکہ انہاں دیاں آبادیاں ریاست دے کونے کونے پچ کھلراں دیاں ہین، جس داثبوت ایہہ ہے جے اج جموں و کشمیر پہاڑی مشاوری تہ ترقیاتی بورڈ وادی کشمیر دے دور افتادہ علاقے کو کرناگ دے ہک قلم کار محمد مقبول ساحل دی کتاب ”پرچھانواں“ کو پہاڑی قارئین تکر پہچان دی سعادت حاصل کر رہیا ہے۔

پہاڑی بورڈ کو بھی اسے گل واسطے معرض وجود پچ آندا گیا دا ہے تاں جے اوہ پہاڑی زبان و ادب دی ترقی ہو رت و تچ واسطے اس دے قلمکاراں دی حوصلہ افزائی کرے ہو ر انہاں دیاں نگارشاں کو چھاپ کے اس زبان دے ادبی سرمائے کو محفوظ کیتا جُلے، اللہ دے فضل نال پہاڑی بورڈ اس ذمہ داری کو نبھان واسطے جانفشانی نال سرگرم عمل ہے۔ اشاعت دا ایہہ سلسلہ ہُن کافی عروج اُتے ہے ہو ر بورڈ دے زیر نظر اس ویلے بھی کنیں ہو ر کتاباں موجود ہین، جہاں اُتے کم جاری ہے۔ مقبول ساحل ہوراں دی ایہہ کتاب ہک شعری مجموعہ ہے ہو ر اس پچ پہاڑی تہذیب و تمدن دی جس طراں عکاسی کیتی گئی دی ہے، اُس سن مکو ذاتی طور بڑا متاثر کیتا ہے، مقبول ساحل ہک میں عرصے تھیں پہاڑی زبان و ادب دی خدمت کر رہے ہین ہو ر اپنے علاقے دیاں پہاڑی لوکوں کو جگا کے پہاڑی قوم نال ہمقدم کران پچ انہاں دا کافی حصہ ہے، جس عرق ریزی نال انہاں ایہہ کتاب تیار کیتی دی ہے، مکو امید ہے جے پہاڑی ادب پچ اس کو خوب پذیرائی ملسی تہ نالے نوایاں قلمکاراں واسطے بھی ایہہ ہک منزل دا یو اثابت ہو سی۔

خیر اندیش:

کفیل الرحمن (کابینہ وزیر)

وائس چیئرمین، جموں و کشمیر پہاڑی مشاوری تہ ترقیاتی بورڈ

اظہارِ تشکر

ماہری ایہہ کتاب ”پرچھانواں“ جموں و کشمیر
پہاڑی مشاورتی تہ ترقیاتی بورڈ دی کلی مالی
معاونت نال اشاعت پذیر ہوئی ہے، جس
واسطے میں مذکورہ ادارے دادل دی ڈوہنگیائی
نال مشکور ہاں

مقبول ساحل

انتساب!

..... ماہڑے دوستی دے سکون واسطے اُس دا چین وقرار قربان ہو گیا، ماہڑے
خواباں واسطے اُس دی راتاں دی نیند راڈ گئی، ماہڑا سر تتا ہویا تہ اُس ٹھنڈے ہو کے
پہرے، ماہڑے نازک تہ نکلے قد ماں دی پہلی ٹور دکھدیاں ہی اُس ماہڑے اُتوں
اپنا کُھر بٹھا کہنمایا، اوہ... جھیرٹی مکوا چیاں ایواناں بچ پوچن دے خواب سجاندی
رہئی مگر ماہڑی ضد ہو رنالا نفی دی وجہ نال ساری جندڑی پریشان رہئی، کشمیر دے
اُچے چناراں دی ٹھنڈی چھاں دی طراں ہاڑ دی تھپ بچ ماہڑے سر اُتے سایہ فگن
رہئی ہو راوہ.... جس مکوا اپنی ماں بولی دا پہلا لفظ ”اماں“ آکھنا سکھالیا.... اُسے شفیق
تہ مہربان اماں دے ناں، جس کو دُنیا زینب جمال دے ناں نال جاندی ہے....

محمد مقبول ساحل

اڑحال (کوکرناگ) اسلام آباد کشمیر

تاریخ ۲۰ جون، ۲۰۱۴ء

دیباچہ

ایہہ غالباً ۲۰۰۰ء نے آس پاس نی گل ہے، ماہڑے مجموعہٴ کلام ”گندل“ کی بہترین کتاب نے اعزاز نال نوازے گیا، پہاڑی زبان نے تقریباً ساریاں شاعراں تہ ادیبیاں خوشی نا اظہار کیتا تہ لگی مبارکبادی نے پیغام پہنچے، ماہڑی خوشحالی تہ ترقی نال نال پہاڑی زبان نی مزید خدمت نا اصرار ہو یا، انہاں ہی خوشخو تہ نیک ادیبیاں بچوں محمد مقبول ساحل بھی پک سے۔ انہاں تہاڑیاں اوہفت روزہ ”چٹان“ بچ کم کرنے سے، جسنا دفتر ہری سنگھ ہائی سٹریٹ نی ہکس پرانی عمارت نی ترقی منزل پر سا۔ میں ”گندل“ نی ہک گفٹ کا پی مقبول ساحل کی اسے دفتر بچ پیش کیتی آسی۔ اس روز تھیں اساڑی ملاقات نا سلسلہ شروع ہو گیا۔ اکثر آس اپنے کلام نے بارے بچ تبادلہ خیال کرنے رہے سیاں۔ پہاڑی زبان نا کوئی وی رسالہ کلچرل اکیڈمی نے ”شیرازہ“ تھیں بغیر انہاں دناں شائع نا ہونا سا تہ نا ج کل ہی شائع ہو رہیا ہے۔ ایہہ سلسلہ اج وی اُسے رفتار تہ طرز نال جاری ہے۔ ساحل نا کلام وی ماہڑے توڑیں اُسے رسالے نے ذریعے بچنا سا۔ ماہڑی عادت سی، جہڑی اجاں وی نہیہ بدلی ہے، جے میں ”شیرازہ“ نے ہر مضمون نا چنگی طراں پوسٹ مارٹم کرنا ساں، خاص کر منظوم حصہ ماہڑی تنقیدی نظر نا شکار ہوئے بغیر نہیہ رہنا سا۔ شاعری

نے حصے بچ ماہری پرکھنا پیمانہ باقی کسوٹیاں تھیں علاوہ عروض ناپیمانہ وی سا۔ انہاں
 دناں مقبول ساحل نے کلام تہ باقی شاعراں نے کلام نادر جہ کم و بیش مساوی دسنا
 سا۔ جس فہرست بچ ساحل ناناں انہاں دناں نہیہ لہہنا سا تہ ماہری کمزور نظر ایہہ
 اندازہ نہیہ کر سکی جے مقبول ساحل پہاڑی لکھاریاں نی گنتی بچ اپنا ناں کافی اُپر آئن
 بچ کامیاب ہو جاسی۔ زمانہ ٹرنا گیا تہ حالات بدلنے گئے، ساحل کو ”شبستان وجود“
 نا سامنا کرنا پیا۔ بلبل پنجرے بچ بند ہو گئی... وجود تہ قید ہو گیا مگر پرواز تہ احساسات
 و جذبات قید نہ ہو سکے، اسے قید و بند نا اثر خصوصاً پہاڑی ادب پر مثبت پینا۔ قید
 دے دوران ساحل کو جہاں صعوبتاں نا سامنا کرنا پیا، اُنہاں، انہاں نا حوصلہ
 پست کرن نے بجائے ہو روی بلند کیتا تہ انہاں کی اس گل نا احساس ہو یا جے ے
 سُندی با مخالف سے نہ گھبرائے عقاب!

یہ تو چلتی ہے تجھے اونچا اڑانے کے لئے

پنجرے نے اندر بلبل کی ہک نویں چھبھاٹ نی شہ بھی، اس دوران انہاں
 بے شمار گیت گائے، ان گنت ترانے گائے، ہاڑیاں تہ ساڑیاں پہرے گیت وی
 گائے تہ نثر نگاری نے جوہروی دے، نظم نگاری نے لعل پروئے تہ خصوصاً نظم نے
 میدان بچ جس فن نی ضرورت ہونی ہے، اس کی انہاں چارچن لائے تہ جس
 کھڑی ایہہ پہاڑی ادیب تہ شاعر جس بے جا تھیں آزاد ہو یا، اس نے حوصلے نی

بلندی، اس دے کلام تھیں عیاں سی۔ ۲۰۰۸ء بچ ہکس مشاعرے نے دوران جد میں انہاں ناکلام سُنیا، اناں نے خیالات نی بلندی، شستگی، روانی تہ فنی صلاحیت بچ خاطر خواہ اضافہ دیکھ کہہ ماہر ادل بے حد خوش ہو گیا۔ خورے ساحل ہوراں کی یاد ہوسی کہ نہیہ، میں اس ویلے اناں کی اپنیاں نیک خواہشاں تہ دعاواں دے نال نال شاباشی وی دتی ہور اپنی مسرت نا اظہار وی کیتا۔

کے سیانے آکھیا ہے جے "One should know

something of everything and everything of

something" یعنی انسان کی ہر کم نی تھوڑی تھوڑی واقفیت ضرور ہونی چاہنی

ہے، نالے اوہ کسے ہکس کم نامکمل استاد وی ہونا چاہینا۔ ایہہ گل مقبول ساحل نی

ذات پر کھری کھری اُترنی ہے۔ اوہ اردو نے پچھے خاصے ادیب ہین، پیشے تھیں

صحافی ہین، اس میدان بچ اناں خوب ناں کمایا ہے۔ اس پیشے نے خوب ماہر ہین،

جمادروں پہاڑی ہین، پہاڑی زبان پر دسترس رکھنے ہین، پہاڑی نشرو نظم نے

شاہسوار ہین، اناں پہاڑی زبان نی ہر صنف پر طبع آزمائی کیتی ہے، اپنا کلام، زیر نظر

کتاب پر چھانواں، نی صورت بچ ناظرین توڑیں پہچان بچ مشغول ہین۔ اناں نا

کلام، اناں نے خیالات نی خوب ترجمانی کرنا ہے۔ کدے ایہہ حقیقت اتے

معرفت نے سمندر بچ غوطہ زن ہو کے نعت نبی آکھنے ہین تہ اپنی انکساری نا

اعتراف تہ اعجازنی آرزو اس رہ کرنے ہیں ے
 غریب مصر بن کے میں تو ہڑے دربار آپیچاں
 لگن پھر بولیاں ہر سو تہ اچڑا دام مل جاوے!
 تہ کدے مجازیت تہ رومانس فی خلاء بچ پرواز کرنے تہ گنگنا نے ہیں ے
 اج دوپٹے بچ تو ہڑے پوشیدہ کوئی راز ہے
 مقبول ساحل اپنے خیالات نا اظہار اپنے کلام بچ بخوبی کرنے ہیں پر
 اناں کی اس گل دا احساس تہ ساڑاوی ہے جے اناں نے ہمعصر لوک، خصوصاً ادیب
 تہ شعراء اناں نے کلام کی سراہنے بچ لیت و عمل نال کم کہنے ہیں۔ پر اناں کی مکمل
 یقین ہے جے آنے آ لے زمانے بچ ضرور اناں نے کلام فی قدر ہوئی، چنانچہ
 فرماندے ہیں ے

کسے اگلے زمانے بچ کوئی منے تہ من جاوے
 مرے اپنے زمانے دے پلے نہیہ گل مری پیندی!
 عالم تخیل بچ جس کھڑی پہاڑاں نیاں بلندیاں تہ ماہلیاں پر سیلائی ہو کہہ
 دیوانہ وار پھرنے ہیں، اناں فی زبانوں بے ساختہ کہوگی، مایہا، قینچی، چن تہ اسے قسم
 نے دوایاں موضوعاں تے بے شمار گیت اپنے آپوں رواں ہو جانے ہیں، اوہ کدے
 کہوگی داہر مخاطب ہو کہہ آکھنے ہیں: ے

نارو کہیے، نارو، ویلا ہجر، فراق دا تھوڑا ہے
 نالے کدے چن تہ کدے چکوری کی یاد کرنے ہین تہ جس کہڑی ایہہ
 مغموم شاعر اپنے سارے غم تہ پریشانیاں کی پُہل جانا ہے، اوہ مورنی فی طراں
 بہاراں تہ ساون نے مست تہ پُرسرت نغمے گانا تہ رقص کرنا دسنا ہے، شردنا بچھوڑا
 تہ ساون نا وصال، اس خیال کی کس خوبصورتی نال لوری دینا ہے۔۔۔
 ساون دی رُت بچ بچھڑے ساں، اج پھر ساون آیا ہے
 'پر چھانواں' دراصل اناں نا اپنا ہی پر چھانواں ہے، ایہہ شعری مجموعہ
 ہے۔۔۔ شعر گوئی بچ دو صفتاں لازمی طور موجود ہونیاں چاہینیاں ہین، ہک تخیل تہ دوا
 فن۔ تخیل نا ذخیرہ اناں کول ابتداء تھیں ہی موجود سا، اس بچ اج خاطر خواہ اضافہ
 وی دسنا ہے۔ شاعری نے فن فی ابتداء بچ اناں کول تھوڑسی، جھڑی اناں انتھک محنت
 نال پوری کیتی ہے، اج ماشاء اللہ فن شاعری بچ اناں کافی حد توڑیں مہارت حاصل
 کیتی ہے تہ مزید کاوش جاری ہے۔ اج دی تاریخ بچ ساحل پہاڑی زبان نے کافی
 بچھے شاعر ہین، امید ہے ایہہ اپنی لگا تار محنت نے ذریعے پہاڑی زبان کی چارچن
 لاسن۔ اس تھیں پہلاں جے میں اپنی گل ختم کراں، میں ساحل فی اس کتاب فی
 وساطت نال کجھ گلاں آکھنا مناسب سمجھنا ہاں۔
 مقبول ساحل اپنے کلام ہو ر تحریر بچ کجھ مستعمل زبانوں نے الفاظ نا کافی

استعمال کرنے ہیں، اگرچہ اس بچ کوئی خاص عذر نہیہ تاہم انان فی جاوہ پہاڑی
 زبان نے تجھے تہ مناسب الفاظ نا استعمال کر سکنے ہیں، دوئی گل ایہہ جے علم عروض
 ، جہیڑ اس فی شاعری نا بنیادی اصول ہے، انان فی شاعری بچ کافی عروج اُپر ملنا
 ہے مگر اسی سارے جاننے ہاں جے اس علم اُپر جتنی مچ دسترس ہوسی، اتنا چھا ہونا
 ہے، اگرچہ ساحل اس مدان بچ کسے حد توڑیں کامیاب دسنے ہیں، مگر ضرورت اس
 گل فی ہے جے مستقبل بچ طبع آزمائی کرن آ لے شعراء بھی اس روایت کی قائم
 رکھن۔

دعا گو

محمد عظیم خان

۲۰ نومبر، ۲۰۱۰ء

ٹنگمرگ، کشمیر

عرضِ مصنف!

ہے درحرفِ راست خامہٴ ما، خامکار نیست
ہرگز خرام کج نمودہ ز زارغِ ما! (ملاءندیم کشمیری)

پہاڑی شاعری ہور پہاڑی ادب دی تاریخ بھی اتنی ہی پرانی ہورامیر
ہے، جتنی جے آپ پہاڑی زبان، ثقافت ہور تہذیب۔ اگر وقت دی ناموافق تہ
نامہربان چہول بچ اس زبان و ادب واسطے متاباتی نارہی تہ اس گل داہر گز ایہہ
مطلب نہیہ جے اس زبان کو بولن آلیاں سُن اپنی ماں بولی نال پیار نہیہ کیتا ہور
اس کو ہک محبوبہ سمجھ کہہ اس دیاں کالیاں، کہنیاں تہ لمیاں زلفاں نہیہ سنواریاں، اس
دے خوبصورت قد، بُت دی تراش خراش نہیہ کیتی، ہور اس دے مرمریں جسم
واسطے نیلے تہ سوہے جوڑے نہیہ سوائے۔ اسدے تحقیقن بچوں بڑے کہٹ جے
ہوئے ہین جنہاں تاریخ دیاں انہاں گوشیاں اُتوں پردہ چان دی زحمت گوارہ کیتی

جے پہاڑی زبان وادب، ثقافت ہو رتھندیب داعروج کدوں هو یاتہ اس دے
زوال دے کیہڑے اسباب ہوئے۔ اسیں بڑی آسانی نال وادی سندھ هو راس
دی ترقی یافتہ تھندیب دا ذکر تہ کردے ہاں هو راس تھندیب کو زمانہ قدیم دیاں ترقی
یافتہ، مہذب تہ سلجھیاں دیاں تھندیباں بچ شمار کردے ہاں مگر اس گل داہر بڑا کہٹ
تھیان دتا گیندا ہے جے اس وادی هو راس تھندیب دے والی وارث کون لوک
آسے؟ اس تھندیب کو پالن پوسن، جوان تہ حسین و جمیل بنان والے کہڑے جیا لے
آسے، جھڑی تھندیب ہڑپاتہ موہنجوداڑ و جیہیاں سلطنتاں کو اپنی چھول بچ ساسکدی
آسی، کیا ایہہ منن والی گل ہے جے اس تھندیب دے افراد فنون لطیفہ تھیں نا واقف
ہوسن یا پھر اوہ اپنے فرصت دے لمحات بچ ادبی محفلاں نا سجان دے ہوسن، دور دی
گل چھوڑ کہہ کل پرسوں دی گل کیتی جلے تہ اجاں تکر سندھ اتے عرب مجاہد محمد بن
قاسم دے حملے هو ر راجہ داہر دی شکست کو زیادہ ویلا نہیہ گزریا، راجہ داہر سندھ دا حاکم
آساتہ سندھ پہاڑی زبان وادب دی چھول آسی۔ اس ترقی یافتہ تھندیب دے
وارث هو ر حاکم بھی پہاڑی لوک آسے تہ اس کو سکسن آلے بھی پہاڑی ہی آسے۔
اس انقلاب دے بعد، جتھے ہندوستان بچ نور اسلام دا ظہور ہو یا، اتھے ہی ایہہ دو
گلاں بھی ہوئیاں جے سب تھیں پہلاں اس سرزمین اُتے، اس نور کو اپنے سینے بچ
لسان آلے لوک هو ر اپنے تخت و تاج تھیں محروم ہونے آلے بھی پہاڑی ہی

آسے۔ اسلام دی دولت سنگ مالا مال ہوں آلیاں سُن اس آفاقی انقلاب دی خوشی
 بچ اپنی ماں بولی، تہذیبی وراثت ہو ر ثقافتی خزانے کو کچھ چروا سٹے فراموش کردتا
 ہو ر اس نویں تہ ازلی نور واسطے اپنے سینے دے بوہے باریاں دے کو اڑ کھول
 دتے، ایہہ ہی اوہ دور آسا، جدھ وقت دے شاہزادیاں سُن درویشاں ہو ر فقیراں دا
 چولا پالیا ہو ر اپنے محل منارے چھوڑ کہہ بستی بستی دی خاک چھانن واسطے ٹر پئے۔
 ایہہ دور پہاڑی قوم ہو ر زبان و ادب واسطے اسے طراں آسا، جس طراں جے کسے
 نرسری بچ لائے دے نکے نکے میوے دیاں بوٹیاں کو اپنی جانی تھوں کڈھ کہہ دور
 دور دیاں باغان ہو ر کھیتیاں بچ لایا جاوے تاں جے اوہ بڑے ہو کہہ میوے دے
 نال نال اپنی نسل ہو ر خوشبو کو بھی پھیلا سکے۔ اگر ارج اسیں ریاست جموں و کشمیر بچ
 آباد پہاڑی بستیاں دی تاریخ دا جائزہ کہناں تہ ایہہ ہی پتہ چلدا ہے جے سندھ
 دیاں مختلف علاقیاں بچوں نکل کہہ مختلف جائیاں اُتے بچ کہہ بسن آ لے لوک محمد بن
 قاسم دی ہندوستان بچ آمد دے نال ہی انہاں بستیاں بچ پوچھے آسے۔ کافی زمانہ
 گزرن دے بعد اگر جے مغلیہ دور بچ انہاں لوکاں دی شان رفتہ کسے حد تکر پھیر
 بحال ہوئی مگر اچر تکر کافی چر ہو گیا دا آسا ہو ر دریائے سندھ بچوں کافی سارا پانی
 روہڑ کہہ بحر عرب بچ ڈھل گیا دا آسا تہ اس دے بدلے بچ عرب دی تہذیب ہو ر
 رنگ انہاں اُتے کافی پکا ہو گیا دا آسا مگر اس دے بدلے عرب دی تہرتی اتوں

اٹھن آ لے انقلاب سُن باقی ساریاں انقلاباں داقہ، بُت نکاتہ کٹھا کردتا دآسا
 زیرِ نظر مضمون پہاڑی زبان دی تاریخ یا عروج و زوال دی دردناک
 داستاں بیان کیتے واسطے نہیہ بلکہ اس گل واسطے لکھیا جا رہیا ہے جے میں اپنے
 انہاں محقق حضرات دی توجہ اس پاسے موڑ سکاں، جہڑے اس ادب ہور اس
 تہذیب دی کھوج بین کردے ویلے انہاں گوشیاں کو نظر انداز کر کہہ اگاں ٹر
 جاندے ہین ہور محض کجھ لفظاں دی ہک نکی چہنی فہرست کو پہاڑی ادب دی لغت
 سمجھ کہہ خاموش ہو گیندے ہین۔ پہاڑی سلطنت جس دا ہک پاسا افغانستان دیاں
 سرحدیں نال ہزارہ علاقے پنج آساتے دو جاسرائیپال دیاں آسمان چُمدیاں ہمالیائی
 ماہلیاں نال موہنڈاملا کہہ اس وسیع و عریض تہرتی دے دامن کو مہکار ہیا آسا، وقت
 دیاں لہراں تہ موجاں سُن اس زبان کو کنیاں خانیاں، کنیاں حصیاں ہور کنیاں
 رنگاں پنج بند چھوڑیا، جس طراں آدم ثانی حضرت نوح دی اولاد جو دی وادی پنج
 پنج کہہ دنیاں پنج کھلر گئی ہور کوئی گورا، کوئی کالا تہ کوئی گندمی رنگ اختیار کرن دے
 باوجود آدم دی ہی اولاد رہی، اسے طراں پہاڑی زبان وثقافت بھی وادی سندھ
 تھیں نکل کہہ اپنے رنگ بدل دی رہی مگر اس دے باوجود اس دے وجود دیاں جڑاں
 سرسبز و شاداب رہیاں ہور ہر بوٹے سن نرسری بچوں نکل کے نویں جاء تہ زمی دے
 مطابق اپنا رنگ ہور خوشبو اختیار کیتی مگر اپنی مٹھاس کو کسے بھی حال پنج نا چھوڑیا۔

برصغیر دی ایہہ کافی بڑی تہ مقبول ہوو قدیم ترین زبان موجودہ زمانے پنج
 کجھ نادان دوستاں دی تغافل شعاری ہوو ہٹ دھرمی داشکار ہو کہہ ترقی کرن دے
 بجائے ہک واری پھر زوال داہر مڑ دی نظر آرہی ہے۔ اگر دنیاں دی سب تھیں
 قدیم زبان عربی دی لغت ہوو الفاظ دی وسعت اُتے نگاہ ماری جلتے پتہ چلدا ہے
 جے اس پنج الفاظ دا اتنا بڑا خزانہ موجود ہے جے ہک چیز کو بیان کرن واسطے سو سو ہم
 معنی الفاظ موجود ہین، اسے طراں اردو پنج بھی دہلوی، لاہوری، لکھنوی تہ او دھی
 لہجے موجود ہین، مگر اراج تکر کسے سُن انہاں لہجیاں دی بنیاد اُتے انہاں کو الگ الگ
 زبان نہیہ آکھیا تہ ناہی کوئی ہک مخصوص لہجہ اختیار کرن یا کسے کو چھوڑن دی گل کیتی،
 ایہہ ہی حال پہاڑی زبان دا بھی ہے، پونجھ پنج بسن آلا پہاڑی واحد متکلم واسطے
 ’گئی‘ دالفظ استعمال کردا ہے تہ کپواڑہ پنج بسن آلا ’مکو‘ مگر لار‘ گاندر بل ہوو کو کرناگ
 پنج بسن آلا پہاڑی ’منوں‘ یا ’مینوں‘ دالفظ استعمال کردا ہے، ہوو ایہہ سارے الفاظ
 اپنی اپنی تہرتی دی خوشبو کہن کے جس ویلے ہک شاعر دے اشعار یا افسانہ نگار دے
 دافسانے پنج اکٹھے استعمال ہوندے ہین تہ اس تخلیق دے وزن ہووڑ ہونگیائی دا
 اندازہ کرنا مشکل ہو جلد اہے مگر اس دیاں گجھ دوستاں دی ضد ہے جے کجھ لہجے
 اختیار کیے جلن تہ کجھ کو چھوڑ دتا جے! میں اس گل کو سُن کہہ کدی کدی حیران
 بھی ہونداں تہ پریشان بھی، حیران اس واسطے جے اسیں اپنے آپ اپنی ماں بولی

دیاں خوبصورت رنگاں ہو رشناں دارمشکاں کو ختم کرن داسا مان کر رہے ہاں، حالاں
 جے اساں کو چاہیدا تہ ایہہ آسا جے اسیں اپنی زبان دے اوہ الفاظ بھی باندے
 کڈھ کے اس پنج شامل کرن دی کوشش کراں، جہڑے دوئیاں زبانناں سُن اختیار کر
 کہدے دے ہین مگر اسیں اپنے انہاں لفظاں کو بھی جلا وطن کرنے تے بضد ہاں،
 جہڑے اسدے لوک اپنی روزمرہ دی بولی پنج بڑے ہی چاہ نال استعمال کردے
 ہین۔ ماہڑا اپنا ذاتی تجربہ ہے جے پہاڑی شاعری پنج جس ویلے ہزارہ مظفر آباد،
 کپواڑہ، پونچھ، میرپور، راجوری، جموں، بانہال شوپیاں، ٹنگمرگ، یاری پورہ، براہ
 تہ کو کرناگ پنج بولے جان آ لے سارے الفاظ ہک جاء اُتے استعمال ہوندے ہین
 تتاں ہی جا کہہ ایہہ شعر مکمل ہوندا ہے تہ اس دے اس دعوے کو بھی تقویت ملدی
 ہے جے اس دی ایہہ ماں بولی ہک وسیع و عریض تہرتی اتے کھنڈری دی ہک ہی
 زبان ہے، ورنہ اگر اسیں لہجیاں دے چکر پنج پھنس کہہ رہ گئے تاں پھر ہر علاقے دی
 ہک وکھری بولی بن کے رہ جاسی ہو راس کو سمبھالنا دشوار بن جاسی۔ اپنی ماں بولی
 پنج اس نکے تہ حقیر جے کجھاں صفحیاں دے اس کتا بچے کو تسدے مہربان ہستھاں پنج
 پچا کے میں اپنا ناں منے پڑ منے دے استاد اں پنج لکھالن دا قطععی شوقین نہیہ تہ ناں
 ہی میں اپنے وجود کو اس قابل سمجھدا ہاں جے ماہڑی گنہ گار زبان بچوں کسے کاری دا
 کوئی شعر باہر نکلیا ہو سی مگر جتھے بھی موقعہ ملیا، میں ہک معمار دی طراں اٹاں،

گارے ہو رہیاں کو ملا کے استعمال کرن دی کوشش کیتی ہے، تاں جے ہک مضبوط تہ
 پکی عمارت دی تعمیر ہو سکے، جس جاء تہ ماہڑے وزن بچ 'ماہڑا' برابر آیا، میں اس کو
 بڑی خوشی سنگ استعمال کیتا، تہ جتھے 'میرا' برابر ہو یا، میں اس کو بلا جھجک چا کھڑیا..
 کسے کولوں کچھن دی کہہ ضرورت آسی.. ایہہ سارے ماہڑے اپنے الفاظ آسے تہ
 میں اپنے باغ بچوں پھل ہی تاں چنے ہین، کسے دی چوری تاں نہیہ کیتی!

ماہڑے اوہ دوست، جہڑے اپنی بے معنی منطق ہو رہے تگیاں
 دلیلاں دا استعمال کر کے ماہڑے اس اصول کو چیلنج کرن دی جسارت کرسن، میں
 انہاں کو ایہہ چیلنج دین بچ کدیں بھی پچھاں نہیہ رہ سکدا جے اگر اوہ میرے علاقے
 بچ آباد پہاڑی بستیاں بچ رہن آ لے لوکاں دی روزمرہ دی بولی بچوں 'میرا'
 ہو رہیہ 'مینوں' دے الفاظ باہر کڈھ کے دس دیون تہ میں بھی انہاں لفظاں دا استعمال
 بند کر دیساں۔ بلکہ جہڑی بولی ہو رہیہ جہڑے الفاظ ماہڑے ہمسائے تہ ماہڑے اپنے
 کھر دے ولوک نا سمجھ سکسن، میں انہاں کو استعمال کر کہہ اپنے بولی بچ موجود الفاظ کو
 باہر کڈھن واسطے کسٹراں تیار ہو سکداں؟ البتہ میں اس گل واسطے ہمیشہ تیار ہاں
 جے اپنیاں لوکاں کو انہاں لفظاں تھیں واقف کرا لاں جہڑے پہاڑی دنیاں دیاں
 دو جیاں علاقیاں بچ موجود ہین مگر اساں توڑیں پچھدیاں پچھدیاں رستے بچ اساں
 کولوں نکھڑ گئے دے ہین تہ میں ایہہ گل کسے خوف تر دید دے بغیر آکھنا چھینداں

جے جس ویلے اسدے محققین اس گل کو سمجھ جاسن، اس دن پہاڑی زبان دی اوہ لغت تیار ہوسی، جہڑی دنیاں دیاں مچ ساریاں زبانان دی لغت کولوں کافی بڑی تہ وزنی ہوسی، کنیاں جے پہاڑی زبان دی چہول بھی مچ ساریاں زبانان تھیں کافی بڑی ہے۔ اس گل تھیں علاوہ اسان کولسانیات دا ایہہ اصول بھی نہیہ پہلنا چاہیدا جے کسے بھی بڑی زبان دی ایہہ خاصیت ہوندی ہے جے ہر پندرہ بیہہ میل دے بعد زبان دی بول چال، الفاظ دے مخرج ہو رتہ کیب کچھ نا کچھ فرق ضرور پیندا ہے، پھیر سوچن دی گل ہے جے پہاڑی جیسی ہک بڑی زبان، جس دا اپنا بنیادی علاقہ دنیاں دیاں مچ ساریاں آزاد تہ خود مختار ملکاں دے رقبے تھیں کافی زیادہ ہے، ہو ر جس کو بولن آ لے لوک دنیاں دے کونے کونے پچ آباد ہین، دے حوالے نال ایہہ لسانیاتی اصول کتنا زیادہ اہم ہو سکدا ہے ہو ر اسی اس کو کس طراں فراموش یا نظر انداز کر سکدے ہاں؟

لگے ہتھاں میں پہاڑی دے موجودہ رسم الخط یعنی Script دے بارے پچ بھی دو ہک گلاں کرنیاں لازمی سمجھداں۔ مثلاً پہاڑی دے کجھ ہم صوت الفاظ یا پھر ”ب“ تہ ”پ“ دے درمیان دی اواز ہو ”ک“ ہو ”گ“ دے درمیان دی ہک پہناری جہی اواز، جس واسطے اردو، فارسی، عربی یا کسے دو جے رسم الخط پچ کوئی مناسب حرف نہیہ لبھدا، کو لکھدے ویلے اس دے پہاڑی قلم کار حضرات اپنے

اپنے حساب نال حروف ہو ر علامتاں دا استعمال کر دے ہین۔ اس حقیقت دے باوجود جے انہاں اوازاں دا مخرج کسے بھی رائج الوقت رسم الخط پنج موجود نہیہ مگر انہاں واسطے کوئی نہ کوئی سانجھا متبادل اختیار کرنا بھی ضروری ہے کیہاں جے اگر سارے قلمکار اپنے اپنے حساب نال سوکھرے وکھرے انداز پنج لکھدے رہے تہ پھر مشکلاں کہئن کولوں بدھ ہی جلسن۔ ماہر اخیال ہے جے جے الفاظ کو لکھدے ویلے انہاں اُپر ’’ء‘‘ حرف دا استعمال زیادہ موزون ہے تہ میں انہاں لفظاں کو لکھدے ویلے کجھ اس طراں دا قاعدہ استعمال کیتا ہے:-

کے..... کر کے

کہہ..... آکھ

کہہ..... کیا

کہہ..... گھر

کیہڑا..... کون

کہیرا..... محاصرہ

پہنت..... بھت... پکے دے چاول

چھوٹھ..... جھوٹ

چنگ..... جھاگ..... وغیرہ

ماہرے خیال بچہ ک، ہورگ، دی درمیانی اواز دے مخرج واسطے کجھاں
 قلمکاراں سُن جھیر اقاعدہ یعنی ”کبھ“ اختیار کیتا دا ہے، اوہ مناسب نہیہ کنیاں
 جے اس دا مخرج کجھ مچ ہی پہارا ہو جاندا ہے۔



اپنے بارے بچہ مچ پرانا تہ کجھ یاد نہیہ البتہ اتنا ضرور یاد ہے جے ماہڑا پہلا
 پہاڑی افسانہ ”ابلیس دی تخلیق“ سال 1989ء دے ہک شیرازے بچہ شائع ہو یا
 آسا ہور اس دی ہک کاپی اج بھی ماہرے کول موجود ہے، مگر اتنے برس گزر جان
 دے باوجود بھی اجاں توڑیں پہاڑی زبان دا سکرپٹ یا ڈکشنری مکمل نہیہ ہو سکی ہور
 ناہی اجاں توڑیں اس دا کوئی مکمل تہ حتمی لہجہ سامنے آسکیا ہے، امید افزاء گل ایہہ
 ہے جے اس پاسے کافی کم ہور ہیا ہے ہور ہو سکدا ہے جے ماضی قریب بچہ اساں
 کول پہاڑی زبان دا ڈکشن ہور لہجہ دستیاب ہو جاوے، جس کو مرکزیت حاصل
 ہوئی ہور سارے ادیب اسے کو معیار بنا کے لکھسن۔ ماہڑی کتاب کو کسوٹی اُپر پرکھن
 آلیاں ادیبیاں واسطے لازم ہے جے اوہ پہاڑی زبان دے وسیع علاقے ہور
 احاطے دا بھی خیال رکھن ہور اپنے اپنے علاقے تھیں باہر نکل کے اس کو سمجھن دی
 کوشش کرن، کنیاں جے میں کسے خاص علاقے یا لہجے کو سامنے رکھ کے نہیہ بلکہ
 پوری پہاڑی زبان کو نظر بچ رکھ کے لکھیا ہے۔ امید ہے جے دوران دیش دوستاں دی

حوصلہ افزائی تہ دعاواں ہمیشاں نال رہسن!

انہاں ابتدائی سطران پنج اپنی گل مُکان تھیں پہلاں اگر میں عزیزہ وحیدہ اکرم دے بارے پنج دوگلاں ناکراں تہ ساری گل نامکمل رہ جاسی۔ وحیدہ اکرم اوہ خاتون ہے، جس ماہڑے اُنہاں بے ترتیب ہو رہے ہنگام کاغذاں کو ترتیب دے کے ہک نہیہ بلکہ پوریاں اٹھ کتاباں تیار کرن پنج ماہڑی مدد کیستی، جہڑے میں قید خانیاں تہ بند کوٹھڑیاں پنج ہنیریاں راتاں تہ تپدیاں تہپاں دے دوران ریزہ ریزہ حالات پنج لکھے آسے۔ فروری ۲۰۰۸ء پنج جس ویلے میں لمیں نظر بندی تھیں رہا ہون تھیں بعد سرینگر دور درشن پنج پہاڑی پروگرام ’شکارا‘ دی ریکارڈنگ دے دوران اس سدھی، سادھی مگر تعلیم یافتہ تہ مہذب گدري نال ملیا، جس کو اسے پروگرام پنج ہک گل بات پیش کرنی آسی تہ میں اس کو دکھدیاں ہی سمجھ گیا آسا جے ماہڑیاں انہاں ریزہ ریزہ تحریراں کو ترتیب دین واسطے اللہ تعالیٰ سُن ماہڑا مددگار جول دتا ہے۔ وحیدہ دے والد صاحب ’پی آئی بی‘ پنج ملازم ہیں ہو رانہاں کو میں پہلاں تھیں تھوڑا بچہ جاندا آسا۔ ایہہ ملاقات کافی نیک ثابت ہوئی ہو ر میں اگلی ملاقات پنج انہاں کو آکھیا جے اوہ ماہڑے بے ترتیب مسودیاں کو ترتیب دین پنج ماہڑی مدد کرن۔ اوہ من گئی تہ کم شروع ہو گیا۔ اس دوران ’شبستان وجود‘ طباعت دے مرحلے تھیں گزر رہی آسی تہ ماہڑی اگلی منزل اردو افسانیاں دا مجموعہ ’قدم قدم

تغزیر، آسا، میں اس دامواد اُس دے حوالے کیتا تہ اس سُن کجھاں ہی دناں بچ اس دامسودہ ماہڑے سامنے رکھ دتا۔ اس دے بعد پہاڑی ناول ”بابائیل“ اردو کہانیاں دے مجموعے ”لہواہو تصویر“ ہور شعری مجموعے ”حرف حرف زنجیر“ دے مسودے بھی انہاں ہی تیار کیتے ہور اجاں بھی ماہڑے کول انہاں واسطے کافی سارا کم موجود ہے۔ میں ایہہ گل بغیر کسے خوفِ تردید دے آکھ سکداں جے ایہہ ساریاں کتاباں لکھن دی توفیق دے نال نال اللہ تعالیٰ سُن وحیدہ اکرم کو پہنچ کے ماہڑے اُپر ہک بڑا احسان کیتا ہے۔ ورنہ ایہہ کم اتنی جلدی کدیں بھی مکمل ناہو سکدا آسا۔ اللہ تعالیٰ اگے دعاء ہے جے وحیدہ داہر کم بھی اسے طراں چھیتی چھیتی مکمل ہوئے، جس طراں اُس ماہڑے کم کو مکمل کرن بچ تعاون کیتا ہو رنالے ماہڑی تحریر دے نال نال اس داناں بھی ہمیشاں زندہ و جاوید رہوے...


آخر تے ایہہ عرض بھی کر چھوڑاں جے سال 1996 تھیں گھن کے 2004ء توڑیں دا کجھ کلام، جھیر اتقریباً پنجہ غزلاں، نظماں، گیتاں تہ بیتاں اُپر مشتمل ہے، ہک ڈائری بچ موجود ہے، جھیری ماہڑی گرفتاری دے ویلے پولیس سُن ماہڑے مچ سارے دیگر سامان نال ضبط کر کھدی آسی، حالانکہ اس دا ذکر رپورٹ بچ ہے مگر اوہ اجاں توڑیں مکو واپس نہیہ ملی، اس واسطے اوہ کلام اجاں توڑیں اس کتاب بچ شامل نہیہ ہوسکيا، ہوسکدا ہے جے کتاب دی تیاری دے و

دوران اوہ ڈائری واپس مل گچھے، اگر ہجا ہو یا تہ میں اس کو اس بچ ضرور شامل کر
کہنساں، نیہہ تاں پھر اس دا قارئین کرام کو انتظار ہی کرنا پئی.....
باقی رب سوہنے دے ہتھاں بچ.... اللہ بلی!

دعاواں دا طلبگار
محمد مقبول ساحل (کھوکھر)
اڑ حال کو کرناگ (حال سرینگر) کشمیر



بسمہ اللہ الرحمن الرحیم



ابتداء

حمد و ثناء

سب یاراں تھیں یارِ پیارا، سب میتاں تھیں سوہنا میت
سب اُچیاں تھیں اُچڑا دلبر، سب تھیں وکھری اُسدی پریت
نہ کوئی تھوکھا، نہ کوئی بازی، نہ کوئی اُچا، مندرا ہے
دل دی دُنیا، وکھری دُنیا، نہ کوئی ہار ہے، نہ کوئی جیت!



دُعاواں



خدائے لمیزل دے ناں دی میں حمد و ثناء آکھاں
توہڑی تعریف کر سکے، کتھوں میں اوہ زباں آناں!
سجائی بزمِ دنیا تہہ فقط انسان دی خاطر
ہے روشن نورِ حق دی شمع بس، انسان دی خاطر
خدایا! بن توہڑی مرضی کدے پتر بھی بل دا ہے؟
توہڑی مرضی تے بٹے بچ پھکھا کیڑا بھی پلدا ہے



ہر پاسے ہک فوج خوشی دی، ارماناں دا راج ہووے
ماہڑے شہر، مڑی بستی بچ نا کوئی محتاج ہووے
مسلک، فرقے والا فتنہ، نا کوئی چھوت، اچھوت ہووے

آدم دی اولاد ہووے سب، نہ کوئی ناگ، پشاج ہووے
 نہ کوئی پیار دے لنگر خانے بچ رہوے پھنکھا، پیاسا
 ہر بندے دی دل کھیتی بچ پھر پور اناج ہووے
 نا کوئی وہیلا بہہ کے یارو! اتھروں ڈوہلے، پچھتاوے
 مسکیناں دی خدمت کرنا ہر کس دا کم کاج ہووے
 یارب! ماہڑے اس گلشن دے ہر کونے بچ خوشیاں پہنچ
 ماہڑے آل دوالے ہر دم ہک خوشحال سماج ہووے
 جدھ کوئی تہی بابل دا بیڑا چھوڑ کے رخصت ہون لگے
 ڈولی بچ اخلاق دی دولت، علم و ہنر دا 'داج' ہووے
 ماہڑی قوم، ماہڑی ملت دے پُتراں دی رب خیر کرے
 ساحل! بس، پہچان اُنہاں دی شرم و حیاء ہووے لاج ہووے



الہی! نیک لوکاں دے طرز دی زندگی دیوے
 میں بنڈاں جس کو غیراں بچ، مکواتی خوشی دیوے

مکو دے علم دی دولت، خزانہ دین و ایماں دا
 پھلاں دا رنگ دیویں ہو رکلی دی تازگی دیویں
 نویں تہذیب دے رنگاں تھیں میں تنگ آگیاں یارب!
 فخر جس تے کرے دنیا، مکو اوہ سادگی دیویں!
 ماہڑے تے ظلم مچ کیتے وقت دے نا خداواں سُن
 پیچا ہُن ناؤ ماہڑی کو کدیں ساحل تے بھی دیویں!



فقط ہے آرزو اتنی، ہووے جگ بچ امن ہر پل
 پھلے رکھ پُہائی چارے دا، محبت دا دیوے اوہ پھل
 مٹا کے صاف کر یارب! طمع، لالچ دماغاں تھیں
 فہم دا نور کر روشن، نہجھے دل دے چراغاں تھیں
 تگلو اپنی زمین و آسماناں دی قسم یارب!
 اثر ماہڑی دعاء کو دے، فنا کر درد و غم یارب!



الہی ! دے کلو اوہ زندگانی
ہمیشاں ہی رہوے جگ بچ کہانی
زمانے بچ ہاں یارب! بے سہارا
کریں توں بے کساں دی پاسبانی
گزاراں زندگی حمد و ثناء بچ
ماہڑے افکار کو دے جاودانی
میں ہک بندہ ہاں ادنیٰ او خدایا
نہ میں پاکی، نہ میں ہندوستانی
بڑی مدت تھیں کچھ حالت نہ بدلی
توہڑا دربار، ماہڑی بے زبانی!
خدائے لم یزل دا شکر ساحل!
ہے ماہڑا شعر کہہ؟ اُس دی نشانی!



بے پرواہ، بے عار کدیں ہو ر کدیں کدیں دلدارا ہیں
دل بچ رہندا ہلکا، پھلکا، پر سب جگ تھیں پہنارا ہیں!
نظراں تھیں ہیں اولیں اسراں، جسران خوشبو کلیاں بچ
ہر سوہنے تھیں سوہنا ہیں توں، ہر پیارے تھیں پیارا ہیں
تیرا سایہ سر ماہڑے تے، پھر دریا بھی ساحل ہے!
میں بے کھر، مفلس، بنجارا، توں تاں بخشہارا ہیں

بلغ العلیٰ بکمالہ...

!

نعتاں





رسول اللہؐ دی چوکھٹ، نور دی برسات، کہنہ آکھاں
ایہہ دامن ریزہ، ریزہ، درد دی سوغات، کہنہ آکھاں
دعاء منگدے فرشتے روز و شب جس دی جناب اندر
میں اُس محبوبِ سُبحانیؐ دی حمد و نعت کہنہ آکھاں
وسالت کر دیون جیکر، رسالت ماب، چنگا ہے
میں کردا ہاں گناہواں بچ بسر اوقات، کہنہ آکھاں
سبز گنبد، منارے ہور مدینے دے گلی کوچے
ماہڑے ارماں، ماہڑی حسرت، ماہڑے جذبات، کہنہ آکھاں
اُچی شانِ کرم اتنی، جے اسماناں دا قد چھوٹا!
غربی، مفلسی، ہجرت دے اوہ دن رات، کہنہ آکھاں
کدیں پہنکھیاں غریباں کو نوالہ اپنا چا دیندے!
کدیں شمشیر گجدی ہے، کدیں غزوات، کہنہ آکھاں
ہے صدقہ کالی کالی دا جے دینہ، چن اج بھی روشن ہے
اوہ نجم و شمسِ بطحائیؑ، اوہ ارفع ذاتؑ، کہنہ آکھاں!

”تُو بیڑا ماہری اُمت دا خدایا ! پار اج کردے“
 سرِ محشر تْسارے لب تے ایہہ کلمات، کہہ آکھاں
 تْسی واقف ہو ہر گل تھیں، میں آقا! چپ ہی رہساں گا
 میں ساحل! دل دے غم ہو جان دے حالات، کہہ آکھاں

ﷺ

عنایت، رہبری ہو رابرداری، یا رسول اللہ
 ایہہ عرضی کردی ہے اُمت بچاری، یا رسول اللہ
 تْساں کو سب پتہ ہے، جان دے ہو دردِ دل سارا
 کراں میں کس اگے ہُن آہ و زاری، یا رسول اللہ
 مٹا چھوڑو خدا دے واسطے اج ماہری قسمت تھیں
 غربی، بے نوائی، خاکساری، یا رسول اللہ
 تْسیں مولیٰ، تْسیں آقا، تْسیں ہو جان دے والی
 ماہرے دل تھیں کڈھو غم دی کٹاری، یا رسول اللہ

تکاں جا کے مدینے دی گلی ہور گنبدِ خضراء
 کتھوں آناں میں اوہ قسمت اُدھاری، یا رسول اللہ
 تہاڑے ہجر و غم بچ روندیں روندیں سُنک گیناں اکھیاں
 میں دل دے زخم گن دیں شب گزاری، یا رسول اللہ!
 غمِ دُنیا، غمِ عقبی دا کوئی غم نہ میں کرساں...
 ہے ماہڑے سنگ تہاڑی پاسداری، یا رسول اللہ
 ہوون طوفان، کھمن کھیریاں، ساحل میں لبھ کھنساں
 تہاں کشتی ہے ماہڑی پار تاری، یا رسول اللہ

ﷺ

بہاراں ہور نظارے سر جھکا کے سجدہ کردے ہین
 پھلاں بچ بول بالا بس نبیؐ اے محترم دا ہے
 مراتب ہور مناسب سارے ہو گئے نے غلام اُنڈے
 کہ رُتبہ سب تھیں اعلیٰ بس نبیؐ اے محترم دا ہے

گئیاں زخماں تہ دردِ دل، مئے ساڑے تہ ہاڑے سب
 دلاں دے باغ، لالہ بس نبیؐ ءے محترمؐ دا ہے
 اُنہاں دا پیار دل اندر، اُنہاں دا روپ نظراں بچ
 زباں تے ہک ہی نالہ بس نبیؐ ءے محترمؐ دا ہے
 نہ ساقی دی طلب باقی، نہ میخانے دی حاجت ہے
 نشیلا سب تھیں پیالہ بس نبیؐ ءے محترمؐ دا ہے
 عزازیلاں تہ ابلیساں دا ویلا مُک گیا ساحل!
 زمانے بچ اُجالا بس نبیؐ ءے محترمؐ دا ہے

ﷺ

ہنھیرا ہی ہنھیرا سی، مداناں، ماہلیاں اندر
 دیاراں، مرغزاراں بچ، گرایاں ہور شہراں بچ
 عرب تھیں تا عجم توڑیں، جہالت سی، رضالت سی،
 کثافت سی، خباثت سی، غلاظت سی، حقارت سی!
 بنی آدم بدل کے سب، درندے بن گئے آسے

پہرا دشمن پہرا دے، پیو تہیاں دا قتل کر دے سن
 عزاز یلاں تہا بلیساں دی قائم بادشاہی سی
 مظالم دی گھٹا ٹوپی، چو فیرے روسیاہی سی
 کوئی منصف، کوئی ہمد، نہ کوئی یار باقی سا
 نہ کدھرے در و دل باقی، نہ کدھرے پیار باقی سا
 فقط فراق زندہ سا، فقط عیار باقی سا
 ایہہ دُنیا، مختصر بچ ہک جہنم بن گئی آسی
 نہ ہک غمخوار زندہ سا، نہ ہک دلدار باقی سا....
 جنازہ اٹھ گیا انسانیت دا سا بڑا چرکا
 فقط نمرود باقی سن، ابو جہلاں دی دُنیا سی



اچانک خالق و مالک کو دُنیا تے رحم آیا..
 عرب دی ریتلی تہرتی تے ہک ابر کرم آیا
 چو فیری پھل کھڑے، خوشبو کھنڈر اٹھی فضاواں بچ
 خدادے نور دا ظاہر ہو یا مکے تھیں لشکارا
 محمد مصطفیٰ، صلے اللہ، خیر الوری، آیا
 نظام الملک آیا ہو رام الامانیا انبیا آیا

طُفّانِ بچِ مسیحا بن کے سوہنا خدا آیا
جہالت ہو رقتارت بچِ نبیؐ، نور الہدایٰ آیا
جھکے شجر و حجر جس دم اوہ سب دابا دشاہ آیا



ہنھیرے نس کے کدھرے دور جا بیٹھے اُجاڑاں بچ
ہوئے پھر دینہ تہ چن روشن مدانا بچ، پہاڑاں بچ
بماراں، درد منداں واسطے قابل حکیم آیا
حسین آیا، جمیل آیا، حلیم آیا، صمیم آیا
کہہ آکھاں، چھوڑ کے عرش بریں، ربِ کریم آیا
غریباں ہو ر مسکیناں داماوی، ہک یتیم آیا....!



اوہ نبیاں دانیؐ سوہنا، اوہ ولیاں داویؐ پیارا
غریباں، ناتواناں ہو ر ناداراں دا جن، تارا
خدا دے نور دارو شن منارہ، جگ دا لشکارا
پیبر بھی، نبیؐ بھی ہو ر خدا دا عشق بھی آپے
سرے زخماں دی مرہم بھی، تڑفدے دل دا دلدارا



اوہ عاجز بھی، محافظ بھی، مجاہد بھی، شہنشاہ بھی
 اوہ رستہ بھی، اوہ رہبر بھی، اوہ قائد بھی، اوہ ماویٰ بھی
 اوہ ٹھنڈک بھی، حرارت بھی، شجر، بھی پھل بھی، سایہ بھی
 مدر بھی، منزل بھی، مبشر بھی نہ طہ بھی۔
 اوہ رحمت عالمیناں دی تہ سارے جگ تھیں یکتا بھی



اوہ عرشاں ہو فرشاں داشہنشاہ، لاڈلار رب دا
 میں عاجز، نافہم، نادان، نابینا تہ نالائق ...
 خدا بھی ہو فرشتے بھی جہاں دے گیت گاندے ہین
 ماہڑی لرزاں زباں اُپر اُنہاں دی نعت کہہ آوے؟
 محبت اوہ دلاں دی ہو رماہڑا ہک بیاباں دل
 اوہ رب دے نور دادریا، میں ہک ویران جاسا حلّ

صلی اللہ
 علیہ وسلم



تساہڑے دردے منگدے کو، کوئی انعام مل جاوے
نظر کو دید ہو جاوے، بُلاں کو جام مل جاوے!
جے مجنوں واہنگ پُہل جاوے میرا رستہ مدینے بچ
ماہڑی ادنیٰ فقیری کو بڑا اکرام مل جاوے
کدے ویکھاں تو ہڑاچہرا، کدے ویکھاں تو ہڑے گیسو
ماہڑی ہر صبح دے بدلے، تو ہڑی ہر شام ہو جاوے
پریشاں پھر رہیا ہاں میں فراق و غم دے جنگل بچ
سہارا کملی والے دا مگو ہر گام مل جاوے
غریب مصر بن کے میں تو ہڑے دربار آپو ہچاں
لگن پھر بولیاں ہر سو تہ اُچڑا دام مل جاوے
کہہ اس کو چاہیدا آقاء! تو ہڑے سنگ جسدی نسبت ہے
متاع دین و دنیا ہے، جے تُسدا نام مل جاوے
تساہڑی نعت گوئی دی ملے توفیق جے
مرے اشعار کو حضرت! عروج و بام مل جاوے
پڑھاں اُٹھدے ہی مدفن تھیں تساڑے نام دا کلمہ
مرے بے نام قصے کو حسین انجام مل جاوے

جے ویکھاں گنبدِ خضرا، کدے در خواب ہی ساحل!
جنون و بے قراری کو ذرا آرام مل جاوے۔

ﷺ

امداد کرو یا نبی! مشکل دے بچ ہے جان
تُس ہی تہ غریباں دے سہارے ہو مہربان!
پھسیا ہے اج طُفان بچ بیڑا غریب دا
خطرے دے بچ ایمان ہے ہک بدنصیب دا
کالے غماں دے بادلاں باہی ہے ہنیری
طاغوت دا ہور کفر دا غلبہ ہے چوفیری
عالی تساں دا مرتبہ، اُچی تْساں دی شان
امداد کرو یا نبی! مشکل دے بچ ہے جان

☆

پیارے ہو خدا دے تسیں، امت دے ہو والی
مایوس اس در تھیں کدیں جاندا نہیہ سوالی

چولی بھی خالی اتے دامن بھی تار تار
 امت دے گلے پے گئے کنڈیاں دے پھرے ہار
 لاچار تہ بے بس ہے اج راکھا قرآن دا
 زخمی بدن ہے اج توہڑے ہر مسلمان دا
 ہے ظلم دی بھجلی دے بچ کوڑے غماں دی تان
 امداد کرو یا نبی! مشکل دے بچ ہے جان

صدقہ حسنؑ، حسینؑ دا، کلثومؑ دا صدقہ
 دے فاطمہؑ تہ قاسمؑ معصومؑ دا صدقہ
 سُن یا نبی! معراج دی اُس شب دا واسطہ
 باہندا ہاں تیرے در اُتے میں رب دا واسطہ
 سینے دا داغ کس کو دساں، کون ہے دردی؟
 تھدھ بن لبھاں کتھوں دسو تسکین جگر دی
 خدشہ ہے بڑا، میں کھلا چہل سکدا نہ طوفان
 امداد کرو یا نبی! مشکل دے بچ ہے جان



ادنیٰ جیہا در در دا مسافر ہاں یا نبیؐ!
 لاچار ہاں، بے بس اُتے بے کھر ہاں یا نبیؐ!
 فریاد ہے ہوٹھاں اُتے، سینے دے بچ ارمان
 سُنک، سڑ کے چاک ہوگئی تریہہ نال ہے زبان
 کہہ حال دل ساحل کرے حضرت اگے بیان
 امداد کرو یا نبیؐ! مشکل دے بچ ہے جان

ﷺ

ایہہ دو جہاں ہین طابع فرمانِ محمدؐ
 ہے رب تھیں پچھے، سب تھیں اُچی شانِ محمدؐ
 کوہ طور سُن اوہ دیکھیا ہے، طور تھیں پچھو
 سی آپ رب دا نور جسم و جانِ محمدؐ
 ستر ہزار پردیاں دے بچ نہ جے ایندے
 اکھیاں کتھا دکھ سکدیاں تابانِ محمدؐ

پڑھدے نے فرشتے بھی انہاں واسطے درود
 ہے بن دا ہر ہک رکھ بھی ثناء خوانِ محمدؐ
 پڑھدا ہاں لمحہ لمحہ میں کلمہ رسولؐ دا
 کہندا ہے دل، بن جانواں مسلمانِ محمدؐ
 کردے نے بے زبان بھی تصدیقِ رسالتؐ
 ہواں نہ دسو میں کنیاں قربانِ محمدؐ؟
 ساحلِ دی بھی خواہش ہے مدینے کو جان دی
 ہے دل دے سمندر دے بچِ طوفانِ محمدؐ

ﷺ

اکھیاں سنگ چُماں روضے دی جالی کو، دُور ہمیرا ہووے
 ایہہ عرض ہے یثرب دے شاہا! درتیرا ہووے، سر میرا ہووے
 اے کاش! مدینے بچ گزرن کجھ دن اس ماہری جندڑی دے
 جنت نالیواں میں ہرگز، اُس باغ دے بچ جے ڈیرا ہووے
 ایہہ عرض کراں میں رو، رو کئے اُمت دلدل بچ پھس گئی ہے

ہُن لازم ہے اے حضرت جی! انصاف ترت، چنگیرا ہووے
 اے بادِ صبا! توں تھوڑ بنا کے لے چل جلدی یثرب دل
 دن کہندے ہین جدھ جنڈڑی دے، پھر کیاں ایہہ ہجر لمیرا ہووے
 کہہ دتا اپنی جہیہھ کو میں کوئی ہووے کلام نا آکھیں توں
 ہر شام، صبح، تہ رات دنے، ہک ذکرِ رسول بہتیرا ہووے
 ایہہ حسرت ہے دل ماہڑے بچ، ہک واری ویکھاں حضرت کو
 اس راہ دے میں جانواں صدقے، جس راہ تے اُندا پھیرا ہووے
 ہُن غم دی ہنیری تیز ہوئی، ساحلِ نظراں تھیں اوہلے ہے
 اے سرور! صدقے رحمت دے، ہُن پارِ غریب دا بیڑا ہووے

صلی اللہ
 علیہ وسلم

زباں، دل، جگر سب، نبی آشاء ہین
 رگاں دے لہو بچ شہہ انبیاء ہین
 محمد، محمد، محمد ہے ہر سو
 نظارے، ایہہ سارے، انہاں دے گواہ ہین

پُھلاں، پتراں، بوٹیاں بچ محمدؐ
 ہر ہک خوبصورت جگہ تے اوہ شاہ ہین
 اُچی شان آلے، بڑی آ ن آ لے
 اوہ رحمت دا ہک سلسلہ بے پناہ ہین
 پیمبرؐ، نبیؐ تہ رسولؐ... اللہ اللہ!
 خدا اُندا عاشق، اوہ سب تھیں جُدا ہین
 فلک اُنڈے قدماں تلے آکے نازاں
 زمی آکھدی ہے ' ماہڑے درُباہ ہین'
 اوہ تکمیل سارے جہاناں دی آسے
 بنی نوحِ انساں دے اوہ رہنماء ہین
 ہے اُمت انہاں کو ہر ہک شے تھیں پیاری
 معرضِ خدا دے اگے مصطفیٰؐ ہین
 دل و جان طالبِ محمدؐ دے ساحل!
 ماہڑے مال و دولت انہاں تے فداء ہین

ﷺ



دشوار مدینے دے رستے، گلزار مدینے دے کوچے
ہک وار خدایا! دس سب کو، ہک وار مدینے دے کوچے
نہ ثانی کوئی، نہ ہمسر، اوہ جنت دے دروازے ہیں
بے جوڑ بنائے قدرت سُن، شاہکار مدینے دے کوچے
دن رات مبارک سینے سنگ، پتھر ٹھو ٹھو کے ڈھلیا سی
اس پاک پسینے سنگ ہو گئے عطار مدینے دے کوچے
نس گئے نے جہاں داکھ تک کے سب کفر و جہالت دے ہنیرے
اوہ دیہنہ، چن، تارے، اوہ روشن مینار مدینے دے کوچے
دل درد و فراق دے عالم بچ رو، رو فریاداں کردا ہے
اس پار میں بے بس بیچارہ، اُس پار مدینے دے کوچے
میں عرض و سماء دے بارے بچ کے ہور مثالاں پیش کراں
ایہہ سارا جگ ہے ہک ظلمت، انوار مدینے دے کوچے
در در تے پھر کے ٹھونڈاں میں غنخوار و محافظ کہہ ساحل!
سرکارؐ محافظ اپنے ہیں، غنخوار مدینے دے کوچے!

صلی اللہ
علیہ وسلم



جند، جان، دو عالم، کُہر آنگن، قربان محمدؐ پیارے تے
کردیواں ہر ساہ، ہر تہڑکن میں دان محمدؐ پیارے تے
اوہ بعدِ خدا سب تھیں اعلیٰ، اوہ سارے جہاناں دے آقاء
مشروط ہے دُنیا ساری دی پہچان محمدؐ پیارے تے
توحید، نمازاں ہور روزے، ایہہ جج، زکواتاں ہور کَلے
اُمت لئی رب نازل کیے سامان محمدؐ پیارے تے
سِت زمیاں، سِت اسماناں دی کُہہ شان ہے یارو! کُہہ آکھاں
سو وار کُہمانواں میں لوکو! اوہ شان محمدؐ پیارے تے
ایہہ دُنیا ہوندى ہک ہنیرا، ہک صحراء، یا ہک ویرانہ
نازل نہ جیکر رب کردا قرآن محمدؐ پیارے تے!
اللہ تہ فرشتے، جن و بشر، اُس ذات دی تسبیح کردے ہین
قربان خوشی سنگ آپ ہوئی ہر آن محمدؐ پیارے تے
معراج دی شب، رب سوہنے سُن قدماں بچ ڈاہے اس کیے
جے کبر نا کدھرے کر بیسن اسمان محمدؐ پیارے تے!
جس جان دی رگ رگ ہور لوں لوں، اُس صلے اللہ دا صدقہ ہے
لکھ وار کُہمانواں میں ساحل! اوہ جان محمدؐ پیارے تے

صلی اللہ
علیہ وسلم

عظمتِ رمضان

صدیاں صدیاں جاگ عبادت کرنے دی سی لوڑ کدوں
تریہہ روزے رمضان مبارک والے جے کوئی رکھ لیندا
'الفِ شہر' دی عظمت تھیں اوہ صرفِ نظر نہیہ کرسکدا
ہک 'قدر' دی سورۃ نچ قرآن پاک دے جے کوئی تک لیندا
پہلے دس دن رحمت والے، جے توفیقاں رب دیوے
چھولی پھر پھر مٹھڑا میوہ ہر کوئی مومن چکھ لیندا
دو جا عشرہ مغفرتاں دا، توبہ، تائب کر بندیا!
ہک نیکی دے بدلے اوہ رب اجر ہزاراں لکھ لیندا
خُلدِ بریں دے سب دروازے تیجے عشرے نچ کھلدے
روزے دار بنا کے اپنی جنت نچ جاء رکھ لیندا
کے آکھاں میں شانِ خدا، اس پاک مہینے دے اندر
دیندا ہے رب سوہنا سب کجھ، بدلے نچ نہیہ لکھ لیندا
کر کر سجدے پہاگ سجدی ساری دنیا اس رُت نچ
کاش! نمانا ساحل بھی کجھ عقبی دے لئی جکھ لیندا!

امامؑ دی شہادت درسِ آخر، یزید اں دی خجالت، درسِ ثانی
شہادت سی ابو مسلمؑ دی گویا کتابِ کربلا دی پہلی سُرخ!

مرئیے...

ویران ہے بہارِ اج کر بل دی رات ہے!



صحرا، چمن اُداس ہیں، پر بت بھی چوڑ ہیں
عائب دلاں دے چین ہو را کھیاں دے نور ہیں
بلبل چمن تھیں دُور کدھرے ناصبور ہیں
کچھ گل ہے بے قرار دو عالم دے نور ہیں
مغمومِ اج دی رات اوہ پیارے حضور ہیں
زرغے اندر مولیٰ علیؑ دے اکھ دے نور ہیں
مفقود ہو ر مسدود عبور و مرور ہیں
واللہ! اوہ معصوم ہیں اوہ بے قصور ہیں



نیل و فراطِ اج دی راتی خشک ہو گئے
پیارے نبیؐ دے لالِ اج پُتھکھے ہی سو گئے
کوئے دی تتی ریت بچ سب ہیرے کھو گئے
ہجر و غمِ حسینؑ بچے بھی رو گئے.....
ہنجواں دے ہک سیلاب سنگ دُنیا کو تھو گئے
اپنے سراں دی ہک لمیں تسبیح پر و گئے

باطل داہر جہاز، ہر کشتی ڈبو گئے
ہک لازوال حق دی اوہ پھیلا کے لو گئے



ہے خانوادہ علیؑ، کربل دی رات ہے
شمر لعین وابنِ مرجانہ دی گھات ہے
بے بس آتے مجبور ساری کائنات ہے
سینہ سپر باطل دے سنگ مولیٰ دی ذات ہے
حق دی نویں حیات ہے، باطل دی مات ہے
اج زینبؑ و کلثومؑ دے ہوٹھاتے نعت ہے
جاناں دی فکر ہے نہ غم مشکلات ہے
نہ خوف و غم ہے، نہ کوئی ڈرنے دی بات ہے



بے جان و جاندار سب، اج اشکبار ہیں
بے چین و بے آرام آتے بے قرار ہیں
تیغ و تفنگ و تیر دل دے آ رہا رہیں
بے حد گرم کربل دی شب، غم دے بزار ہیں
اندر حراں دی واپسی دے انتظار ہیں

باہر فراق و درد دے گرد و غبار ہیں
سینہ سپر امامؑ دے سب شہسوار ہیں
دشمن مگر بے دین ہیں، بے اعتبار ہیں



دامن ہے تار تار، اج کر بل دی رات ہے
ہر دل ہے بے قرار، اج کر بل دی رات ہے
ہر سؤ ہے ریکزار، اج کر بل دی رات ہے
ترہائی ہے تلوار، اج کر بل دی رات ہے
ہر نفس ہے لاچار، اج کر بل دی رات ہے
ایندانیہ اعتبار، اج کر بل دی رات ہے
ویران ہے بہار، اج کر بل دی رات ہے
رستہ ہے خارزار، اج کر بل دی رات ہے
ساحل ہے اشکبار، اج کر بل دی رات ہے



رات کربل دی!



دشتِ کربل دے اندر،
اج دی راتی
حق و باطل دامِ حرکتِ ہوسی
نور و ظلمات ہین اج دی شبِ سینہ سپر
اج دی شبِ ہنیرے دی ہے یلغارِ نورِ حق اُتے
چن، تارے... بند یوان ہین سارے
ابنِ مرجانہ دے ناپاک ارادے ہین جواں
خُبثِ باطن تھیں ہے لبریزِ دلِ شمرِ لعین...!!
سر بسجدہ ہوئے بارگاہِ رب تے حسینؑ
مُحشرِ صغراء ہے برپاءِ اج دی راتی چار سو
تشنہ لب ہین اج دی راتی قَلَزَم و نیل و فرات
پہکھے ہو ترہائے بیابانِ بیچِ معصوم گُرے!
علیؑ، اکبرؑ، عدیؑ، عبداللہؑ، جعفرؑ و عثمانؑ

فاطمہؑ، اُمّ زینبؑ، سیکندہؑ ہور کلثومؑ غریب.....!
 اج دی راتی ہو کے کٹھے، اوہ بھی بیٹھے ہین گُریے
 سارے نمرود ہور فرعونؑ، ہور بولہب و یزید!
 تیر و ترکش بھی ہے ہور مکرو عیاری بھی ہے
 زرعدہ، سنان و تمیز و مروان و شمر!
 اج دی راتی سارے سیاہ بخت ہین ہک!
 غم دے سُنسان بیابان تے ماتم دی قبا
 بیتِ شبیرؑ تھیں اٹھدا ہے ماتم دا تھوواں!
 باغِ حیدر دے ہین اج سارے چھُسمسائے گلاب
 شمعِ عرفان دے پُہوراں بھی کھا ہدی ہے قسم
 نورِ عرفان دے پروانے ہین دیوانے بڑے
 اج دی شبِ معراج شہیداں دی ہے!
 اج دی شب رکھنا ہے اُچا حق دا علم
 اج دی شب محصور ہین سب باغِ محمدؐ دے گلاب
 کالی ظلمات دے طوفان بچ ہین سرو سمن
 ج نظر بچ دور توڑیں بھی نہیہ ہک ابر کرم

اِج دی شب ہین بالنے دیوے سراں دے جاگ کے
 ہس کہہ مقتل بچ چلے آئے نے عشاقِ نبیؐ
 دل دے اندر خوف نہیہ، کوئی غم بھی نہیہ، ماتم بھی نہیہ!
 سر بکف، صف بہ صف، تشنہ دہن، جاں بہ لب!
 دور تو نہیں اِج گرے اتھروں بھی نہیہ، شبنم بھی نہیہ
 اِج دی شب دا ہے تقاضہ، امتحانِ عشق... بس!
 اِج دی شب بچ اپنا سیدہ آزمانا ہے اساں
 اِج دی شب بچ تیر کھا کے مسکرانا ہے اساں
 اِج دی شب شکوہ، گلہ ہو رہو کا، ہاڑا ہے گناہ!
 اِج دی شب بچ جیتنا ہے حق تے سچ دا معرکہ
 اِج دی شب بچ خونِ معصوماں دی ہے حق کو طلب
 اِج دی شب رکھنا ہے یارو! حق دا دیو ابال کے
 اِج دی شب پہرنا ہے اس قندیل بچ اپنا لہو
 اِج دی شب اپنے لہو دے نال کرنا ہے وضو.....!!!



نانا حسینؑ دا

ہوٹھاں تے جد بھی آیا فسانہ حسینؑ دا
یاد آئی کربلا تہ زمانہ حسینؑ دا
سردار شہیداں دا ہے زہراؑ دا لاڈلا
نیاں دا تاجدار ہے نانا حسینؑ دا
رب آپ ہے اسلام دی چادر دا قاصبی
پیٹا ہے محمدؐ دا تہ تانا حسینؑ دا
شمر لعین بھی خوار ہے، ناپید ہے یزید
پر تا ابد آباد ہے خانہ حسینؑ دا
ہر گل زمانہ پہنل گیا، پھلیا نہ پھیر بھی
باطل کو سر کٹا کے ہرانا حسینؑ دا
پیارے نبیؐ دا آکھنا ”ماہڑے حسین ہین“
تکسو تہ اج ہے سارا زمانہ حسینؑ دا
چکا دتا کس چیز سُن اُمت دا مقدر؟
ہک تیر کھا کے سجدے بچ جانا حسینؑ دا

حق، سچ دے معرکے دے بچ رہسی گا تا ابد
اُچا علم، بلند ترانہ حسینؑ دا
ظلم و ستم تہ کربلا ساحلؑ ہوئے نے عام
لازم ہے مڑ کے رمز بچ آنا حسینؑ دا

میدانِ کربلا!

کتنی ہے دردِ ناک، داستانِ کربلا
میں ہوو ایہہ ماجرائے شہیدانِ کربلا
تن ہوو بدن جدا جدا، زخمی رنواں، رُنواں
بے مول و بے مثال ہے سامانِ کربلا
زینبؑ، حسینؑ و فاطمہؑ ہوو زین العابدینؑ
خوشبو، بہار و گل، ایہہ گلستانِ کربلا!
حضرت علیؑ دا نور، نواسے بنی دے سن
جنت جہاں دے خون سنگ میدانِ کربلا

اُجڑے کُہراں کو کون بسا سی گا غمزدو!
 رخصت کدوں دے ہو گئے سُلطانِ کربلا
 اج کہکشاں کو چھوڑ کے تارے کدھر گئے؟
 نالان و پریشان ہے دربانِ کربلا!
 بے نور ہر چراغِ اج، ہر شمع بجھ گئی
 کتنی سیاہ ہے شامِ غریبانِ کربلا
 ساحل! رہواں میں عمر پُہر حامدِ مام د
 دیواں میں ہر کتاب کو عنوانِ کربلا!



عظمتِ حسینؑ دی!



میدانِ کربلا دے بچِ حالتِ حسینؑ دی
 اللہ کو ہے پسند شہادتِ حسینؑ دی
 پُھنڈا گرے توحید دا نہ سرِ نگوں ہوئے
 پوری ہوئی ہے خوب ایہہ حسرتِ حسینؑ دی
 کس شانِ سنگ، اُس جانِ مرتضیٰؑ نے دتی جان

دشمن دے دل اندر اُٹھی عزت حسینؑ دی
 اوہ دستِ جبر و ظلم تے بیعت دی گل بھی سی
 جائز بھی سی برحق بھی بغاوت حسینؑ دی!
 لیندے نے سب امامؑ دا صد احترام نام
 صدیاں تھیں ہے مثال شُجاعت حسینؑ دی
 اس حِ دے لئی بیتاب سن جنت دیاں حوراں
 تحفہ سی شہیداں کو امامت حسینؑ دی!
 لے جائے مکو کوئی ہوا کربلا دی سو
 لے آواں مستعار میں قسمت حسینؑ دی
 شمرِ لعینؑ تہ ابنِ مرجانہ ہے راہ دے بچ
 پھر اج ہے اس ملت کو ضرورت حسینؑ دی
 ساحلؑ! ہويا ہے دامنِ الفاظ بڑا تنگ
 کسراں کراں بیان میں عظمت حسینؑ دی؟



حسینؑ



اُچی عظیم، حضرتِ حسینؑ دی ہے ذات
دینِ نبیؑ کو دے گئے بے حد لمی حیات!
حضرتِ علیؑ دا نور، اوہ پیارے نبیؑ دا لال
عالی توہڑا مقام، شہادت توہڑی کمال
اے آبروئے دینِ نبیؑ! شاہِ خوشخصال!
زندہ توہڑی مثال ہے، ابدی توہڑی حیات
اُچی، عظیم حضرتِ حسینؑ دی ہے ذات

ملت دے واسطے جھڑے قربان ہو گئے
اُچے فرشتیاں تھیں بھی انسان ہو گئے!
دینہیہ، چن تھی بھی روشن اتے تابان ہو گئے
ایمان کہن کہہ آئے سے ایمان ہو گئے

آئی ہے دینِ حق دی صبح، گئی کفر دی رات
اُچی، عظیم حضرتِ حسینؑ دی ہے ذات

دینِ نبیؐ دی آرزو، حق ، سچ دی جستجو
سینے تے تیر کھا کے بھی لڑیا اوہ نیک خو
اسلام دی اوہ کر گیا محفوظ آبرو!
کونے دے ہر پہاڑ تھیں ٹپکن لگا لہو
احسان مند امامؑ دی ہے ساری کائنات
اُچی، عظیم حضرتِ حسینؑ دی ہے ذات

کتنا شمر دے سامنے سر کو نہ خم حسینؑ
برداشت ہس کے کر گئے ظلم و ستم حسینؑ
اج پھر توہاڑی لوڑ ہے، تُسدی قسم حسینؑ!
اُمت دے اُتے پھر کرو نظرِ کرم حسینؑ!
دنیاں شرِ یزیدؑ تھیں پھر پا گچھے نجات
اُچی، عظیم حضرتِ حسینؑ دی ہے ذات!

کہنہ غم ہے اگر جان گنوائی حسینؑ سُن
دینِ خدا دی شان بدھائی حسینؑ سُن
رسمِ خلیفِ مر کے نبھائی حسینؑ سُن
ملتِ نویں سرے تھیں بسائی حسینؑ سُن
کسراں بیان میں کراں ساحل! ایہہ مناجات
اُچی، عظیمِ حضرتِ حسینؑ دی ہے ذات!



غزلاں



دیندا ہے دلبر! دل تکو آواز امشب
بن جا توں ماہڑا ہمد و ہمز امشب
اج ہے اجازت ہر ستم دی، ہر جفاء دی
برسر توہڑے نخرے، توہڑے انداز امشب
توں آ، ملا لے تال اپنی چٹانجراں دی
آیا ہاں کھن کے میں خوشی دا ساز امشب
ہجر و وچھوڑا کہہ بلا ہے؟ سوچساں کل
فی الحال کریئے وصل دا آغاز امشب
گیا ہے لشکر حُسن دا میدان اندر
لڑن انہاں سنگ عشق دے جاں باز امشب
توں بھی تہ کر اظہار اپنے ذوقِ دل دا
اُچی ہے ماہڑے شوق دی پرواز امشب
ساحل! مقدر سُن کتھوں آندے پکڑ کے؟
پھر روبرو کہنگی، شکاری، باز امشب





اس کیتے میں یاد تیری بچ ہوياں زبردستی گم
ایہہ دولت پا کے ہو جاندی غربت، غم، تنگدستی گم
کس کو غم ہے باہر نکل کے تکی ماہری صورت کو
تنہا چن میں چتر دا ہور نیندر دے بچ بستی گم
عشق دی اگ بچ سڑ جاندے ہن طور کدی، منصور کدی
عشق سمندر بچ ہو جاندی ہر شے مہنگی، سستی گم
میں ٹریا ساں دنیاں جتن، پر تیرے دیدار پچھے
پچھا دل دا کفر پرانا، ہو گئے کبر و مستی گم
ٹٹ، بچ جاسیں، مر مٹک جاسیں، بٹیاں دی اس بستی بچ
اوہ ماہڑے نازک دل! ہو جاتوں بھی دتی دتی گم
ست آسماناں، ست زمیاں کو تک لیندا ہاں میں اج کل
اچیاں دے سنگ یاری لا کے ہو گئی ماہری پستی گم
کتھے ٹھونڈاں ساحل! اپنا نام، ٹھوک، ٹھکانہ، روح، ہور جاں
ہک سوہنے محبوب دی ہستی بچ ہے ماہری ہستی گم!





کتنا سدھا، سادہ ہے قاتل ماہڑا
ہفتے بچ سو بار دکھاندا دل ماہڑا
میں کچھیا جے چن بدلاں دے اوہلے ہے
آکھن لگا 'تک لے آکے تل ماہڑا
تیرے دکھ بچ مر جانواں، مٹ جانواں میں
تیرا سکھ ہے جندڑی دا حاصل ماہڑا
نا طوفاناں دا ڈر ہے، نا ڈبن دا
دریا، موجاں، گھسن تہ ساحل ماہڑا





ہک ایسا ویلا آسی گا، ایسا بھی زمانہ ہوسی گا
محلاں اُپر سلطاناں دے، بازاں دا ٹھکانہ ہوسی گا
زنجیراں ٹسّسن، لوہے دے سارے دروازے کھل جاسن
صیاد مرے دا، ہتھ ماہڑے بچ پانی دانہ ہوسی گا!
ایہہ زخم اُنہاں دے اپنے ہین، پہچان اُنہاں کوہے اندی
بے کار اُنہاں دی اکھ کولوں ایہہ راز چھپانا ہوسی گا
اوہ حیلے پہانے، نخرے، نازاں ہور اداواں سنگِ ملسن
اج وصل دی راتی بھی شائد بس آنا، جانا ہوسی گا!
نادان بڑا ہے! ہک صورت، تکتا ہے تہ رو پیندا ہے!
ہولیس ہولیس ہک دن یارو! ایہہ دل بھی سیانا ہوسی گا
اج میں ہور ماہڑا افسانہ دنیاں بچ گجے ہاں، پرکل
کوئی ہور کہانی ہوسی گی، کوئی ہور فسانہ ہوسی گا!
فی الحال تہ محفل سونی ہے، ہک تھوواں اُٹھدا ہے ساحل!
جدھ اوہ آسن، اُندا آنا، ہک اک تھکھانا ہوسی گا!..





صفایا شاہواں، شاہنوازاں دا کیتا
فتح ہر قلعہ جنگ بازاں دا کیتا!
کبوتر تہ کُہکیاں چھڑاون دی خاطر
میں کھیرا جے کیتا تہ بازاں دا کیتا
سُنے دشمنان ہور شریکاں دے مہنے
گلہ دلبراں، دنوازاں دا کیتا
مکو خوب ملیاں نے ٹکراں تہ فاقے
میں صرفہ جے کیتا، نمازاں دا کیتا!
کھوہاں، ڈڈواں دا جہاں چُج نکا ہے
سفر در سمندر، جہازاں دا کیتا
اساں گیت چھیڑے تہ محفل سجائی
ٹُساں حال کہہ دل دے سازاں دا کیتا
میں سودا فقط ہک، حیاتی دے اندر
ایہہ توہڑیاں اداواں تہ نازاں دا کیتا
خوشی سنگ میں کھل اپنی لہاڑی ہے ساحل!
نہ افشاء مگر توہڑیاں رازاں دا کیتا!





مائے نی مائے سرینگر راہے، گلمرگ کتنی ہک دور؟
جنت دے بازار بچ جانڈے جانڈے، ٹنگمرگ رُکنا ضرور
ہوا بدگماں ہے، نظر بے ایماں ہے تہ دل ماہڑا بے چین ہے!
اسے دیس بچ ہے، اسے جاتے ملسی، اوہ ماہڑے خیالاں دی حور
عدالت بھی اپنی، وکالت بھی اپنی تہ منصف بھی آپے تسی!
سزاواں سنا کے قلم پہن چلے ہو، مگر ماہڑا کے سی قصور؟
نشہ، بدگمانی، شراباں دی خوشبو، ہر ہک شخص بد مست ہے
سمایا ہے ماحول بچ چار پاسے، کسے دی نظر دا سرور!
خدا را ماہڑے دل دے اُس بُت شکن کو کوئی ٹھونڈ آنو ذرا
دلِ کافرانہ تھیں جس دی بدولت، زمانے دا ٹٹیا غرور!
جے لوکاں نے پچھیا تہ میں دس ہی دیساں، کہ تو ماہڑا لگدایں کہہ
دماغاں دا فتنہ تہ چھکڑا دلاں دا، د غاباز اکھیاں دانور...!
قیامت بھی آسی تہ جنت بھی لبھسی، خطاواں بھی ہون معاف!
کدیں سرد ہوسی، خدا جانے سائل! میرے دل دا تھکھدا تنور!





بند ہو جاسی جدھ اکھ ماہڑی، پھر توں ایہہ گل ازماویں
کر کر پیسیں ہار، پیسیں سنگھاراں راہ بچ، دکھساں، تکسی کون؟
ایہہ دل ماہڑا، کھر سا تیرا، اس دل کو تڈھ توڑ دتا!
اُجڑے کھر بچ ہن دس تیرا پیار محبت، رکھسی کون؟
تن ماہڑا کوہ طور سی گویا ہورتیرے جلوے بجلی
عشق توہڑے بچ شام، سویرے اتنا تھکھسی، پہکھسی کون؟
ہک ناں جڑیا ناں ماہڑے سنگ، ہک صورت، ماہڑی صورت
اس صورت کو، اس ناں نالوں دور، جدا کر سکسی کون!
لکھیا میں پر تڈھ لکھایا، سوچ دا ماہڑی توں دریا!
تریہہ ماہڑے قلموں دی بجھسی! اس بچ یارو! شک سی کون؟
یاد ہے اتنا نظراں ملیاں، ہوش اڈے، مدہوشی پئی
اتنی سوئی، اتنی پیاری، توں دس، قاتل اکھ سی کون؟
میں تاں ہک مزدور ہاں ساحل! پرتس سوچو، ماہڑے بعد
دکھ، درداں دے پنڈتساڑے، اپنے موہنڈے چکسی کون؟






تہو کھ دیندی مڑ مڑ، قسمت اپنی ہے
دُہ پلا کے دُنگدی، آخر سپنی ہے!
وصل دیاں راتاں دے جوڑے کدھ لہدے؟
اپنا جوڑا ہجراں والی کفنی ہے!
ہنیری چُہلے، اگ تہنگھے، بجلی کڑکے
تیرے کھر دی راہ اج راتی ٹپنی ہے
تھک چلیاں اظہار دے کلمے پڑھ پڑھ میں
اُس نے بس انکار دی مالا چینی ہے!
پیار دی اگ بچ تہواں کہٹ ہے، لکھ مچ
ایہہ پلایاں بچ کدھ لُگنی، کدھ چھینی ہے
ہو کے رہساں اَج شہیداں بچ شامل
میں بھی ساحل! اپنی اُنکلی کپنی ہے





کیہڑی گلی تیرا رستہ دیکھاں، کس راہوں توں آسیں گا
رُسیا یارا! صاف ہی دسدے، کدھ تکر تڑفاسیں گا
نہ منگ ماہڑی بُربادی توں ماہڑے مرنے تھیں چکھے
کیہڑا سُنسی، کس دے اگے اپنا حال سُناسیں گا
پاک محبت دی باڑی بچ، بچ دغے دے تدھ بیجے
دیواراں سنگ سر ٹکرا کے عملاں دا پھل پاسیں گا
رونی صورت کر کے اپنی ساری جندڑی ساڈوتی
مٹی بچوں اٹھ کے اپنا ہار، سنگھار سجا سیں گا؟
ساون رُت بچ سڑدے رہے، تدھ پیاردی گاگر نہ ڈوہلی
بے موسم دی بارش بن کے کس دا کُہر ڈُباسیں گا؟
اپنے اندر دے حیواناں کو قابو بچ رکھ نادان!
دل بھی تروڑے، کُہر بھی روہڑے، کتنے قہر کما سیں گا!
دُنیا اندر ساحل! تدھ بھی کُجھ سخاوت نہ کیستی
روز قیامت رب دے اگے کہہ نہ مہنہ کُہن کے جاسیں گا؟





اج دوپٹے بچ تیرے پوشیدہ کوئی راز ہے
اج پھلاں دی مسکراہٹ دا نواں انداز ہے
مست کردیندا ہے اس ماحول کو ٹرنا تیرا
اُف! تُوئی پازیب دا کتنا سُریلا ساز ہے
اج میں پھر تیرے پہلیکھے بچ کسے دی راہ ڈکی
پھر مکو گزرے زمانے سُن دتی آواز ہے!
مرحبا! محفل رقیباں دی سجا ون آلیو!
کس قدر پیارا تُوں ساہڑے ظلم دا آغاز ہے
ہے محمد بخش! تُوں دا ناگ زہریلا کتھے؟
رُو برو موجود پھر کُنگھی، شکاری، باز ہے!
ہو گئے محمود سارے رب کو پیارے دوستو!
اج صفاں بچ چار سو ایاز ہے ، ایاز ہے!
ہے جہاں فانی سراسر، فخر کس گل دا کراں
ہاں ، تیرا مجبور بندہ ہون دا مچ ناز ہے

سب سہارے تیرا تیرا ہو کے دکھ رہے ہو گئے
میں مسافر، دل مرا ہک مستقل ہمارا ہے
دور تک لبھدا مکو نہیہ اس دا کوئی آہلنا!
درد دے پنچھی دی ساحل! مچ لمی پرواز ہے



نازک دل پنچ اگ تھکھانا چنگا نہیہ
پیارے موسم پنچ شرمانا چنگا نہیہ
اپنی، ماہری گل کر اس تنہائی پنچ
دُنیاں دا لماں افسانہ چنگا نہیہ
گل دس دتی اج ماہرے آئینے نے
بچیاں واہنگوں، ہسنا، گانا چنگا نہیہ
دنیا آلے کردے غلطی آپ ، مگر
کہہ دیندے ہین 'یار زمانہ چنگا نہیہ
کچ دے پتلے، ڈگ پے تہ پنچ گیندے ہین
نازک چیزاں کو ہتھ لانا چنگا نہیہ

کرفیو، ہڑتالاں پنج رہندی فکر بڑی
کھر آنا بچھا ہے، جانا چنگا نہیہ
حکم تہ ہے اکھ نیویں کر کے ٹرنے دا
اکھ لڑ جاوے، پھر پچھتانا چنگا نہیہ
ہر حرکت دا رکھدا ہاں میں علم، مگر
گجھ پہنیاں تھیں پردہ چانا چنگا نہیہ
باہوشاں دے ہوش اڈاؤ رج رج کے
بے ہوشاں کو ہور ستانا چنگا نہیہ
دوزانو، چُپ، چاپ، ادب سنگ بہہ ساحل!
محفل، محفل شور مچانا چنگا نہیہ





مسکراہٹ دین بچ ہے کھڑی دولت دا زیاں
مسکراہٹ دے عوض ملدے زمین و آسماں
کہہ قیامت، صورِ اسرائیل ہور محشر ہے کہہ؟
آ، سناواں میں نکو، تیرے ستم دی داستاں
اکھ توہڑی تلوار ہے، رُخسار دل دی قتل گاہ!
ہائے ظالم! کتنی مٹھڑی ہے مگر تیری زباں!
ماہڑے سینے بچ اوہ اپنے زخمِ گن کے بول پئے
گلستاں دا ہے کوئی حصہ؟ کہ آپے گلستاں؟
توں بھی رکھ قائم اوہ اپنی ضد، اوہ رُسناء ماننا
ہور میں کردا رہواں اپنی شرارت، مستیاں
ٹھوکران، آوارگی، صدمے مقدر بن گئے
میں بنایا سی کدیں ہک دل دی ڈاہلی آشیاں
کُجھ ڈُبے، کُجھ سڑ گئے، کُجھ ہار کے دل مر گئے
عاشقاں تھیں عشق کہنسی ہور کتنے امتحاں؟

تنگدستی، بے کسی، بے چارگی دے باوجود
خواہشِ آغوشِ لیلے، آرزوئے کارواں!
کون سی ساحل؟ اگر تجھے کوئی تاں آکھدے
”ہک محبت دا پھکھا جوگی، پرندہ نغمہ خواں“



کسے اگلے زمانے بچ کوئی منے تاں من جاوے!
میرے اپنے زمانے دے پلے نہیہ گل میری پیندی
کدیں مانواں دی کوئی بد دعاء لگدی نہیہ پُتراں کو
کدیں کانواں دے آکھے ڈنگراں دی موت نہیہ ایندی
سُریلے گیت سُن سُن کے نا کدھرے دل گما چھوڑیں!
کوئی کُہنگی، کوئی کول کدیں ہک ڈال نہیہ بہندی
عجب زلفاں دا ہک جنگل، عجب نیناں دے دو ساگر!
کدیں رستہ ہی نہیہ لبھدا، کدیں منزل ہی نہیہ تھیندی!

ماہڑی الفت دے ٹہارے دی تباہی دا نہ کر ماتم
کسے دا محل یا پھر محل دی دیوار نہیہ ٹہندی!
نہ کر چرچا سخاوت دا کہ اج کل مُفت بچ دُنیا
جنازہ دور دی گل ہے، سروں میت بھی نہیہ چینی
میری چھولی کو جس نے پہر دتا گیتاں تہ غزلاں سنگ
اوہ کھیڑے گلستاں بسدی، اوہ کھیڑے دیس بچ رہندی
بچا کے اج تکر ساحل! میں ہر ہنیری تھیں رکھے ہین
تُوئی صحبت دے سچے رنگ، اوہ تیرے پیار دی مہندی !





تنہا ، اُداس رہ کے ہے پینا ایہہ زہر، کد تکر؟
انسانیت دے ناں اُپر ہوئی گا قہر، کد تکر؟
سارے گلاب اپنے ہی پیراں تلے لتاڑ کے
کرساں اسی آباد ایہہ کنڈیاں دے شہر، کد تکر
خواباں دے گلستان بچ آسی بہار پھر کدوں؟
ہوئی گی اس غریب تے اُس رب دی مہر، کد تکر
جنت دیاں ایہہ وادیاں ہوسن کدوں آباد پھر
ہوئی رواں مکھیر دی تہ دُده دی نہر کد تکر
تھمسی کدوں تکر پہلا طوفان ظلم و جبر دا!
امن و سکوں دی دل بچوں اٹھسی گی لہر، کد تکر
ہک روز دوستی دا اوہ پیغام بن کے گونجی!
رکھسن دبا کے اوہ مری آوازِ جہر، کد تکر
میں تھوں اگر اوہ رُس کے دُور جُل گئے تہ غم کُجھا
رہسن جُدا ، جُدا بھلا ساحل تہ لہر، کد تکر!





ہاں، بے شک فریاد اوہ سُنسی
سو، سو نخرے بعد اوہ سُنسی!
عشقِ قفس بچ ڈورا ہے اوہ
جدھ ہوئی آزاد، اوہ سُنسی
ماہڑے پیار دا کلمہ پُھلیا
ہُن کس دا الحاد اوہ سُنسی؟
قاتل، ظالم، آکھن والا
کدھ ماہڑی رُوداد اوہ سُنسی!
شاگردی بچ گل نہیہ سُندا
جدھ بنیا اُستاد، اوہ سُنسی
صدیاں تھیں خاموش ہے شیریں
گاسی جدھ فرہاد، اوہ سُنسی
ساحل! ہک دن ہر محفل بچ
ماہڑی 'زندہ باد' اوہ سُنسی!





پہناویں نا دے تن دی چاندی، پہناویں نا من دا سونا
جوگی بننا، کن پڑوانا، ایہہ ماہڑے تھیں نہیہ ہونا!
مال مرے دی چوری ہوگئی، رپٹ لکھو اے صاحب جی!
سینے اندر دل نہیہ لبھدا، میں تکیا کونا، کونا
پہنیں بدل کے قاتل پھر دے گلی گلی تہ نگر نگر
اکھ بچ رکھ دے تیغ تہ خنجر، ہوٹھاں بچ جادو ٹونا
نیویں لوکاں دی یاری بچ، نیواں بننا پیندا ہے
ہوراں دا قد بھی کر دیندے اپنے قد نالوں بونا
کھول کے دل دے سب دروازے، تسدی راہ بچ بیٹھا ہاں
بک واری بس نظراں چاکے ماہڑی جانب ویکھو نا
آپے آکے چھول میری بچ چوری چوری بہہ جاندے
آپے ہتھ پھڑا کے کہندے 'چھوڑو نا، بس، چھوڑو نا'
جسم نجاست بچ دُب جاوے، مٹی بھی کر لیندی پاک
جھیرا جسم نجاست ہووے، دریاواں تے کہہ تھو نا؟
کدھ ٹشن زنجیر، سلاخاں، کدھ ہوسی روح ماہڑی شاد
کدھ تک ایہہ ہڈ ماس دا پنجر، اپنے موہنڈے تے تھو نا!
بک پیارا کشمیر داموسم، دوجی اُس دی مست نظر!
کتنا سوہنا وقت ہے ساحل! سوچو نا، گجھ سمجھو نا!



نشر ، خنجر نا ٹھونڈو، نا تلواراں دا ذکر کرو
جان لبناں تے آگئی جاناں ! بیماراں دا کرو
وصل دی راتی نا چھیڑو ایہہ ہجر و جدائی دے قصے
اپنی چہانجر تہ پائل دی چھنکاراں دا ذکر کرو
جھیڑے رستے دے بچ چھڈ کہہ ہک دن اپنی راہ ٹر گئے
یاد ہے جیکر، اُنہاں رفیقاں ، غمخواراں دا ذکر کرو
ظالم، اسدے راہ بچ اکثر جھیڑے آ بہہ جاندے سن
دشت، پہاڑاں، دریاواں تہ دیواراں دا ذکر کرو
سر اپنا کٹواکے جھیڑے خیر ٹساڑی منگدے ہین
بس ہک واری اُنہاں غریباں ، غمخواراں دا ذکر کرو
اپنی ہستی، ماہری پستی دا چرچا مک جاوے تاں!
ماہڑے افسانے دے باقی کرداراں دا ذکر کرو
خاموشی سنگ ویکھاں بہہ کے میں اج تیرے مکھڑے کو
نہ محفل، نہ جام، نہ ساقی، میخواراں دا ذکر کرو!

کاجل، پلکاں، ابرو، اکھیاں ہور لبیاں دی گل چھڑو
 اے قاتل جی! ہک دن اپنے ہتھیاراں دا ذکر کرو
 حسن و عشق دے دم سنگ ساحل! ساری دنیا قائم ہے
 قدرت دے انمول، نرالے شاہکاراں دا ذکر کرو



کہنہ مسلہ، کہنہ مشکل ہے، بس پیار دیاں دوگلاں نے
 ہے گل گمائی ہے ظالم سب، انکار دیاں دوگلاں نے
 اج کل دی تجارت دا عالم، کہنہ آکھاں یارو! کہنہ آکھاں
 ہک ادھی محبت دی گل سنگ، بازار دیاں دوگلاں نے
 کجھ فلسفیاں دا وس چلیا، نہ داناواں دی دانائی
 خوش کیتا ساری محفل کو سرکار دیاں دوگلاں نے
 محبوب ماہڑے دے خطاں بچ کجھ مہر و وفاء دا ذکر نہیں
 اِس پار دا ہے ہک افسانہ، اُس پار دیاں دوگلاں نے!
 خاموش محبت عاشق لئی تکلیف دا باعث بندی ہے
 اس مرض پرانے دا دارو اقرار دیاں دوگلاں نے
 کہنہ شعر مرے دا موضوع ہے، کہنہ غزل و رباعی دا عنوان؟
 ہک پیارے، سوہنے، قدرت دے شاہکار دیاں دوگلاں نے

ہک دُبا سورج ایہہ دُنیا، پر چھانویں واہنگوں عمر تیری
 ایہہ گہلنا، رُسنا، ہو رشکوئے، بے کار دیاں دوگلاں نے
 پازیب دیاں تکلیفاں کو، کس دکھیا ہے، کس سُنیا ہے؟
 بس یاد زمانے سُن رکھیاں چھنکار دیاں دوگلاں نے
 جدھ، جدھ بھی تجھیا یاداں کو، پنجرے بچ بہہ کے میں ساحل!
 بے چین مگو مچ کیتا ہے کھر بار دیاں دوگلاں نے!!!



نا رو گئیے! نا رو، ویلا ہجر، فراق دا تھوڑا ہے
 اپنے رستے دے بچ باقی ہُن ہک ادھا روڑا ہے
 اوہ دُنیا دے پالن ہارے! توں ہی سُن، کجھ توں سمجھا
 مکاری تہ چھوٹھ کیوں مٹھڑے، سچ کیوں کوڑم کوڑا ہے؟
 پیار محبت رب واہنگوں ہے، یار کو ملنا پاپ نہیں!
 پُھلاں، پھوراں دی قسمت بچ کتنا درد بکھوڑا ہے!
 کیوں عاشق منزل تھیں پہلاں مرجاندے ہو رمٹ جاندے؟
 عشق دی راہ بچ کنڈے، پتھر، رستہ بھی مچ تھوڑا ہے
 ہک تصویر ماہری اپنی اوہ دکھدے رہے اج دیر تکر
 پھر تھوڑا شرما کے بولے، کتنا پیارا جوڑا ہے!

وید، حکیم تہ مرہم لاون آلے ملدے رہے بوہتے
پھر بھی اُس دے ناں دا باقی اس دل بچ ہک پھوڑا ہے



دُنیاں بن گئی بستی جم غفیراں دی
کس کو فرصت، فکر کرے رگیں دی
سر اپنے ہتھاں تے لے کے ٹرنا ہے!
گلشن بچ ہے فصل جی شمشیراں دی
آپ اوہ کھیڈے، ہتھ اُس دے بچ جیت ہو رہا
سب کھیڈاں تھیں وکھری کھیڈ لکیراں دی
کس ہے پڑھیا یارو! علم سلیمانی!
بولی سمجھے کون دلاں، دلگیراں دی؟
پھر تیری پازیب دی آگئی یاد کو
پنجرے بچ کس گل چھیڑی زنجیراں دی؟
چل، دل ماہڑے! مڑ اپنے کھر کو چلیے
دینہہ دُپیا ہو پند مکی تدبیراں دی

ماہڑے دل تہ تہ لکھیاں سن کا جل سنگ
ہک واری رکھ لاج انہاں تحریراں دی
پہو لے مکھڑے، دور تکر ہک خاموشی
ماہڑا گلشن، بستی ہے تصویریاں دی
ہتھ ماہڑے بچ آیا سوہنا ہتھ تیرا
ساحل! ایہہ ساری گل ہے تقدیراں دی





دلبر بسدا دل دے اندر، اکھیاں دے بچ پیار
ہر دم بجدی رہندی دل بچ اُلفت والی تار
دنیا دے ایہہ سب رنگ نقلی، لگدے پھکے ہوو مندے
مہر و محبت دے رنگاں سنگ کیتا ہار، سنگھار
ہر موسم بچ مہکن آلا، اوہ پھل جے نہ سنگ ہوئے
بن کے خنجر اکھیاں دے بچ چُجھدے باغ و بہار
دُور افق بچ پنچھی ڈُپیا آس، اُمیداں آلا اج
روندیں، روندیں ہک بے چارہ بہہ گیا من کے ہار
چار، چو فیری کھنڈر کھلے اگے ہوو بجھے دسدے
غائب ہو گئے دکھیں دکھیں پُر رونق بازار
ناں اللہ دا لے کے کشتی طوفاناں بچ باہ دے
آپے اوہ رب سوہنا ساحل! بیڑا کرسی پار





تک لے ماہڑے گل بچ ترٹیاں لیراں کو
مار نہ تہکے اج محتاج فقیراں کو
میں سر اپنا پھڑ کے کٹ لئے اپنے دن
قاتل مر گئے، زنگ لگی شمشیراں کو
کدھ تک ظالم اگے میں خاموش رہواں!
کدھ تک چہلاں دل بچ چہدے تیراں کو
منصف نے بھی آکھے لگ کے غیراں دے
مجرم دسیا عاجز، بے تقسیراں کو
ہک دن اڈ جاساں کر کے ویران قفس!
کہنول کے پی جاساں سیخاں، زنجیراں کو
ہائے ایہہ دوری، وائے جوانی دے قصے!
کون ملاوے تڑفدیاں تقدیراں کو
سر، اکھیاں تہ لیساں تہدے سارے غم
دل بچ تھوڑی جاء دے یو دگییراں کو

لوہ جگر تے اپنے ہنجاواں سنگ لکھیاں
ناممکن پُہلنا بچیاں تحریاں کو
ماہری صورت کو ساحل! کر کر کے یاد
سو واری ہُن بوسے دے تصویراں کو



ماہڑے سارے کم چھڈ کے اوہ اپنا فرض نبھیدے ہین
اُنڈے بدلے، اجکل اندے، خواب اساں دل ایندے ہین
راہِ محبت دے سیلانی، شکوہ، شکایت نہیہ کردے
پہنکھے، ننگے ہوو تریاہے غم سہندے، چُپ رہندے ہین
منداکم کوئی مُول نہیہ کرنا، پر مندیاں تھیں رہنا دور
موسّٰی تہ ہارون دی بستی بچ فرعون بھی رہندے ہین
کدھ سُنسن اوہ حال اساڑا، کدھ ہوسی اقرارِ وفاء؟
خوشبوواہنگوں اڈدے ہردم، کول میرے کدھ بہندے ہین
بس ہک سعتی یار پیارا ہو جاوے ناراض اگر
اُجڑ جانڈے باغ، بگیچے، محل، منارے ٹہندے ہین

ایہہ موسم، ایہہ باغ، بہاراں بنھ لے اپنے دامن بچ
 جان! ملاقاتاں دے موسم پھر مڑ کے کدھ ایندے ہین
 اپنے یار دی ستھری چادر تے کوئی داغ لگے نا بس!
 لوکاں دا غم نہ کر ساحل! کجھ نہ کجھ پے کہندے ہین!



رب سوہنے سُن کہہ تخلیق ہے فرمائی!
 چیترا دا چین، میں ہور ماہری تنہائی
 تسبیح پھیری جسدے ناں دی عمر تمام
 پہل کے بھی نہ اس کو ماہری یاد آئی
 اس دنیا دے فسق و فجوراں دی باعث
 لا پرواہ اس یار میرے دی انگڑائی!
 رُس کے میں تھوں، جانا اسدا غیراں سنگ!
 اوہ کہہ جان، ماہرے تے کے بن آئی!
 عشق دلاں دا مذہب ہے سرکار! اتھے
 کم نہیہ ایندی فلسفیاں دی دانائی

پُچھنا، ترٹنا ہُن تہ مقدر ہے اپنا
 دل کر بیٹھا ہک بٹے سنگ گڑ مائی
 واہنگ ملنگاں پر بت، پر بت پھر کے بھی
 میں لہجہ سکيا نہ سبناں دی پر چھائی
 تہنگھدے رہے ساحل دے دل بچ لکھ ارماں
 پھر بھی ہک آواز لبناں تک نہ آئی



کے آکھاں میں، کسراں یارو! پوری اپنی حسرت کردے
 مظلوماں کو سینے لاندے، ظالم نال بغاوت کردے
 تپدی تپ پچ کدیں کدیں ہک ٹھنڈی چھاں لہجہ جاندی اے
 کدیں کدیں ایہہ زلفاں آ لے اپنی نظر عنایت کردے
 یاراں دا ناں لے کے یارو! میں گجھ مندا نہیہ کہنا
 ماہڑے نال عداوت رکھدے، ہوراں نال محبت کردے
 سارے سودے کر کے جدھ میں دل دینے دی گل چانداں
 اوئی بہانے، ٹال مٹولاں، اوئی پرانی حجت کردے
 آکے کول اوہ ٹر جاندے ہین روز چھلاوے واہنگوں یارو!
 ارماناں دی بستی اندر برپاء روز قیامت کردے

بند یوان ہنیرے کولوں، نہ ڈردے نہ کہنہ اندے
 زنجیراں، تعزیراں کو بھی متھے لاکے عزت کردے
 پردے اندر رہ کے بھی اوہ ہولے ہولے مسکاندے ہن
 ادھی رکھدے دل دے اندر، ادھی طاہر حالت کردے
 مکر، فریباں، ظلم و دغا بچ جدھ کجھ اُندی نہیہ چلدی
 پھر اکھیاں دے تیر چلا کے دل دی دُنیا غارت کردے
 اللہ ہو دا نعرہ سُن کے فرق پتہ چل گیندا ہے
 غافل سُتے رہندے ساحل! عابد جاگ عبادت کردے



جتھا بھی پے قدم مڑے، اُتھا اُتھا عذاب سی
 ڈگر بڑی ہی دور سی، غروب آفتاب سی
 سُنی جے داستاں میری، فلک بھی رو پیا مگر
 میں بد نصیب ساں، مرا سوال، بے جواب سی
 میں کس طراں تلاش ہُن کران تکو جہان بچ
 سدا سدا تیرے رُخ گلاب تے نقاب سی

ہو یا وفا دے علم تھیں کنارہ کش ایہہ ویکھ کے
جے اس دی ہر کتاب تے عذاب ہی عذاب سی
کراں فراق و غم کنیاں، میں رُکھ تے میوہ ویکھ کے
اگر ایہہ سچ ہے غیر دا، کدیں تہ ماہڑا خواب سی



ایہہ عشق دے قصے اگر مشہور ہونہ جاندے
شائد اسیں بھی ہک دوئے تھیں دور ہونہ جاندے
ہنجواں دے سنگ انہاں کو تہوندا یار نا جیکر
پھلاں جے ایہہ زخم دل ناسور ہونہ جاندے؟
ہک وار آکے ماہڑے مرقد تہ جے اوہ روندے
ایہہ کے عجب سی جے اسی مغفور ہو نہ جاندے
ہر گام جے نہ ہوندیاں ایہہ ٹھوکراں تہ مشکلاں
ساحل ! اسی خود سراتے مغرور ہو نہ جاندے؟ !





لوکاں تھیں ماہڑے یارو! ہوگئی ہے کے خطاء اج؟
ہر شخص اپنے مونہہ کو رکھدے لُکا لُکا اج
پھر دا ہے ننگا ہوکے دو عالماں دا وارث!
لُٹ لئی کنہاں ہتھاں سُن، اوہ شرم، اوہ حیاء اج
ماہڑی اداس محفل، ماہڑا جگر پریشاں!
کل خوش سی میں تھوں ماہڑا، پہلکے ہے کجھ خفاء اج
روندے نے چناراں دے پتر رتو دے اتھروں
ایندی ہے گلستاں تھیں آتشزدہ ہوا اج
الفت دا ناں بھی لینا ممنوع ہے اس گلی بچ
اُس دردِ دل دے مارے جاییے دسوکتھا اج؟
نفرت پہرے جہاں تھیں بہتر ہے موت یارب!
یا رحم باہ دلاں بچ، یا سُن لے ایہہ دعاء اج
انسانیت دا زخمی ہے روم روم ساحل!
اللہ دے خلیفے دی دسویں ہے انتہاء اج





دلبر باجھوں جنڈڑی رُل گئی، یاد اسے کو کردے ہاں
کہہ آکھاں ہُن حال میں یارو! جیندے ہاں نہ مردے ہاں
اتنے اتھروں اکھیاں ڈوہلے، کٹھے، نالے بگدے رہے
ترتر کے اس ڈبدے ہاں تہ ڈُب ڈُب کے اس تردے ہاں
سنیا آسا پیار محبت، دُکھ درداں دا دارو ہے
جدھ تھیں یاری لائی یارا! تیر جگر تے جردے ہاں
سوہنے یار دی صورت کیتا تن، من اسدا پاک صفاء
اُس شیشے دے اگے بہہ کہہ ہُن ہر روز سنوردے ہاں
وید حکیم بھی ہار کے بہہ گئے، پر بیمار نا ہو یا بل
وصل یار دی مرہم لاؤ، زخمی تیر نظر دے ہاں
تقدیراں دے دو راہے بچ بیٹھے ہاں خاموش، مگر
ایہہ نہ سمجھے ٹہیٹھ زمانہ، اُسدے شرتھیں ڈردے ہاں
دنیاں والے سُن سُن جدا حال کناں ہتھ لاندے ہین
اُس بیگانی اگ بچ ساحل! سڑ سڑ عیشاں کردے ہاں!





پر بت پار ہے ٹھوک ماہی دی، مار اڈاری جانواں میں
کے دیواں دو چار پکھاں دی قیمت کالے کانواں میں؟
یار پیارے چھڈیا ٹرنا، پھر نہ ٹریا ہور کوئی!
مڑ مڑ تکیاں، جا جا ڈٹھیاں لکھ واری اوہ راہواں میں
آپے ہک دن تنگ اوہ آکے لکھسن ہنجواں نال جواب
رت اپنی سنگ ہک مدت تھیں لکھ لکھ چٹھیاں باہواں میں
باغ حیاتی دا مہکایا جس دے لب دی لالی سُن
ماہلی ماہلی، گلشن گلشن گیت اُسے دے گانواں میں
رب رُس جاوے، صوم، صلاتاں نال میں راضی کر لیواں
منتاں، ترلے، کچھ نہیہ مندا، کسراں یار منانواں میں؟
جس پڑھیا، اُس تَسدی صورت بچ تصور تک لئی ہے
دل دے افسانے تے لکھیا اسراں دا سرنانواں میں
دیہنہ، چن، رات تہ شام سویرا، نکھڑے ہین کدھ دنیاں بچ
اوہ ماہڑا قد، بُت ہے ساحل! اس داہاں پر چھانواں میں!





چھوڑ کے ساری دنیا، جس کو سینے نال میں لایا سی
اُس غیراں دے کلمے پڑھ کے رشتہ خوب نبھایا سی
مست دیوانے نالوں میں تاں اپنے رستے تڑداساں
نظراں دائدھ جام پلا کے ماہڑا ہوش پھلایا سی
ایہہ رُسے دی عادت تیری، ہور منانا اوہ ماہڑا!
گل گل دے بچ، پل پل جاناں، تہہ کتنا تڑپایا سی
رونا ساری عمراں دا اُس، ماہڑی قسمت بچ لکھیا
پچھلے وقاں بچ میں جس کو ہر پل خوب ہسایا سی
لٹ لئی ماہڑے پیار دی دنیا، چار دناں دے ساتھی سُن
میں تاں ساری جنڈی اسدے قدماں بچ رکھ آیا سی
ناگن والی خصلت دیکھی، ہک 'شرمیلی' صورت دی
یارب! ایہہ نورانی فتنہ تہہ کہہ جان کے چایا سی؟
دُبدی کشتی ویکھ کے ساحل! لوکاں دی، کے غم کھاناواں
جدھ میں پھسیا لہراں اندر، کون مرے ول آیا سی؟





پھل چمن دے چُن گیا انسان یارو! کہنہ کراں
دل دی دنیاں ہوگئی ویران یارو! کہنہ کراں؟
روز اُنڈے دو نویں یاراں دا سندے ہاں پتہ
ہر کسے سنگ اندی ہے پہچان یارو! کہنہ کراں؟
خون اپنا دے کے جس کو میں بچایا سی کدیں
اج اوہ ماہری کہن گیا ہے جان یارو! کہنہ کراں
تاجِ الفت لٹ گیا، ویران ہے دل دا محل!
چھوڑ نہیہ سکدا میں اپنی شان یارو! کہنہ کراں
رقصِ گل، بلبل دے نغے، مشکِ عنبر سی جتھا
اج اُسے جاء جنگ ہے گھمسان یارو! کہنہ کراں
چار دن دی دوستی ہووے عمر پُہر دا درد و غم
زندگی تے لگ گیا تاوان یارو! کہنہ کراں
دل کو ساعِل! دے سکے آرام، اوہ جاء نا لہی
بنھ کُہدا ہے آخری سامان یارو! کہنہ کراں!





گورے گورے، پیارے مکھڑے، کہہ اُندی اوقات!
باہروں دسدا چائن یارو! اندروں کالی رات
مہر و محبت، پیار و فاء دے بدلے اجکل کہہ ملدا؟
دُئیاں اکھیاں، ہوٹھاں دی تریہہ، ہنجواں دی برسات!
بے شرماں دی اُس محفل بچ، کون سی ماہڑا میت، بجن
اُتنے کالے کرم انہاں دے، جتنی اُچی ذات!
نورِ نظر ہے کون کسے دا، کون کسے دا دل جانی
بوہتے دور حقیقت کولوں لگدے ایہہ کلمات
ارماناں دے کندے چُن چُن ایہہ گلزار سجایا میں
زخماں دی پھلواڑی، سوہنے دلبر دی سوغات!
گجدے رہے دریا پے یارو! موجاں اٹھ اٹھ چور ہوئیاں
ساحل سنگ ٹکرا کے کھاہی طوفاناں سُن مات!





دینہیہ دُبیاتہ آس بھی مک گئی، لونجھ گئی میخانے دی
تک تک رستہ اکھ بھی چٹی ہوگئی ہک دیوانے دی
پہلیا جھڑا پیار اساڑا، اس معشوق دا کے آکھاں
غزلاں، گیتاں دا اوہ مرکز، اوہ آواز ترانے دی
پیار، محبت دے سودے بچ دیکھ مڑا کے حال ہويا
ماہڑے اُپر انگلی اٹھدی ہر اپنے بیگانے دی
کُہاٹے بچ بیوپار نا پیندا، لال نا مکدے ساگر دے
بس ہک واری سُدھ لے آندے جے ساحل مرجانے دی!

ولی واڑگاندریل بچ مرحوم شوکت علی (شہید) دے دولت خانے

تے جنوری ۱۹۸۸ء بچ لکھی گئی.... ساحل





طوفاناں سُن گلیاں ملیاں، پھر بھی دلبر آسی گا
جان تلی تے رکھ کے ٹری، قول، قرار نبھاسی گا
ماہڑا، اسدے نال ہے یارو! پاک محبت دا رشتہ
چھوڑ کے دنیا، دولت، بنگلے، اپنی میت بناسی گا
کنڈیاں دے بچ باہ کے جہڑا جندڑی ماہڑی چھوڑ گیا
پھلاں سنگ اوہ مرقد ماہڑا ہک دن آپ سجاسی گا
ہور کسے سنگ لا کے یاری، جے اس کیتی غداری!
ماہڑے اندر دا ہک شاعر، اُس سعتی مرجاسی گا
مست شراباں کئہن کے ماہڑا ساقی محفل بچ آیا
اکھیاں تھیں چھلکاسی یارو! ہوٹھاں نال پلاسی گا!
ظلم و ستم ہور رُسنا اپنا شائد اوہ پُہل جاوے بھی
ماہڑی محبت، ماہڑا منانا، اوہ کس حال پُہلاسی گا!
کہنہ کہنہ اڑیاں باہیاں راہ بچ برفاں، پہاڑاں، دریاواں
میں چُپ رہ کے سندار ہساں، اوہ جدھ حال سناسی گا
ساحل! جدھ میں پُہر قعہ چاساں اپنے پیارے دلبر دا
دنیاں دکھسی، اس کو دکھ کے، دینہیہ، چن بھی شرماسی گا



لکھاں سوال ماہڑے، بس ہک جواب دے توں
سنسار ماہڑا چا کھن، اپنا شباب دے توں
غیراں دے نال نا بند ماہڑی خوشی کو جا کے
منظور ہر سزا ہے، نہ ایہہ عذاب دے توں
اُلفت دے فلسفے تھیں محروم رہ نہ جانواں
صورت تڑی میں پڑھساں، بس ایہہ کتاب دے توں
کرسی گلاں ہوا سنگ، تقدیر دی سواری
باگاں ہتھاں دے بچ ہین، پیراں رکاب دے توں
کنڈیاں پہرے دے رستے، اُلفت دی دور منزل
یارب میں تھک نا جانواں، ہک صبر و تاب دے توں
تھک، ٹٹ کے ہجر و غم بچ، قربت ملی ہے تھوڑی
نظراں ملا کے دلبر! تھوڑی شراب دے توں
تنگ آگیاں میں ساحل! شہراں دے شور و غل تھیں
صحراء دی خموشی بچ پھر ہک سراب دے توں!





نکی جندڑی، لمی جُدائی، ربا! جان اُپر بن آئی
مَنگیاں ساہواں دین دہائی، ربا جان اُپر بن آئی
ارماناں دے ٹہیرے مُک گئے، اکھیاں بچوں اتھروں سُک گئے
پھر کدھ ملسی اوہ چن ماہی؟ ربا جان اُپر بن آئی
بجھ گئی شمع، اُٹھ گئی محفل، قید بچوں نہ چھٹیا ایہہ دل
ہُن تہ عنایت کردے رہائی، ربا! جان اُپر بن آئی
بلبل سُن پیغام سنایا، کوئل سُن دل مچ تڑفایا
کونج فراقاں بچ گُرائی، ربا جان اُپر بن آئی
گیاں سیالاں، آئی بہار، دل بچ بچ پئے سُتے
ساحل پھسیا بچ تنہائی، ربا جان اُپر بن آئی





غلطی نال میں لا لئی یارو! یاری نال کھجور
تہپ لگدی تہ چھاں نہیہ لبھدی، پہکھ لگدی پھل دور
نا پچھتانا، نا کرلانا، نا شکوے، نا طعنے
قسماں کھا کھا تھو کھے دینا، دنیاں دا دستور
تُسدی اس محفل بچ آکے، کہہ آکھاں میں، کہہ لبھیا
تہرکن دل دی، جان جسم دی، اکھیاں والا نور
کہہ لکھاں سرناواں یارو! میں اج کل دی ناری دا
پنڈا ننگا، کہہ کہہ پھردی، پوڈر والی حور
عاشق لے گئے پھر پھر دامن، کل اُس دے دربار بچوں
ماہری قسمت، ماہری چھولی، نہ بٹا نہ بور!
اکھاں ٹوٹ کے، ہنھیرے دے بچ مارے گئے، بٹے میں
ارماناں دے شیش محل ہوئے اپنے ہتھوں چور
دریا گجے، کٹھے بگدے، ہجراں دا ہاڑا چڑھیا
ہک دل تُسدا، ہک دل میرا، ملنے تھیں مجبور

ماہڑے لئی ہُن ڈھول نا اتھروں، نا ہُن بد دعائیاں دے
دو دل بچھڑے، رب دی مرضی، ماہڑا دس قصور
یاراں دتے لکھاں تھے، سینے بچ سمبھالے سب !
گجھ بن گئے پھل تارے ساحل! گجھ بن گئے ناسور



(ڈسٹرکٹ جیل امپھلہ جموں)



ماہڑے پچھے، ماہڑے نغمے، رو رو گا سی ایہہ دنیا
جدھ میں ٹریا اس دنیاں تھیں، مچ پچھتاسی ایہہ دنیا
اج فریاداں، چیچاں، کواں کوئی نیہہ سندا ہے، پھر بھی
جس دن میں خاموش ہو یاں، مچ شور مچاسی ایہہ دنیا
وعدے، قسماں کردی ہے، پر نال کسے دے نہینہ ٹردی
مہر و وفاء تھیں نا محرم، کہہ توڑ نبھاسی ایہہ دنیا
میں درویش، فقیراں واہنگوں در در پھر کے دکھ آیاں
ماہڑے تھیں بھی مچ ترہائی، پہکھی، پیاسی ایہہ دنیا

زخماں، ٹکراں سینے لاکے، ٹردیں، ٹردیں پے گئی شام
 کاش کدیں بند لیوے تھوڑا، درد، اُداسی ایہہ دنیا
 تک لے پیارے، پیارے منظر، ہنس لے، گالے چار کھڑی
 ہک واری بے ٹرگئی رُس کے، پھر کدھ آسی ایہہ دنیا
 کتنا چر کرنی ہے یارو! ہور غلامی لوکاں دی؟
 کتنا چر معصوم دلاں تے تیر چلاسی ایہہ دنیا
 ہُن اکھیاں دے آکھے لگ کے تازہ تہو کھا نہیہ کھانا
 مچ تکیا بے درد زمانہ، تک لئی خاصی ایہہ دنیا
 اپنے پیار دے اس رشتے دا ذکر نہ کدھرے کر چھوڑیں
 کھر کھر شور ڈھنڈورا پاندے، لوک، مراسی، ایہہ دنیا
 مدت ہوگئی باہنواں کھول کے، راہواں دے بچ بیٹھا ہاں
 ہک نا ہک دن ساحل کو بھی سینے لاسی ایہہ دنیاں





عاقل تے نادان بنائے اللہ نے
رنگ رنگ دے انسان بنائے اللہ نے
ابو جہل، نمرود کدیں، فرعون کدیں
کتنے نافرمان بنائے اللہ نے!
تیرا میرا رشتہ دنیا کہہ جانے
دو بت ہو رہک جان بنائے اللہ نے
کچھ مردے، کچھ مار مکاندے ہوراں کو
لاغر ہو رہ بلوان بنائے اللہ نے
جتھا مرضی، اُتھا اپنی لا بستی
ست زمیاں، اسمان بنائے اللہ نے
میں ترہایا، توں ہک ٹھنڈی شربت ہیں
صحراء، نخلستان بنائے اللہ نے
پیار دے سیلانی اکثر پھل جان دے ہین
کچھ رستے سنسان بنائے اللہ نے

میل، جدائیاں، کر کے پیدا عاشق لئی
لذت دے سامان بنائے اللہ نے
لڑا رہساں حق دی خاطر میں ساحل!
مرداں لئی میدان بنائے اللہ نے!



قدم، قدم چالاک بھبھوئے، جالاں بچ نا پھس جانی!
دوروں لگدے مور تہ پکھنوں، اصلی ایہہ کرگس جانی!
ہیرے کو ہیرا کپدا ہے، لوہا کپدا لوہے کو
تیرے ناں دی اک سینے بچ، کون بھاوے، دس جانی!
پڑھ، پڑھ تسبیح ہار گیاں، تدبیراں کر کرٹ چلیاں
پر نہ ایہہ مٹی دا باوا، ٹس تھیں ہو یا مس جانی
گل، گلشن تے بلبلی تیری خاموشی تے نالاں ہین
نازک ہوٹھاں کو دے حرکت، کہول کناں بچ رس جانی!
تدھ اوہ اکھ دا تیر پتہ نہیہ کھیڑے زہر بھجایا سی
یاد تیری دے نال ہی اج وی دکھدی ہے نس نس جانی!

بانہواں دے کہیرے بچ لے کے کراچ اتنا پیار مگو
 میں خوش ہو کے آپے آکھاں بس جانی! ہن بس جانی!
 نا پھر قبرستاناں اندر، اپنے دل بچ ٹھونڈ مگو
 مڑ آیاں میں چھوڑ کے جنت، تیرے لئی واپس جانی!
 دل بچ رہ کے، تیرے دل دے حال تھیں میں بیگانہ نہیہ
 باہروں رونی شکل بنا کے، بُکلاں بچ نہ ہس جانی!
 دل دا دامن پیار تیرے نے نہ چھڈیا ہک پل ساحل!
 پیارٹوا میں مول نہ پہلیا، میں کہیتے سو وس جانی!



کوئی چھانواں کہ کوئی لو، بلندی بچ کہ پستی بچ!
 میں تنہاء ہونہیں سکدا، کوئی شامل ہے ہستی بچ
 کہیڑا دیسی ضمانت ہُن اُنہاں اگلے جہاناں دی؟
 خدا کو پھل کے، ڈھل گئے ہاں اسی بندہ پرستی بچ
 میں اکثر دین داری ویکھ کے بچیاں دی روند اہاں
 جنازہ کون پڑھسی، کون ہے غسال بستی بچ...؟
 اوہ تنہاء شخص ہی آخر عیادت کو ماہری آیا!
 میں پچھلے موڑ تے جس کو بسا ر آیا ساں مستی بچ

تُساڑے عشق دی لذت نہ ساحل! پھر کدیں دیکھی
میں مٹھی بچ، نہ کوڑی بچ، نہ مہنگی بچ، نہ سستی بچ!



نہ رستہ، نہ منزل، ہر سو پک گھنگور ہنیری
کس مشکل بچ جان پھنسا دتی رب سوہنے میری
کالی، ڈھونگی غار دا کوئی نہیہ لبھدا دروازہ
انھے وانگوں تہکے کھاندا پھر دا چار، چو فیری
سر نیواں کر سجدہ کرنا، منگنا فرض ہے میرا
یارب! میں کدھ منگیاں ایہہ ہتھ کڑیاں، کورٹ، کچھیری!
دوپل دے مہمان، مسافر! نہ دل اتھے لاویں
دنیا ہے دنیا والے دی، نا تیری، نا میری
برزخ دے عالم بچ کس کو کدھ تک رکھسیں ربا!
ماس بدن دا کھا گئے کیڑے، رہ گئی ہڈ دی ٹہیری
اُچیاں کندھاں قبر دیاں تہ بے انصاف د دروغہ!
رو رو آگئی جان بلاں تے، نہ لا اتنی دیری!

رستہ دتا ڈھونگے ساگر، پار پہچایا موجاں سُن
ساحل تے جد پو ہچی کشتی، تیز ہواواں کھیری



قسمت دا افسانہ لکھن آ لے دا کہہ کہنا
گجھ دے لیکھاں بچ کن خالی، کجھ دی قسمت گہنا
تروڑ، مٹاکہ کٹھے باہ دے توں دنیاوی رسماں
آگئی رُت ملاقاتاں دی، ہُن وکھرے نہیہ رہنا
دل دا حال میں کسراں دساں موبائل دے ذریعے!
فرصت نال چناراں والی چھاں بچ کدھرے بہنا
کیوں پنجرے بچ باہ کے اسراں لائیاں ایہہ زنجیراں؟
نہ میں ہاتھی، شیر درندہ، نہ کوئی طوطا، مینا
وصل دی شب بچ پھر پھر جھیراں پیش کرے پیمانے
ہر نیزہ اُس پیاری اکھ دا خاموشی سنگ سہنا
مکاری تہ بے ایمانی نے گھر گھر لائے ڈیرے
جس کو دل چا دتا، کدھرے اوہ بے ایمان ہوئے نا

سُود، منافع، طمع، لالچ معاف نہیہ کردا اللہ
 نا دل دے بازاروں لنگھنا، نا لینا، نا دینا!
 یار دے لب، دو باغ گلابی، یا دو سوہے موتی!
 نا شکوہ، نا شور، شکایت، نا کوئی طعنہ، مہنا!
 اے ساحل! نادان مسافر! لٹ، پُٹ کے رہ جاسیں گا
 نگری چور، قزاقاں دی بچ چھڈ دے اینا، گینا



یاداں دی ہک کوئج نے لایا دل دی ڈال بسیرا وے
 ہجراں والی رات دے سینے بچ پُر نور سویرا وے
 لگ، چھپ کر دے ہک ساتھی دے بارے بچ میں کہہ آکھاں
 عمراں بچ نہ اپنا بنیا، ہُن کدھ بنسی میرا وے
 چار پُوفیری اج باغاں بچ آئیاں مست بہاراں ہین
 نا رُس، نا تڑپا پردیسی! لا وطنان کو پھیرا وے
 توں، ہور تیرے پیار دی قیمت، ایہہ جگ والے کہہ جانن
 توں اکھیاں دا چن، ستارہ، تیرے ہاتھ ہنیرا وے

نا افسوس، پشیمانی ہو، نا غم ہے لٹ جاؤں دا
 دل اکھیاں کو پیارا لگدا، ہک رہن، لُٹیرا دے
 مکڑی جہنی ہک جندڑی دے بچ لالچ، طمع کہہ کرنا
 کس کم دے ایہہ محل، چُبارے، تیرا پیار بہتیرا دے
 تلواراں ہوں نیزے کہن کے دشمن آسِر چڑھیا ہے
 منگ دعاء ہتھ چا کے ٹٹے درداں والا کھیرا دے
 ہک واری کھر آجا ساحل! قسم خدا دی رکھ دیاں
 تیرے قدماں پٹھ کنوارے ارماناں دا ٹھیرا دے



کل آغاز میں کیتا جس دا، اڄ مک جاسی اوہ افسانہ
 اڄ دی شب نا نیندر آوے، کر کوئی حیلہ، جتن بہانہ!
 لمیاں راتاں دا جگراتا، اکھیاں دے بچ ریت اڑکدی
 رکھ لے ماہر آسِر چھو لی بچ، گا کوئی لوری، گیت، ترانہ
 'دل دے باز ارون نہیہ لنگھنا' یاراں مچ سمجھایا سی
 ہاری بازی تے کہہ رونا، کہہ ہتھ ملنا، پچھتانا!
 اس پنجرے بچ روندیں، روندیں مک گئے اتھروں اکھیاں دے
 اللہ جانے کس حالت بچ ہوسی ماہری شاخ، ٹھکانہ!

اج دی راتی واہنگ مسافر بزم توہری بچ میں آ بیٹھا
کل چھڈ کے ہڈ، ماس دی ٹھیری اڈ جاسی گا ایہہ پروانہ
ہستی اپنی چھوڑ کے سارے، بستی تھیں ٹر گیندے ہین
ہک نہ ہک دن مُک ہی گیندا ہے ہر کس دا پانی، دانہ
چاء ہُن پردہ رُخ سوہنے تھیں، سب درداں تھیں دے چھٹکارا
جان لبائے آپو ہچی ہے، ادھ مویاں کو کہہ تڑفانا!
اڈھ گئی نیندر پکھنوں بن کے، اکھیاں دے میدانوں ساحل!
سرگئی چین، سکون دی بستی، باقی رہ گیا ہک ویرانہ





شیشے بچ مکھ اپنا تکیا
ہک ترہایا دریا تکیا
آیا ماہڑا دل جس اُپر
غیراں دے سنگ جلد تکیا
روندیں یارو! تک ہسدا سی
اج میں اوہ گُزلاندا تکیا
رانجھے، مجنوں دی کُہہ ہستی
ہک جوگی، ہک منگتا تکیا
اس منڈی بچ پیار دا رشتہ
میں ہر شے تھیں سستا تکیا
'ساحل' آپ کو اوہ کہندا سی
میں اکھیاں بچ دُبا تکیا





ہولیں جے مسکا گئے ربا!
ہک بجلی چمکا گئے ربا!
میں داکھاں دا باغ سی لایا
کمر کدھروں آگئے ربا!
درد، جدائیاں، ہجر، وچھوڑے
جان ماہڑی کو کھا گئے ربا!
آکھاں کس کو، دساں کس کو
تن، من اگ تہنکھا گئے ربا!
اج ہک شکوہ میں ناکرساں
شکر ہے مُڑ کے آگئے ربا!
چنول ماہڑی بچ ہک پل بہہ کے
سُتے پہاگ جگا گئے ربا!
جد میں پچھیا تُس ماہڑے ہو؟
اوہ ہس کہہ شرما گئے ربا!

آپے دریا، آپے ساحل
بیڑی پار لگا گئے ربا!



ساون دی رت بچ نکھڑے ساں، اج پھر ساون آیا ہے
ایہہ موسم ناراض د لاں کو پھیر ملاون آیا ہے
سجری خوشبو واہنگ مکو اوہ کل ساہواں بچ رکھدا سی
اج اوہ ماہڑی چھلنی، چھلنی لاش کو چاون آیا ہے
تیر تفنگاں، نشتر، خنجر ہتھ بچ کہن کے پھر دا ہے
لگدا ہے ماہڑے زخماں تے، مرہم لاون آیا ہے
نیواں کر کے سر تہ گم سُم سنگ سنگ ماہڑے رُدا ہے
شائد اپنی پچھلی غلطی تے پچھتاون آیا ہے
ہتھاں بچ پھل لے کے ماہڑے قبر سرہانے آبیٹھا
اوہ بھی ہک انسان ہے آخر، ریت نبھاون آیا ہے
اج تھیں پچھے سنکناں، سکھیاں رو رو کرسن یاد مکو
ہک پردیسی ساجن اپنے دیس پُچاون آیا ہے

ہاسے کو اوہ پیار دا نیوتا جان کے رستہ پھٹل بیٹھا
 سدھا، سادہ، پھولا مجنوں، تھوکھا کھاؤن آیا ہے
 چن دُیا ہو رات بھی مک گئی، حالیں او مسکاندا ہے
 کل تک میں شرمندی ساں، اج اوہ شرمون آیا ہے
 کلیاں سکیاں، خوشبو مک گئی، اُس کو بہاراں یاد آئیاں
 ہک جوگن، دکھیری دے سنگ، یاری لاؤن آیا ہے
 ساحل سُن پھر چھیڑ دتی اج ساز دی گل، آواز دی گل
 سجرے سجرے نغے کہن کے کس کو نچاؤن آیا ہے؟



اندرو اندر، غم دا سمندر، خوش میں بظاہر لگدا ہاں
 دور ہاں کُہر تھیں، دُور وطن تھیں، صاف مہاجر لگدا ہاں
 قید و قفس کو تروڑ، مٹا کے اس صحراء بچ لاواں اگ
 دل بچ عزم، ارادہ ہے پر عمل تھیں قاصر لگدا ہاں
 میں اپنے مچ ناں رکھ لے پر کوئی تُساں کو نا چیا
 نہ مجنوں، فرہاد، نہ راجھا، توں دس میں کہہ لگدا ہاں؟

بازاراں بچ مہر و وفاء دی کہہ قیمت ہے، رب جانے
 نا کچھ کدھرے بچ بٹایا، نا کوئی تاجر لگدا ہاں
 شاید کدھرے مل جانواں میں، شاید تئس پہچان کہنو
 بستی بستی پھردا ہاں، درویش، مسافر لگدا ہاں!
 'واہ واہ' تہ ارشاد چہئے کچھ بول تہ میں بھی سندا ہاں
 شعر و ادب تھیں نا واقف، بس شکلوں شاعر لگدا ہاں
 گم ہاں اپنی ذات دے اندر ہور جہاں تھیں پوشیدہ!
 اپنی ذات تھیں کہہ آکھاں میں، کتنا متاثر لگدا ہاں
 ماہڑا ناں لے لے کے اکثر اوہ کس کوڑ پاندے ہین؟
 یا پھر اس کو ہر محفل بچ آپ میں حاضر لگدا ہاں!
 رب جانے! کہہ سوچ کے ساحل دوڑ ماہڑے تھیں نسدا ہے!
 تئس آکھو، میں شکلوں کوئی ظالم، جابر لگدا ہاں؟





اگ برساون آلی قاتل اکھ، انگوری ہوسکدی ہے
سہل سفر تہ روشن رستہ، منزل نوری ہوسکدی ہے
پیار محبت دے قانوناں پنج ہُن نرمی بھی ہوگئی
اج پکڑے گئے ہور ضمانت کل عبوری ہوسکدی ہے
چوری، چوری سنگنے! ماہڑے خط چاکے نہ پڑھیا کر
راز کوئی محبوب دا یا پھر گل ضروری ہوسکدی ہے!
دو جہماں کو وکھرا کر کے جنڈرا مار تہ پہرہ لا!
دور روحاں پنج کدھ کوئی پینڈا، کدھ کوئی دُوری ہوسکدی ہے
نا خط نا پیغام چلایا، نا خود ملیا، اس پنج بھی
گجھ مقصد، گجھ مطلب یا پھر گجھ مجبوری ہوسکدی ہے
بس ہک واری دس دے ربا! میں ہور ماہڑی قسمت پنج
دُدھ، مکھناں پنج اُس دے ہتھ دی گئی چوری ہوسکدی ہے؟
اس شردے دے موسم پنج بھی بس ہک واری مل جاتوں
شام گلابی ، دن مستانہ، شب سندوری ہوسکدی ہے
وصلاں دی شب ہووے تاں پھر وعدے پُجھدے رہندے ہین
لب پیمانے بن سکدے ہین، اکھ مخموری ہوسکدی ہے!

ضد اپنی جے توں تچ دیویں، تھرتی، امبر مل سکدے ہین
ہر فرمائش ہک پل دے بچ ساحل! پوری ہوسکدی ہے۔



ہک ٹھوس حقیقت دے بدلے۔ ہک خواب ادھورا دیندے ہین
ہتھ لان نہیہ دیندے زیور کو، دوروں لشکارا دیندے ہین
محبوب میرے دے دامن تے ناداغ لہودے ٹھونڈو جی!
اوہ آپ جے کم نہیہ کردے، ہوراں کو اشارہ دیندے ہین
میں زخماں دی ملہم کوئی، کل کول طبیبوں منگی سی
پُر جوش ادا سنگ چمٹے بچ پہنکھدا انگارا دیندے ہین
ہتھ بلیاں اُپر رکھدے ہور سر نیواں کر کے گل کردے
مُسکان اُنہاں دی ہائے اللہ! احسان اُدھارا دیندے ہین
میں جیکر اُندی ہر شے تھیں انمول کوئی شے منگدا ہاں
خوش ہو کے ہتھ ماہڑے اپنا ہتھ کنوارا دیندے ہین
'نقص امن' دے خطرے دا احساس حسیناں کو ہے، تاں
آپ چُبارے تے چڑھ کے کیوں روز نظارہ دیندے ہین؟
ماہڑی کالی شب دا ہے احساس اُنہاں کو بھی شائد!

اپنی جبین دے اسمانوں کدھ ہک چن، تارا دیندے ہین!
مقبول تھیں کل کوئی پچھد اسی 'کیوں ساحل تے آ بیٹھے ہو؟'
'تردے کو کنارہ دسدے اوہ، ڈبدے کو سہارا دیندے ہین'



سر نیواں کر کے منٹاں کر، ہتھ مہندی والے جوڑ سکھی!
نا آدٹم واہنگوں کر غلطی، نا کھر ساجن دا چھوڑ سکھی!
میں ملساں مست بہاراں بچ، پھل دامن دے چا دیویں توں
توں آساون بچ کھر ماہڑے، تحفے بچ دیساں خوڑ سکھی!
تصدیق اگر نا ہووے تاں تکمیل نہیہ ایماں دی ہوندی
ایہہ پاک ٹھکانہ ہے رب دا، توں دل نا کسے داتروڑ سکھی!
پچھتانا، رونا چھوڑ کے توں، پہنل جا اوہ لاٹاں، لشکارے
ہنج چک لیدے، سب کھا جاندا، نالال گواچے لوڑ سکھی!
دُب جاندا ہک، ہک تر جاندا، ہک ہس ہس سولی چڑھ جاندا
ایہہ عشق دا رستہ نہیہ سوکھا، ہر سعتی اوکھا موڑ سکھی!

اس محفل بچ بہہ کے ہک پل، گجھ کہنا، سُنتا مُشکل ہے
 چُھوٹھا لوکاں کو گُڑ لگدا، سچ لگدا کوڑم کوڑ سکھی!
 رستے بچ دریا، طوفاں ہین، ایہہ عمر دا میلا دوستی!
 ساحل دا سفر ہے دُور بڑا، توں چھوہلا، چھوہلا دوڑ سکھی!



ٹھونڈاں اُس کو محفل، محفل، میں تہ مرا دیوانہ دل
 ہک رستہ ہے ہور ہک منزل، ہک مقصد ہے ہور ہک حاصل
 دل تڑپا، اوہ بھی ماہڑا سی، سرکٹیا، اوہ بھی ماہڑا سی
 ہور مڑمڑ کہندے یار! کلو اوہ ظالم، جابر ہور قاتل!
 جیتی بازی کو ہر جانا ہور تڑپ تڑپ کے مَر جانا
 کہہ کر بھی سکدا ہے آخر ہک تیر نظر کھا کہہ بسل!
 ہے خون بھی ماہڑا، دامن بھی، مقتول بھی میں، جیہڑا ہی سزا
 ہے کتنا نرالا عدل ترا ہور کتنا نرالا توں عادل!
 اُس پار اُڈیکے ہک دلبر ہور رستے بچ کتنے ساگر!
 ہر گام تے دستک پئی دیندی ہے ہک آسانی، سو مشکل

اس تیرے دل تک پوچھن دے میں جتن، ارادے مچ کیتے
 ناکام ہوياں سب تدبیراں ہور ہر کوشش سی لا حاصل
 ہک وار مکو بھی دے موقعہ توں تھوڑا اپنی خدمت دا
 سکھ اپنا، اپنے جوگا، دکھ اپنے بچ تاں کر شامل!
 ہُن کون تروڑے زنجیراں ہور کون ملاوے تقدیراں؟
 اوہ ہے ہک موج سمندر دی، میں ہاں ہک دریا دا ساحل



لماں پنیڈا، ٹُر، ٹُر تھکدے، ہٹدے رہے
 رشتے ناٹے راہ بچ جودے، تڑدے رہے
 پیٹ دے چلھے، نفس دی اگ بجھاون لئی
 ہالی اگے داندیاں واہنگوں جڈدے رہے
 نہ دُنیا دی خیر ہوئی، نا رب لہیا
 اپنے ہی پرچھانویں کچھے چھٹدے رہے

غیراں سُن مَچُ مان دتا، ایوان دتے
 سنگھی، ساتھی، کھوہ بچ چا چا سُدے رہے
 کُہہ کرنا سی ماہڑے زخماں دا ملماں؟
 مر کے بھی اوہ لاش ماہڑی کو کُٹدے رہے
 درد مرے بچ ساتھ نبھایا یاراں سُن
 سر دے پہانے گل بھی ماہڑا کُٹدے رہے
 کس نے ہاڑے بچ بچائی ماہڑی جان
 ساحل ! دوروں بیٹھ نظارہ لُٹدے رہے



عشق تو ہڑے دے صدقے ہو یا خالی دل آنگن ماہڑا
 اپنی پرواہ کر اوہ ناداں! توں پہاویں نہ بن ماہڑا
 نہ بابا، نہ اماں کدھرے، نہ کوئی پہنیں، پہرا دسدا
 سعدے کھیڑے دی بستی بچ ہر کوئی ہے دشمن ماہڑا
 لکراں دے باغیچے بچ کیوں کُہر ماہڑا بنوایا سی؟
 زخمی، زخمی ہو گیا بچناں! نازک تن ہو رمن ماہڑا

کالے جنگل واہنگوں زلفاں، چاندی چاندی ہوئیاں نے
 یا تَدھ ڈاہڈ چر لایا، یا چھوٹھا ہے درپن ماہڑا
 تیرے وصل دیاں یاداں کو، کتنی دیر سمبھالاں میں
 تیرے ہجر دیاں کنڈیاں نے پاڑ دتا دامن ماہڑا
 سو، سوشکل بنائی اپنی، اُسدی ہک مسکان دے لئی
 یاد کسے کو آندا ہوسی اوہ دیوانہ پن ماہڑا
 چھوٹھے خواباں دی ہک بستی واہنگوں خالی خالی سی
 دل ماہڑا لٹ کہہ پچھتانا ہوسی اوہ رہن ماہڑا
 کہہ ہوسن حالات شریکاں ہو ررقیباں دے اس دن
 چھوڑ کہہ ہر پردیس تہ سوکن، کھر آسی ساجن ماہڑا
 روح اڈ جاسی، جسم مڑا قبراں دے کیڑے کھا جاسن
 زندہ رہسی پھر بھی ساحل! صدیاں صدیاں فن ماہڑا



میں بن جانواں کھٹی املی، توں بن جا مٹھا شکر
ہک دوجے دے نیڑے نیڑے رہن دی بس ایہہ صورت ہے
کھول دے سینے دا ہر تالا، دل تھیں اج ہر پردہ چاء
بے خوف و بے پرواہ ہوکے، کہہ دے 'پیار ضرورت ہے'
شائد اُس کو بھی اج کجھ کجھ ہے احساس جدائی دا
چہرے تے مسکان تہ ہے پر، دل بچ صاف کدورت ہے
بس ہک واری نظراں لڑیاں، شوخ بہارن بول اُٹھی
”لاج لگے ہے بانکے چھورے! ایسن کاہے گھورت ہے“
ٹھونڈ نا ملاں، پنڈت ساحل! رشتے دل دے جوڑن لئی
ہر سعتی ہک نیک شگن، ہر موقعہ نیک مہورت ہے!



تیرا حُسن چنِ مکمل، تیری ہر ادا کٹاری
 میری جان، جانِ جاناں؟ تیرے درد و غم دی ماری
 تُوئے ظلم دا فسانہ، میں سُنانواں کس کو جا کے؟
 ماہڑے شہر دے دروغے، تُوئے حُسن دے پُجاری
 تھک، ہار کے جہاں تھیں، آیا ہاں کول تیرے
 لگ جا توں ماہڑے سینے، اج بانہہ میں پساری!
 اُچے عرش تھیں خدایا! کوئی پُہنچ دے مسیاء
 ماہڑے سر تے باز بیٹھا، پیراں تلے شکاری
 رکھ دُور برق و باراں، دُکھ، درد، غم تہ ہاڑے
 کہ کلی فقیر دی بچ ہر چیز ہے اُدھاری
 ماہڑے یار! جس خوشی بچ دس جشن تَدھ منائے
 تُوئے واسطے اوہ بازی، اساں جان کے سی ہاری
 کدے کول تیرے بہہ کے تلو درد و غم سُنایا
 کدے چہول اپنی لے کے تُوئی زلف بھی سنواری
 ماہڑی داستانِ غم دا توں کہجا یقین کرسیں!
 تُوئے شہر کس نے تکیا ماہڑا درد، آہ و زاری

مایوس ہیں بڑے اج ماہڑے طیب ساحل!
مکو چھوڑ سی نہیہ شاید توہڑے عشق دی ہماری!



ہک ہک نخرہ قاتل اُس دا، ہک ہک روم نشیلا سی
جتنا سوہنا، جتنا پیارا، اتنا ہی شرمیلا سی!
تیری صحبت دی برکت میں کٹیا اوہ سنسان سفر
تھہ پنج سی ہک ہتھ ریشم دا، پر رستہ نوکیلا سی
کپ کپ کے سنگلاخ پہاڑاں کو قلعے بنواندے رہے
ہولا جا ہک چھکھڑ چھلیا، وکھرا تِلا تِلا سی
قد تھیں اُچا ماہڑے واہنگوں، ٹورتھیں گویا بادِ نسیم
گالاں پنج سن ہلکے ٹوئے، مَتھا مُج چمکیلا سی!
سدھی سادھی پہولی صورت! سیرت بارے کہہ آکھاں
نہ کوئی تھوکھا، نہ کوئی پہانہ، نہ کوئی حجت، حیلا سی!

کدھ تک میں پیانہ اپنا سامبھ، سمبھالی رکھدا، دس!
 نال بڑے دل والا دلبر، موسم شوخ نشیلا سی!
 ریشم بانہواں دے کھیرے بچ آکے ایہہ احساس ہويا
 بلدی اگ دے دامن بدھیا، ہک تودہ برفیلا سی
 عشق دے مارے کجھ یاراں سُن نواں نعرہ لکھیا ہے
 'تخفے دینا، ہوٹل کھانا' ایہہ کم مچ خرچیلا سی!
 سگہ لٹ کے لیجان دے ساحل! ماہری چنگی تھیں ڈاکو
 پیراں بچ ہک خاک بچھونا، سرتے چھاتا نیلا سی!



ٹھنڈے، ٹھنڈے پھر کے ہوکے، اوہ بوہتے شرمائے سن
 اپنے آپ کو دتے تھوہکے، کتنے موقعے آئے سن
 ہک دن بہہ کے پیار، وفاء دالیکھا، جوکھا کر کہنساں
 کتنے داغ تہ زخماں دتیاں، کتنے قول نبھائے سن

کسراں کوئی پُہل سکا ہے، اپنے ظالم ماضی کو؟
 چھاویں سنگ پر چھانویں لپٹے، ساہ سنگ ساہ ٹکرائے سن
 جسم سراپا حور، پری دا انگ انگ بچ سی پہنگ نشہ
 سچی کھاڑی اُپر تل سی، پیارے پیارے پائے سن
 بدل کڑکے، کٹھے شوکے، پھیر بھی ملنا نہ چھڈیا
 دشمن ماہڑے، کھرتیرے دے سارے چاچے، تائے سن
 بچھڑ جُلّساں، نکھڑ جُلّساں، نا کر بچیاں والی ضد!
 وصل دی شب اوہ منتاں کر کر رُنے تہ گُرائے سن
 ہتھاں بچ پُھلاں دی چادر، اکھیاں بچ سن اتھروں بھی
 ماہڑے مرنے پچھے ساحل! اوہ کتنے پچھتائے سن!



ٹکسی کنہڑا مدان بچ، دنیاں ہے منتظر
 اُس پار توں ظالم ہیں تاں، اس پار میں صابر
 اُچی ہر ہک ماہلی تھیں ہے عملاں دی بلندی
 نیویں ہوئے ہر شے مگر نیواں نا ہوئے سر!

نچ نچ کے میں الفت دے نچ کیتے تو ہڑے طواف
 ناراض ہاں میں، اج میرے آ لے، دوالے پھر!
 ٹرنا تہ ماہڑا کم ساء، الزام نہ دے توں
 تڈھ ہمسفر بنے دے نچ لائی سی کییاں چر
 اُنکلاں دے نچ سمبھال کے زلفاں نہ بیس توں
 فکراں نہ کر، اس کم دے کجھ اسیں بھی ہاں ماہر
 مرضی ہے قافلے دی ماہڑے سنگ چلے اوہ
 ہک راہ ہے ہدایت دی، میں ہاں اس دا مسافر
 تہو کھا ہے تو ہڑی اکھ دے نچ ساحل دے متعلق
 حاضر کدے غائب ہے اوہ، غائب کدے حاضر!



چٹیاں، چٹیاں ماہلیاں تہ نیلے نیلے باغ
 چھیڑ دتا دل ماہڑے نے بھی ارماناں دا راگ
 زخم ہوئے شمشیر دا جیکر، مرہم لاوے کوئی
 روز قیامت تک نہیہ مٹدا ہجراں والا داغ

ویرانی تہ خاموشی دا ذکر کراں کہنہ یارو!
 رستے بچ کوئی بلبل بولی، نا کوئی کوئل، کاگ
 یار بیدردی رُسیا میں تھوں سیالے دی سردی بچ
 رو، رو کہہ بچ یاد اُسے دی گزرے پوہ تہ ماگھ
 دل ماہڑا کس سرڈا ڈٹھا، اندرو اندری تہکھیاں میں
 لوکاں ڈٹھے اکھیاں بچوں بگدے اتھروں ناگ
 کاش! تو ہڑا مزمان بناں میں، ہور پکاویں توں نعمت
 مک دی روٹی، گھی دا تڑکھ، ہور سریاں دا ساگ
 گئی غماں دی رات، صبح ہُن وِصلاں والی آئی
 کر شکرانہ رب دے اگے، ساحل! ستیا، جاگ

نوٹ: اس غزل دی تصحیح مرحوم نذیر احمد مسعودی ہوراں سال ۱۹۸۸ء دے ابتدائی ایام بچ ہٹل پنجاب لال چوک بچ کیتی
 آسی۔ اج ایہ غزل تہ موجود ہے مگر نہ ہٹل پنجاب باقی ہے ہور نا ہی مسعودی صاحب اسدے درمیان موجود ہین۔۔۔ جن
 مغفرت کرے!





پہل گئے میرا پیار محبت، غیروں دے سنگ کا کے یاری
ٹُ گئے مہاڑے ارمانا کو پھیر کے ہجر، فراق دی آری
چھوڑ گیا اوہ ساجن تنہا بچ خواباں دے شہر پہچا کے
جس دے لئی میں پہل بیٹھا ساں اپنا دین تہ دنیاں ساری
تیرے سنگ میں مل کے سبناں صدیاں لمیاں عمراں منگیاں
تیرے بن دوچھٹ دی جندڑی صدیاں تھیں بھی لگدی پہناری
یاد رہیا نہ اوہ دن بھی جدھ اکھیاں لڑیاں نال اساڑے
اوہ سعتی بھی پہل بیٹھے، شمشیر نظر جدھ دل تے ماری!
تاہنگ رہی دل میرے اندر، شام سویرے تیری سبناں!
توں کہہ جانیں، تڈھ بن کسراں رو رو کے میں جندگزاری
چھوڑی ہاں پھیلا کے بیٹھا، بن کہہ تیرے در دا جوگی
گڑھ نادے، چل زہر پلا دے دے، جان کہہ کوہک بھکاری
مانجھی بننا سہل ہے یارو! موجاں دے سنگ لڑنا مشکل
لکھاں بچوں ہک ہے ساحل! جس نے کشتی پار اتاری

☆ (۱۹۸۹ء)



متر پیارے دے ناں لائیاں، سینے بسیاں ساہواں میں
جس پاسے دا حکم اوہ کرسی، اس پاسے تڑ جانواں میں
دردِ جگر دی تپدی تھپ پنچ چھوڑ کے کہلا تڑ گیا اوہ
جس دے لئی رب کولوں منگیاں ٹھڈیاں ٹھنڈیاں چھانواں میں
اُس پردیسی دا توں نگہن کہہ جے آویں پیغام کدیں
کئی پنچ گٹ کے چوری دیساں رج رج کالے کانواں میں
رستہ ٹپ ٹپ تلپاں گلیاں، عمری دا ددینہہ نیڑے ہے
لبھ نا سکیاں سارے جگ پنچ سبناں دا پرچھانواں میں
اُچے پر بت، لمیاں راہواں گلیوں پار بلیندے ہین
اُس بستی پنچ کون ہے ماہڑا، کس دے کیتے جانواں میں؟
دل ماہڑے کو زخماں لا کے ہک چن میتھوں دور گیا
ٹہناکے، بہکاں ٹھونڈاں اُس کو، رور و گیتاں گانواں میں
پیار محبت، مہر و وفاء دا ساحل! جس پنچ چرچا ہے
لکھیا اُس صحیفے اُتے سبناں دا سرناںواں میں!





محل سی بڑا، پھر بھی ڈیرا نا ہويا
میرا اپنا ہوکے بھی میرا نا ہويا
نہایت عقیدت سی اس کو بھی ماہری
میرے درتے ہک جسدا پھیرا نا ہويا
گزرگئی جوانی تلاشِ وفاء بچ
نماشناں پیاں، پر سویرا نا ہويا
میں تن من، جہاں، دل فدا جس تے کیتے
ہويا ہر کسے دا، اوہ میرا نا ہويا
پکھاں کو کتر کے سجایا میں جس کو
گلستاں، اوہ ماہڑا بسیرا نا ہويا
اڈیکاں دی شب بچ میں ایہہ دل تھنگھیا
کدیں اس گلی بچ ہنیرا نا ہويا
پٹارے میرے بچ بڑے کہہ اوہ ساحل!
اوہ سپنی بنی، میں سپیرا نا ہويا!





وقت نماشاں دا پھر آیا، پھر آئی ہک یاد پرانی
پہل نہیہ سکدی روز قیامت تک قربت دی رات سہانی
صدے دے کے پہل جاوے آ لے یاراں دا کے شکوہ!
اوہ کہہ جان مہر، محبت، اوہ کہہ جان پریت نبھانی!
وقت جدائی والا یارو! کر تدبیراں پار لنگھانواں
ہجرتیرے دا درد مٹانواں، پڑھ، پڑھ کے آیات قرآنی
ٹرنے آ لے ٹر جان دے ہین، منزل دی جانب ہر صورت
کچھ نا سمجھے رکھ لیندے ہین اپنے دل بچ تیر نشانی
لڑکے میں دُنیاں دے سنگ ہار گیاں کھر بار تہ ساتھی
قابل داد ہے ہمت ماہری، پھیر بھی غم تھیں ہار نامانی!
بندہ ہی بیتاب ہے ورنہ، صبر دا میوہ مٹھڑا ہوندا
جھکنا پیندا حق دے اگے، کر کر کے اپنی من مانی!
بُربادی سیلاباں والی، دنیاں سُن ویکھی ہے ساحل!
کس ویکھے ایہہ زخم جگر دے، اکھیاں بچوں بگدا پانی





جے اُس کو ماہڑے مرقد سنگ تھوڑی بھی عقیدت ہو جاندی
دل والے مذہب دے اندہک ہور شریعت ہو جاندی
افسوس! محبت ماہڑی کو ازمایا نہ تُدھ مر کے بھی
رکھیا ہوندا ہتھ لاش اُپر، پھر جیندی میت ہو جاندی
اوہ جس ویلے بھی ملدا ساء، ہک عجب تماشہ ہوندا سا
میں الفت بچ مر جاند ساء، اس کوسی عداوت ہو جاندی
'تحریک محبت' ماہڑی دا جے ساتھ دتا ہوندا دلبر!
نفرت دی حکمرنی اندر ہک ہور بغاوت ہو جاندی
اس شعرو سخن دے میداں بچ، جے جنگ نالڑدا میں یارو!
نا بود ماہڑی ہستی ہوندی، بُرباد سخاوت ہو جاندی!
جے جرم، شرارت، نفرت دا اس دنیا بچ نا کھر ہوندا
بے کار وکیل و حج ہوندے، ہور بند عدالت ہو جاندی
دو چار قدم جے نال مرے، اوہ یار پیارے! توں چلدا
مقبول کو ساحل مل جاندا، منظور عبادت ہو جاندی!





مہتاب چہے مکھڑے اُتوں پردہ اٹھا کے دیکھ
نظراں ملا نظراں دے سنگ، اپنا بنا کے دیکھ
کردی ہے اثر کہہ ایہہ ماہڑے دل تہ جگر تے
توں داستاں اپنے ستم دی اج سنا کے دیکھ
میں پھل ہاں اگر، سر اُتے توں کیوں نہیں رکھدا
رستے دا جے بٹا ہاں تاں اپنا ہٹا کے دیکھ
مقبول! ہُن دنیاں دے بچ بستی بسا کے دیکھ
طوفان سارے تھم گئے، ساحل تے آ کے دیکھ



بہاراں دا موسم، قفس دے نظارے
نفس دے غماں بچ بڑے دن گزارے
مڑا جسم پھسیا اُنہاں کنڈیاں بچ
میں اپنے گلستاں جہاں سنگ سنوارے

خیالاں تہ خواہاں دا سامان بن گئے
 اوہ لگیاں، اوہ رستے، اوہ مرگاں اوہ ہمارے
 ایہہ ہجر و جدائی، دعاء، بے وفائی
 بڑے سن گناہ، مچ، نکے ہین کفارے
 دکھاوے دی شہرت، پُہلاوے دی شوکت
 ایہہ دُنیا دے تَتے، میں ٹھو کرتے مارے
 دُکھاں دے جھنکھڑ پنچ اوہ سارے نکھڑ گئے
 دلاں دے سہارے تہ اکھیاں دے تارے
 ایہہ گل، بن کے بلبل مڑے گیت گاسن
 جے سمجھن اوہ نظراں تہ رمزناں، اشارے
 کئیہ صیاد، جلاد، ظالم دروغے؟
 ایہہ حاکم دے نازک کھڈونے، بچارے
 ہوئی بے گناہی نا ساحل دی ثابت
 گواہ میں رکھے سب فلک دے ستارے!



نا اُچیاں محلاں دا لالچ، نا زمیاں، نا زر پیارے
 چھوڑ کے ساری دنیا پھڑیا، تیرا سوہنا در پیارے
 پہیلے واہنگوں اپنی روزی موہنڈے چا کے پھر داہیں
 دُنیا دے پالن ہارے دا ناں بھی چپا کر پیارے
 مومن اپنے من دا حاکم، خاموشی اس دا زیور!
 جاہل کردے شور شرابہ، چردے مچ ڈنگر پیارے
 آ، میں اج ہک راز سناواں جگ بچ جینے، مرنے دا
 غیرت دے سنگ زندہ رہنا، حق دی خاطر مر پیارے
 تیری یاری، سب تھیں پیاری، حکم تیرا ایمان مرا
 گردن نیویں ماہڑی، تیری ہر خواہش برسر پیارے
 جے کرتوں محبوب دی سچی خوشنودی دا طالب ہیں
 اکھیاں بچ رکھ صورت اُس دی، دل بچ اُس دا ڈر پیارے
 جنگل، جنگل، بستی بستی جوگی واہنگوں کہہ پھرنا!
 دلبر دی بستی بچ جنت، باقی سارا ٹر پیارے!
 فانی دُنیا دے سانچے بچ، گارے واہنگوں نیہہ رہنا
 ابدی دُنیا دی خاطر بھی تھوڑا، بوہتا سر پیارے!

پکا ، پختہ شوق ہے جیکر ساحل اُپر پہنچن دا
اپنے ہنجواں دے دریا پنج شام سویرے تر پیارے



یار پیارے دی خدمت پنج بول دو مٹھڑے بول گڑے!
ہتھ کتابِ عشق اٹھا کے ورقہ، ورقہ کھول گڑے!
کچھ نیندر، کچھ خواب سلونے ماہڑے ناویں کردے اج
دو لمحے، بیمارِ محبت کو لے اپنی چھول گڑے!
نا کوئی کھاتہ سود و زیاں دا رکھیا دل دے دفتر پنج
اپنی نفرت دے پلڑے پنج پیار نا ماہڑا تول گڑے!
عشق کسوٹی تے نہیہ لگدے چھوٹھ، دغا ہور مکاری
آپے اٹھدے سارے پردے، آپے گھلدے پول گڑے!
مُلاں قاضی، مول نہیہ لبھدے، دل دی دنیا دے اندر
اکھیاں مل جاون تاں آپے، دل پنج بجدے ٹھول گڑے
رسوائی دے کیتے یارو! میں خاموش رہیاں ور نہ!

یاد کہہ آندی اُس کو ماہڑی، یاد نہیہ اپنے قول کُڑے!
 اکھیاں بچ ہنجواں دی دولت سامبھ کے رکھنی لازم ہے
 پھکے سارے لال جواہر، ایہہ موتی انمول کُڑے!
 نازک تہ شرمیلے پنچھی، دن دو، چار جوانی دے
 اڈ گئے تاں پھر مومل نہیہ مڑ دے، ایہہ چڑیاں دے غول کُڑے
 اس ہاڑے دا نہیہ کوئی ساحل نہ کوئی حد، نہ سرحد ہے...
 چھیڑ نا مسکیناں دے دل کو، نا رُنیاں کو رول کُڑے!



کوچہ کوچہ خوشبو کھلری، ہر قریہ گلپوش ہويا
 تیری آمد دی مستی بچ موسم بھی مے نوش ہويا
 رورو کے بیہوش ہويا میں، اوہ خوش ہو کے کہن لگے
 اج دیوانے کو چین آیا، اج پگلا خاموش ہويا!
 اپنی محفل تھیں بیگانہ، پھر دا ہے مے خانے بچ
 اکھ ماہڑی دی پی کے یارو! ساقی بھی مدہوش ہويا
 محفل محفل گجھ دیوانے شور مچاندے پھر دے سن

ہک مکھڑے تھیں پردہ اٹھیا، ٹھنڈا سارا جوش ہویا
 سارے کفنی چوراں کو اج ہک ڈھونگی مسکان ملی
 اس بستی دا ہک داروغہ اج کفن بردوش ہویا!
 نا ممکن کو بھی اج ممکن شہر دے منصف سُن کیتا!
 خود مقتول کو قاتل لکھیا، ہور قاتل ’نردوش‘ ہویا!
 قرب تڑے دے صدقے ساحل! دشمن بستی بن گئی سی
 چھوڑ کے اپنا گلشن، بلبل جنگل بچ روپوش ہویا!



چلو اہل گلشن! چمن دے سفر کو
 صبح ہوگئی ہے، پھلاں دی خبر لو
 چنواٹھ کے کنڈے، سجاو ایہہ رستے
 ٹرن بچ بے راحت ملے ہر بشر کو
 صبح ہوگئی ہُن ایہہ نیندر نہیہ لازم!
 میں سُنیا ایہہ کہندیں اذانِ فجر کو
 نسیم صبح راس ایندی ہے دل کو

دواء جان پینداں میں بادِ سحر کو!
ایہہ ہنگامہ کس سُن پپا کرتا ہے
ایہہ کس ساڑ دتا شہر دے شہر کو!
گیا جام ماہڑا چھلک پھر بھی ساحل!
میں ترجیح ہاں دیندا اجاں بھی صبر کو





جند، جان کسے دے ناں لائی، اس دا بھی کجھ مطلب ہوسی
رسوائی ہس کے سر چائی، اس دا بھی کجھ مطلب ہوسی
غیراں دی شکایت ہور شکوہ بے سود بھی ہے، بے مطلب بھی
دلبر اپنا ہے ہر جائی، اس دا بھی کجھ مطلب ہوسی!
ہک صورت، جس کو دکھ دکھ کے چن تارے بھی شرمندے سن
اوہ دیکھ مکو خود شرمائی، اس دا بھی کجھ مطلب ہوسی!
اوہ جیت دے نغمے گاندے ہین، خوشیاں تہ جشن مناندے ہین
میں من لئی اپنی پسپائی، اس دا بھی کجھ مطلب ہوسی
جدھ ہیتی اڈیا دلبر دا، دل شاد ہويا، آباد ہويا
ایہہ اکھ نمائی پُہر آئی، اس دا بھی کجھ مطلب ہوسی!
اوہ شاہ صفت، اوہ ماہ نماء، اس گل دا مطلب اوہ جانن ا
میں جوگی، مجنوں صحرائی، اس دا بھی کجھ مطلب ہوسی!
لگ، چھپ کے نہ ملساں ساحل! اگلے مستانے موسم بچ
ایہہ گل بچناں سُن فرمائی، اس دا بھی کجھ مطلب ہوسی!






یاداں دی ہک کوئج نے لایا دل دی ڈال بسیرا وے
ہجر دی کالی رات دے سینے بچ پُر نور سویرا وے
لگ، چھپ کر دے ہک ساتھی دے بارے بچ میں کے آکھاں
کاں دی عمر نا اپنا بنیا، ہُن کدھ بنسی میرا وے
چار پھیری اج باغاں بچ آئیاں مست بہاراں ہین
نا رُس، نا تڑپا پردیسی! لا وطنان کو پھیرا وے
توں، ہور تیرے پیار دی قیمت، ایہہ جگ والے کے جانن
توں اکھیاں دا چن، ستارہ، تیرے باجھ ہنیرا وے
نا افسوس، پشیمانی ہور، نا غم ہے لٹ جاوَن دا
دل اکھیاں کو پیارا لگدا، ہک رہن، لُٹیرا وے
مکڑی جہی ہک عمر ملی ہے، لاچ، طمع کے کرنا
کس کم دے ایہہ محل، چُبارے، تیرا پیار بہتیرا وے
تلواراں ہور نیزے کہن کے دشمن آسِر چڑھیا ہے
منگ دعاء ہتھ چاکہ ٹٹے درداں والا کھیرا وے
ہک واری کھُر آجا ساحل! قسم خدا دی رکھ دیباں
تیرے قدماں پیٹھ کنوارے ارماناں دا ٹھیرا وے



اگ برساون آلی قاتل اکھ، انگوری ہوسکدی ہے
سہل سفر تہ روشن رستہ، منزل نوری ہوسکدی ہے
پیار محبت دے قانوناں پنج ہُن نرمی بھی ہوگئی
اج پکڑے گئے ہور ضمانت کل عبوری ہوسکدی ہے
چوری، چوری سنگنے! ماہڑے خط چاکے نہ پڑھیا کر
راز کوئی محبوب دا یا پھر گل ضروری ہوسکدی ہے!
دو جہماں کو وکھرا کر کے جنڈرا مار تہ پہرہ لا!
دور روحاں پنج کدھ کوئی پینڈا، کدھ کوئی دُوری ہوسکدی ہے
نا خط نا پیغام چلایا، نا خود ملیا، اس پنج بھی
گجھ مقصد، گجھ مطلب یا پھر گجھ مجبوری ہوسکدی ہے
بس ہک واری دس دے ربا! میں ہور ماہڑی قسمت پنج
دُدھ، مکھناں پنج اُس دے ہتھ دی گئی چوڑی ہوسکدی ہے؟
اس شردے دے موسم پنج بھی بس ہک واری مل جاتوں
شام گلابی ، دن مستانہ، شب سندوری ہوسکدی ہے
وصلاں شب پنج یاراں دے وعدے پُجبدے رہندے ہین
لب پیمانے بن جاندے ہین، اکھ مخموری ہوسکدی ہے!

ضد اپنی جے توں تچ دیویں، تھرتی، امبر مل سکدے ہین
ہر فرمائش ہک پل دے بچ ساحل! پوری ہوسکدی ہے۔



نظمیں.....

(روایتی)

ماں بولی

مٹھڑے میوے، ٹھنڈیاں چھانواں، ماں بولی دی چھولی بچ
دل کردے، سر رکھ سو جانواں، ماں بولی دی چھولی بچ
سرنیواں کر لیندے جس تھاں، جنت دے سارے گلشن
میں تکیاں بچیاں لکھ چھانواں، ماں بولی دی چھولی بچ
ساری جندڑی اوہ تاں اپنے بچیاں دے لئی گاندی رہی
اج میں پہلی لوری گانواں، ماں بولی دی چھولی بچ
مر جانواں، پر موت نا آوے، یارب! دے توفیق جی
لفظاں دے موتی رکھ جانواں، ماں بولی دی چھولی بچ
غزلاں، نغمے، گیت، فسانے کہول کے ساحل! ہنجاں سنگ
ارماناں دے محل سجانواں، ماں بولی دی چھولی بچ!



میں اُس بستی دا باشندہ

اوہ جنت دا ہک دروازہ یا عرش بریں دا حصہ ہے
ایہہ کہانی میہ اسماناں دی، ایہہ پاک وطن دا قصہ ہے
اوہ لال گلاباں دی خوشبو، اوہ نیلے شنگراں دے منظر
ہر ٹھاکا ہے گلشن گلشن، ہر ماہلی ہے معطر معطر
دن رات نشے دے عالم بچ اس تہرتی دا بوٹا بوٹا
بدست ہواواں دے نغے، ہک پھینگ رنگیلی دا چھوٹا
محبوب وطن دے ہر گل کو سینے سنگ لا کہہ تکیا ہے
ایہہ خاک وطن ہک سرمہ ہے، اکھیاں بچ باہ کہہ تکیا ہے
تہذیب و تمدن دا باڑا، ایہہ علم و ادب دی چھولی ہے،
ایہہ ولایاں دا ہک مسکن ہے، ایہہ سنتاں دی رنگولی ہے
سب شاد رہون بلبل میرے، آباد رہوے ایہہ میرا وطن
رب خیر کرے اس گلشن دی، آزاد رہوے ایہہ میرا وطن
آدم دا ناں ہور آدمیت، جس تہرتی اُپر ہے زندہ
میں اُس بستی دا واسی ہاں، میں اُس گلشن دا باشندہ،

انساناں دے بدلے ساحل! جد دیس فرشتے رہندے ہین
ناں ارضی جنت ہے جس دا، کشمیر اُسے کو کھندے ہین۔

☆☆☆☆

اس وادی پنج

بستی اجڑی، کھر کھر ہے ویران سوہنیا!
قبراں بچوں بولن پئے انسان سوہنیا!
کتنے مر گئے، کتنے گم ہین، کتنے بند؟
کتنے خانے اج بھی ہین سنسان سوہنیا!
کہہ اماں، کہہ بابا، چاچا، کہہ دادا؟
کمبڈی ہے اس بستی پنج ہر جان سوہنیا!
پھل ، کلیاں کو بوٹاں تلے چتھ چتھ کے
ہسدا ہے اج گلشن دا دربان سوہنیا!
سامھ، سمبھالی رکھ اپنے زیور ساحل!
اس وادی پنج کہہ عزت، کہہ شان سوہنیا!

☆

اتھروں.....

چٹے اتھروں، کالے اتھروں، ماہڑے دل دے چھالے اتھروں
راتاں راتاں لوری گا کے، بچیاں وانگوں پالے اتھروں
اکھیاں بچوں ڈھلدے اتھروں، ماہڑے بن بن روہڑدے اتھروں
جانڈے جانڈے یاد میری بچ، ہائے! اوہ پچھاں مُردے اتھروں
جس دی راہ بچ ڈھالے تھروں، جس دے لئی مہکائے اتھروں
ماہڑا رُسنا یاد سی اس کو، یاد نہ ماہڑے آئے اتھروں!
اتھروں سن یا لال، جواہر، پاک، منضع، ستھرے، طاہر
ماہڑے دل دا آئینہ سن، ماہڑا، باطن، ماہڑا ظاہر
ماہڑے وانگوں روندے اتھروں، بارش بن کے چونڈے اتھروں
روح دی تہرتی اُپروں بگدے، میل دلاں دا تہوندے اتھروں
دل دے رت بچ کھولے اتھروں، لالاں دے سنگ تولے اتھروں
بے درداں دے قدماں دے بچ، بے قدری سنگ ڈھولے اتھروں
میرے سن اوہ، میرے اتھروں، ارماناں دے ٹھیرے اتھروں
اج اکھیاں جد ھ سکیاں ساحل! آئے یاد بہتیرے اتھروں!

اُڈیک.....

کہہ، کہہ دساں، میں کیتیاں کہہ کہہ تیاں!
نظراں کو ڈاہ کے بہہ گئی، بانہواں کھلاریاں!
مہندی ہتھاں تے لا کھدی، خوشبو لباس بچ
فیشن بدل بدل کے میں زلفاں سنواریاں
سرگی ہوئی تہ اٹھ کے میں کیتی ادا نمازا!
راہ بچ تیری، دعاء دیاں کونجاں اُڈاریاں
کھر کو سجا کے، میں تہکھائی مشکِ عنبریں
کھولے میں تیرے واسطے بوہے تہ باریاں
بہہ گئی توہاڑی یاد بچ پلکاں بچھا کے میں
کر کر تکو ہی یاد میں کھڑیاں گزاریاں
دیگر دا دیہنہ بھی لہہ گیا، شاماں گزر گئیاں
کہنلیاں میں بہہ کے سیتیاں زخماں کنواریاں!

ہجراں دی عمر؟ کہہ دساں کتنی دراز سی
ناپچھ ، فراق و درد نے کتنی میں ماریاں!
لنگھدے رہے اس حال بچ مہینے، بھی سال بھی
ساری عمر میں کیتیاں اُنجم شماریاں!
ساحل! میں اُسدے واسطے منگد رہی دعا
روشن رہوئے اوہ چن سدا، جس میں بساریاں!



اُدیک (۲)

میت نامڑیا ماہڑے من دا، بیت گئیاں برساتاں
تڑپ، تڑپ کے دن گزرے ہو رجاگ جاگ کے راتاں
اللہ جانے شگناں والی مہندی کدھ رنگ لاسی گی
کدھ میں سچ دھج بوہٹی بنساں کدھ ٹرسن باراتاں
میں رستے دی تھوڑا ہاں سبناں! توں تارا اسمانی!

دوہاں دے رستے بچ حائل بڑیاں، نکلیاں ذاتاں
 میں شائد ہجراں دے غم بچ اوڑک نوں ٹر جاندی
 ہر ویلے راہ ڈکيا ماہڑا، پیار دیاں جذباتاں
 عشق سکولے سود و زیاں دا سبق نا کوئی لبھیا!
 رت بچ کھول کتاباں پی گئے، پڑھیاں لکھ لُغاتاں!
 جس دن دو بچھڑے دل ملسن، اُس دن عید مناساں
 پاک محمد دے ناں پڑھساں میں اس دن سونعتاں
 اوہ ماہڑے دل دا سا حل ہے، ظالم نا کوئی آکھو
 ہجر و چھوڑے، ہوکے، ہاڑے، یار دیاں سوغاتاں

سرنانواں!

کس کو ویکھ کے لکھدا ہاں میں، کس کو ویکھ کے گاندا ہاں
 دل تہ ہتھ رکھ کے سُن لو جی! میں ہک پہیت سناندا ہاں
 ہے محبوب نرالا ماہڑا، اس دی ہر گل وکھری ہے
 اوہ پاسے تڑپاندا کدھرے، میں اس کو تڑپاندا ہاں
 رُوحاں دے عالم بچ تکیا سی میں اس کو ہک واری

اس کو لہدا پھر دا ہاں میں ، جدھ دنیا بچ آندا ہاں
 نہ کوئی حور، پری، معشوقہ، نہ کوئی ویسی محبوبہ!
 اج تک میں دُنیا بچ ویکھی، سو، سو قسماں کھاندا ہاں
 کدھرے اوہ انداز نا لہیا، نا کدھرے اوہ واز سُنی
 ہر سُو تکدا رہندا ہاں میں، ہر پاسے کن لانا ہاں
 دُور تخیل دے بانے بچ، برساں برساں بیٹھ کے میں
 اپنے ہتھاں نال سجا کہہ کہ محبوب بناندا ہاں
 باہنواں کھول کہہ کھل گیندا ہے اکثر ماہرے رستے بچ
 پھر کدھرے لُگ، چھپ جاندا ہے، جدھ میں نین بچاندا ہاں
 لماں، چوڑا وعظ میہ کوئی، بس اتنا سرناواں ہے
 اس دُنیا دی ہر شے ساحل! ہک چھوٹھا پرچھانواں ہے



احساس!

بہار آسی، میں اپنے دل دے جانی کو ایہہ خط لکھساں
چلے آون جے موسم کو کمی محسوس ہوندی ہے
میں مچ برداشت کیتا ہُن تکر ایہہ ہجر دا صدمہ
مگر ہُن اکھ دی گاگر بچ نی محسوس ہوندی ہے
گزر دا ہے ماہڑا ہر دن تو ہڑے رستے کو دکھ دکھ کے
مگر ہر رات قاتل، زلف تیری تھیں لمی محسوس ہوندی ہے
اوہ جھڑی گیت، نغمے ہور غزلاں دے گئی ساحل!
کو اوہ ہر نظارے بچ جی محسوس ہوندی ہے..!!



احساس (۲)



نہ اس من دا ہمد کوئی، نہ اس تن داسایہ کوئی
نہ اس دل بچ یاد کسے دی، نہ ہتھ بچ سرمایہ کوئی
تہنگدے رہے میں ہو ر ماہڑی جاں، مکدی رہتی ایہہ چندڑی بس!
نہ میں کیتی خیر کسے دی، نہ ماہڑے کم آیا کوئی



کشمیر.....!

جنت کو جے دنیاں اُندر دکھنا چا ہوئے کوئی
چھوڑ کے ساری دولت، بنگلے آجاوے کشمیر
باقی دنیا دے لوکاں تھیں اس دی قیمت پُچھو
کہہ گل ہے، کیوں اُنڈے ادل کو تڑپاوے کشمیر
سڑدے، پُجبدے تن من کہن کے ایندا ہے ہر سیلانی
زخم جگر دے پھل بن جانڈے، مرہم اوہ لاوے کشمیر
سوہنی بوہٹی دے نیناں بچ لال، گلابی ڈورے ہین
جھپڑا ویکھے، اس دے دل کو خوش کر جاوے کشمیر
اپنے ہووے بیگانے سارے رل مل اتھے رہندے
ہر ہک کو مہمان سمجھ کے گل لاوے کشمیر
نبلی ماہلی اُتے چٹے بدل دی لنگی، مچ سوہنی
میں اسدا شواہلا بن جانواں، بوہٹی بن جاوے کشمیر

خوش قسمت ہاں ساحل! ماہڑا چمن ہے سو ہنا دُنیا تھیں
قداں قداں پُھل رستے بچ برساوے کشمیر!

چلی خوشبو بہاراں دی

سُتے ارماں، اُٹھے ارماں، چلی خوشبو بہاراں دی
دلاں بچ بل گئیاں لاٹاں، چلی خوشبو بہاراں دی
مداناں ، ماہلیاں شنگراں، سبز مخمل دی چادر تھیں
مچل کے کھولیاں بانہواں، چلی خوشبو بہاراں دی
کٹھے، نالے تہ دریاواں دا پانی رقص بچ دُیا
سُنائے گیت اج واہواں، چلی خوشبو بہاراں دی
پھلاں کلیاں تے بچپن ہے تہ مستی پکھڑواں اُپر
چمن ول سد دیاں راہواں، چلی خوشبو بہاراں دی

گُرے کونجاں دیاں ڈاراں، گُرے کہنگی دیاں کوکاں
معطر، ٹھنڈیاں چھانواں، چلی خوشبو بہاراں دی
ماہڑے محبوب دی اوہ اوڑھنی، کشمیر دی ماہلی
کہ جہراں ساہ دے بچ ساہواں، چلی خوشبو بہاراں دی
ایہہ گلشن، باغ، باغیچے، جے جنت نیہہ تہ پھر کہہ ہے؟
اسے جاء ہس کے مرجانواں، چلی خوشبو بہاراں دی
نہ ماہڑا یارہی مڑیا، نہ کوئی خبر ہی آندی
ماہڑی تقدیر دے کانواں، چلی خوشبو بہاراں دی
سُہانی رُت ہے وِصلاں دی، کلی ماہڑی ہے بے رونق
میں ساحل! ہجر بچ گانواں، چلی خوشبو بہاراں دی



سکھی....

ہر شخص دے وانگوں میں بھی ہاں اس رستے تھیں انجان سکھی!
ہک قبر دا کالا اندھیارا، ہک ناڑک ماہری جان سکھی!
کُہر دُور ہے ماہرے ساجن دا تے رستے بچ کالے جنگل
نا کھوڑا ہے، نا ہاتھی ہے، نا ساتھی نا سامان سکھی!
بوہٹی سچ دھج کہہ بیٹھی ہے، رخصت دی تیاری ہے پھر بھی
دل ڈردا ہے، ساہ رُکدی ہے، ہور اکھ بھی ہے ویران سکھی!
کُہہ اس دے ملنے دی حسرت؟ کُہہ اسدے گمنے دا ماتم؟
ایہہ کھر سچے کھر والے دا، میں دوپل دی مزمان سکھی!
ایہہ زُلف تھیں لمیں عمر لٹھی دُنیا داری دے کماں بچ
ہن رخصت ویلے کہہ ٹھونڈاں اس کھولے بچ سامان سکھی!
گُجھ اس دنیاں دی رسم بھی ہے، گُجھ اُس مالک سنگ وعدے ہین
کونے کونے لے جانا ہے اُس مالک دا فرمان سکھی!
پیراں بچ پئی ہک خاک ساں میں، دلبر نے بسایا اکھیاں بچ
اُس پیارے رب دا ماہرے تے کتنا ہے بڑا احسان سکھی!

ہر شے سنگ لایا دل اپنا، ہر شے کو گما کے پچھتائی
ایہہ ساری طلسمی نگری سی، ہور میں کتنی نادان سکھی!
ایہہ جان ہے جان دے مالک دی، ایہہ جسم ہے تہرتی دا قرضہ
ایہہ گیت مرے رہ جاسن گے ہک نکڑی جی پچان سکھی!
جدھ دنیاں چھوڑاں میں ساحل! تاں اتھروں کیرے جگ سارا
جدھ پوہچاں یار دی نگری میں، مکھڑے تے ہوئے مسکان سکھی



قارئین دے ناں!

ادب دے باغ تھیں کہن کے ایہہ کچھ کلیاں میں آیا ہاں
قدردانو! قدر کرسو! تہ مٹ جاسی وہم ماہڑا
سیاہی دی جگہ اپنا لہو میں ڈولیا اس بچ
نکل آیا ہے بن کہہ شعر دل تھیں درد و غم ماہڑا
ہے خوشبو، تازگی ہے، رنگ ہے، رونق ہے لفظاں بچ
کہ افسانہ بہاراں سُن ہے کیتا خود رقم ماہڑا
کہمن دل دے سمندر بچ کدوں خاموش رہندے ہین؟
پتہ نہیہ کس کھڑی دا منتظر ہے زیر و بم ماہڑا
پریشاں ہاں، بنانواں کھڑ کتھا دنیا دے باغے بچ
غرب ماہڑا، شرق ماہڑا، عرب ماہڑا، عجم ماہڑا!
تخلص ہُن بڑے لوکاں نے اپنا رکھ کہدا ساحل
مگر دنیاں تھیں ہے دکھرا جہیا نقش قدم ماہڑا

میں جس دی رہبری کو پا کے اج ساحل تہ آبیٹھاں
غلط فہمی دے طوفاناں دے بچ ہے اوہ صنم ماہرا

تندور

بدلے بدلے مکھڑے اُپر باب نواں میں پڑھیا
دیوے سارے گل کیے ہور غاراں دے بچ بڑیا
توں کہہ جانیں اوہ بے دردی حال ہو یا کہہ دل دا؟
توں جا بیٹھی ہور دی ڈولی، ہور گئی سب لڑیا
اپنا پیار، جہاں دی دولت، کیتی سب نچھارو
تدھ ہتھ ماہرا چھوڑ کے راہ بچ! ہوراں دا ہتھ پھڑیا
باغ محبت والا لٹیا، نالے پھل لتاڑے!
کل بدلی اکھ تیری تہ اج مغرب تھیں دینہہ چڑھیا
ایہہ ساری دُنیا اج ساحل! ہک تندور ہے لگدی
دیکھ توہڑی ایہہ بے پرواہی، انگ انگ ماہرا سڑیا



اُمید

جفاء دے شہسواراں کو نہیہ اے کجھ جان دی امید
وفاء دے تاجداراں کو سرو سامان دی امید
عجب کہنہ ہے اگر محفل سجے ویران ہک دل بچ
شرط ہے جے ہووے دل بچ کسے مزمان دی امید
مدد کرسی خدا ہر دم، پکڑ لے صبر دا دامن!
توجہ پھیر دیندی ہے طرف قرآن دی، امید
طریقہ آسماناں کو ہے ہتھ لاون دا ایہہ بہتر
جے خاکِ راہ بچ مل کے کرو طوفان دی امید
ہے کافراوہ جے جس دا دل ہووے دُنیا دا شیدائی
ہے مومن، اوہ جے ہے جس کو فقط ایمان دی اُمید
ہے لازم اج ہی یارب! تو عطا کر جام اُلفت دا
جے کل رسوا نا ہو جاوے کسے انسان دی امید

ہے کیتا تده زمانے پنج بڑا چنگا ایہہ کم ساحل!
دیارِ غیر پنج جا کے رکھی پہچان دی امید!

فطرت دے پروانے لوک

پہاڑاں دی چھو لی دے واسی، فطرت دے پروانے لوک
کچھ نہ پچھو، کسراں جیندے، مستی پنج مستانے لوک!
دل پنج مہر و وفا دے چشمے، ہوٹھاں اُپر مے خانے
اکھیاں سنگ چھلکاندے پھر دے پھر پھر کے پیانے لوک
تخت اُجڑ گئے، تاج بھی لٹ گئے، پھیر بھی غیرت باقی ہے
لوکھی، سکی کھا کے پڑھدے ہر ویلے شکرانے لوک
ٹھوکراپنی پنج سنگلاخ پہاڑاں داسر ایہہ رکھدے
اپنے پھر سے دے سنگ لکھدے فطرت دے افسانے لوک
گاندے چھمر، نجدے پکھڑوں، جنگل بیلے دی دُنیا...
اپنے اندر شہر بسا کے، شہراں تھیں انجانے لوک!

کہہ کہہ قصے آکھاں ساحل! میں ہُن پہاڑی پُتراں دے
کچھ سدھے، کچھ سجن، پہولے، کچھ چالاک، سیانے لوک



مشورہ

دوروں دوروں پہلاں پھیرے لاسیں توں
پھر گچھ عرصے پچھے نین ملاسیں توں
گچھ ویلا لنگھ جاسی سِٹیاں چونڈن بچ
گچھ سوہنے الفاظ تہ فقرے ٹھونڈن بچ
ہولے ہولے گاسیں میرے لئی گانے
خط و کتابت بچ لکھسیں گچھ افسانے
لماں کچھسیں اپنی عشق پہیلی کو
جا جا ملمسیں میری ہر سہیلی کو
مٹھیاں مٹھیاں گلاں سوچ کہہ آسیں گا
ماہری صورت تک کے سب کچھ پہل جاسیں گا
غم ماہڑے بچ کر سیں اپنا حال خراب

ننڍر مُک جاسی، اُڏ جاسن سارے خواب
اپنے سنگ بدنام مکو بھی کرسیں پھر
دیوانہ بن کے گلیاں بچ پھر سیں پھر
چرچے ہوسن عشق تیرے دے شہر، گراں
تیرے ناں سنگ جُو جاسی پھر میرا ناں
تیری اس مشکل دا ہے ہک نکڑا حل
ماہڑے اگے ہمت کر کے سدھا کھل
ہک سعتی بے خوف زمانے تھیں ہو جا
غافل اپنے ہور بیگانے تھیں ہو جا
بانہواں کھول کے اپنے سینے لا مینوں
لے کے نال فضاواں بچ اڏ جا مینوں



خواہش.....



میں مزمان ہاں تھوڑی سعتی دا یارو!
کوئی ماہڑے دلبر کو جا کے پکارو!
سنو لاکے کن اس دے قدماں دی آہٹ
کوئی اس دے اپنے دا صدقہ اُتارو
جہیزے اس دتے ہین وفاواں دے بدلے
پہلو زخم سارے، اوہ صدمے بسارو
بکھیرو تسی وادیو! مُشک ہر سو
سجاؤ تسی اپنا دامن بہارو!
محبت اول تاں کرو نہ کسے سنگ
کرو، تاں نہ سعتی ہجر بچ گزارو!
میں مرجاساں پی کہہ ایہہ ہوٹھاں دے پیالے
ایہہ نظراں دے خنجر میرے دل تے مارو!

کرے نا کوئی ذکرِ ساحل بھی جس جاء
کوئی ماہری کشتی کو اس تھاں اُتارو!

نظمیں.....

(آزاد)

’ترکڑی‘

☆☆☆☆

کچھ رسماں مارے، چن تارے
کچھ تقدیراں دے، لٹیاں ہیراں
کچھ دولت دے ہاڑے روہڑ گئے
کچھ یاراں کیتی غداری....!
کچھ توں بھی سین مغرور چناں!
کچھ ماہڑی بھی سی مجبوری
کچھ ویلا اپنا دشمن سی
کچھ دُنیا دی دُنیا داری....!

☆

کچھ اکھیاں داسکیا پانی
کچھ اس دل کیتی من مانی
کچھ پاس، لحاظ دا کہنا ٹاسا

کچھ بے ویلے غیرت مرگئی
کچھ آس پڑوس دے لوکاں سُن
جندڑی دا کنہیر اکیٹا تنگ
کچھ اپنے، لگدے سکیاں سُن
شربت دے بد لے پیتی پہنگ
کچھ دولت دا بھی تاپ رہیا
کچھ غربت سُن بھی مت ماری
کچھ لوک عدیم الفرصت سن
کچھ دے حصے بس بیکاری



کچھ راتاں کٹیاں رو رو کے
کچھ تہیاڑ ہنھیرے بیچ گزرے
ٹھڈے رشتے، پہنچدے ناٹے
کچیاں قسماں، بالے تہو کھے
بس مہر و وفاء دا کال رہیا

اس دنیا بچ ایہہ حال رہیا
کہنلیاں آنا، کہنلیاں جانا
کہنلیاں رونا، کہنلیاں ہسنا
بس، اپنے من بچ دُوب دُوب کے
اپنے عملاں دی ترکڑی بچ
کرماں دی پنڈسی مچ پھاری
ہک پاسے سی دُنیا ساری
ہک پاسے جندڑی بے چاری
ہک پاسے جنگل، صحرا، بن
ہک پاسے اپنی لا چاری!



عشق دائرہ کا....

عشق دائرہ کا،

دل دی کڑھائی

بیچ جسویلے پکدا ہے!

اگ بلدی تہ تہواں اُٹھدا

ایہہ عالم کدھ تکدا ہے....!

پہامڑ، شعلے

اندرو، اندری

سینے دے بیچ تہگھدے، پر....!

سچا عاشق

اپنے پھوڑے

تیرے متھے دے چن تارے

تیری بانہہ دا چھلاہاں میں....!

جگ تھیں لکا کے رکھدا ہے....



پتھر دی تحریر مٹی ہے

کدھ برساتاں سنگ ساآل؟

موت دے مارے

کدھ کوئی عاشق

مٹ سکدا، مر سکداے؟



سیالے دامستانہ موسم

برفودے کچھ چٹے، گولے
ہوادے موہنڈے نجدے نجدے
ماہڑا چہراچم کے اڈ گئے...
دلبر دے پیغاموں وانگوں
ہک سوہنا احساس کہ جس کو
آکھن لئی الفاظ نہیہ لبھدے



سیالے دالیلیا موسم
ہور کشمیر دی الہڑ ماہلی...
کورے دا ہک لماں رستہ
کوری، چٹی چادر دے بچ
ہک گوری دے نازا ولے
مہنہ بچ موتی، بانہہ بچ چھلے!



دریا جم گئے، پانی تھم گئے
کٹھیاں دی سب مستی مک گئی
اُچیاں رُکھاں داسر نیواں
بر فیلے میداناں اندر
کتنی خاموشی دا عالم...؟
ہولے ہولے، چٹے گولے
قدرت دا انمول خزانہ
رج رنر یا جنگل، بیلے



باری، بوہے بند ہیں سارے
چلھے بلدے، ارماں دل دے
موٹے موٹے اوئی لیڑے
ٹوپی، مفلر، موزے، بیڑے
اماں دے چرخے دی چادر
بابے دے ہتھ دا دستانہ!

سیالے داموسم مستانہ...



کانگڑیاں داڈو ہلداسوہگا
کمرے دے بشکار بخاری
توئے اُپر پُجے دے دانے
سیالے دے انمول خزانے
دلبر والے حیلے، پہنانے....



نیڑے، نیڑے بہن داموسم
سجے، کھجے رہن داموسم
دل سنگ دل کو جوڑن داہور
کنناں بچ گجھ کہن داموسم..



زمستانی، رُت مستانی
دل بچ ہوکے، اکھ بچ پانی

صدیاں دے جگراتے وانگوں
دل دے تہہ خانے بچ بدلے
ہولے ہولے پہنا مڑاگ دے
دشمن ہو کے، دلبر لگدے
اندر کھر بچ نہیر انہیر ا
باہر شوئلن ٹھنڈیاں ہواواں
انگاراں کو سینے لاواں
دل کر دا ہے چلھے دی تھاہ
ایہہ لکڑی بکل بچ باہواں
شر بت بدلے قہوے، چاہواں



ٹھنڈ سنگ ہو یا چہلا ہاں میں
توں ہیں ماہڑے تن دی چادر
تیرے سردا پلا ہاں میں...
توں آکھیں تہ اس موسم بچ
تیرے گل دی گانی ہاں میں



دردی

سرد ہوا دے پھانڈے سُن گد گدی کر کے
جگا لیا تہ مکو ہجا لگا جے
ماہڑاناں لے کے تہدھ سویرے سویرے ہوکا پہریا ہے!
ایویں، کدھرے کول ہی
توہڑے جسم دی خوشبو کھلری ہے...
مکو گلستان کشمیر دا گمان ہو یا
ماہڑے ہجر دیاں سِراں بچ تر دے کمل!
ماہڑے ہنجواں دی شبنم بچ ڈبے دے گلاب!
مکو اکثر کنیاں لگدا ہے جے
پیر پنجال دیاں ماہلیاں اُپر کھلرے دے بدل
ماہڑے غم بچ پریشان توہڑیاں زلفاں ہین...
بدلاں بھکا رہسدا یاں، چمکدیاں بجلیاں
ماہڑے خیال بچ توہڑے لبّاں تے آئی دی مسکراہٹ ہے
ساون دی ایہہ ہنیری تہ برسات

درِ انتظار ہو
 سوزِ جدائی سنگ
 چور چور ہو کے
 تھوڑے تھوڑے ڈولے ہیں
 ماہرے طلسمی پرستان دی شاہزادی!
 مکو ہجا لگدا ہے جے
 گہنگی دی درد پھری کوک،
 کوئل دے پُرسوز نغمے،
 تہ بلبیل دے مٹھڑے ترانے
 دراصل.....
 تو ہڑی چیخ و پکار دے مختلف انداز ہیں
 ہو...
 اس آہ و فغان دامنِ مرکز و مخاطب
 میں ہاں...
 صرف میں...!
 ☆☆☆

عاشق مجازی

دل دے معاملے بچ
عاشق اکثر مجبور و مقہور ہی ہوتا ہے
تخت و تاج
بادشاہی،
عیش و عشرت
ذات و مذہب
دنیاں و دین
سمندر و پہاڑ
عشق دی راہ بچ رکاوٹ نہیں بن سکتا
دل دے سودے بچ، دنیاں دی قیمت
ہک کوڑی تھیں زیادہ نہیں ہوندی....
حسنِ جاناں دی ہک تجلی واسطے
عاشق مجازی بھی موسیٰ بن گیندا ہے

خاک تہ سوہا گہ بن لئی تیار
لیلے مجنوں تھیں کہن کے
سوہنی ماہیوال..ہور
جو لیٹ سیمز رتوڑیں
سارے دے سارے
دل دی سامراجیت دے
مجبور و مقہور
غلامان عاجز و ناتواں
داستانِ عشق دے کردار
باز بہاؤر
رُپ مَتّی
عمر او جان.....!!

☆☆☆

مصرفیت

تُدھ چُھیا ہے
”کسراں کٹدے ہین ماہڑے شام و سحر..؟“
سُن لے!
مُج اداں ہاں
کہلم کہلا ہاں
بے بس ہاں
محروم و مجبور،
مغموم و مہجور،
تنگدست، دلگیر و اسیر...
ہاں، شائد...
اس تھیں بھی مُج پریشان ہوندا
اگر اپنے عالم تخیل اُتے عبور نا ہوندا
تیریاں یاداں دے قافلے ہمقدم نا ہوندے

بڑا مصروف رہندا ہاں
جدھ کدھرے
عالمِ تخیل دی چھول بچ آہندا ہاں
نالے بناندا ہاں
اسمان دے وسیع کینواس اُپر
پہینگ دیاں رنگاں سنگ
تیری تصویر.....!!



گھٹن!

کہلا پن، لمی تنہائی
ڈس دی ہے اپنی پر چھائی
سب پر دیسی کھر مڑ آئے
نامڑ یا ماہڑا ہر جائی
بستی جیویں تہکھدا جنگل
کھر ویرانہ لگدا ہے
ناسجدہ، ناصوم وصلواتاں
دل بُت خانہ لگدا ہے
نادلبر، نادلبر دا خط!
ناقاصد، ناہر کارہ
دل کواج کل چنگا لگدا
نا آنگن، ناچو بارہ
بجھدی شمع دا پروانہ

کدھ تک خیر مناسی گا؟
میں تھوں ماہڑا گلشن کھسیا
ویرانے دارستہ دسیا
ہر پا سے زنجیر، سلاخاں
نازک دل کس پنجرے پھسیا!
کدھ تک لب کوئی سی سکدا ہے
اپنے اتھروں پی سکدا ہے
اس حالت نیچ، اس جاء یارب!
کتنا چر کوئی جی سکدا ہے؟
کتنے دن ہو راہی میت
اپنے موہنڈے چانواں میں
دل کر دے بُت چھڈ کہہ ساحل!
دور گرے اڈ جانواں میں.....!



اجنبی..

اپنی دیوار دے آئینے بچ،
کسے اخبار دے تراشے اُتے،
کسے کتاب دے سرورق اُتے

چھپی دی

رنگین یا کالی، چٹی

اپنی تصویر

یا پھر

ٹیلیویشن دے تقرئی پردے اُپر

اپنی جانی، سیانی، ہلدی، جلدی شکل

کدیں بھی، کدھرے بھی، کسے بھی حال بچ

دیکھ کے سیان لیند اہاں

مگر کدیں کدائیں

فرصت ہو رتنہائی دے پُر سکون لمحات بچ

اپنے دل ہو روح دے
گھلے، دُھلے، صاف تہ شفاف آئینے بچ
نیواں ہو کے غور سنگ تکیا تہ
ہک اجنبی!
مگر.....

قدِ آدم، حسین و جمیل انسان کو تکیا ہے
خوش و خرم، ہشاش و بشاش اجنبی!
کون ہے اوہ.....؟



احتساب!

ہک گمشدہ بستی دی کنڈیاں پہری پکڈنڈی توں تڑ کے
زندگی دے انہاں چوتریہاں برساں بچ
ننگے پیراں.....

جنگل ہو رریگستاناں کوٹپ کے
گاہ دی جُتی تھیں کہن کے ہوائی جہاز تکر
'خاموش تلاطم' 'حرف حرف زنجیر' تہ 'شبستان' وجود،
فاقہ کشی دیاں سمندراں تھیں، شاہی دسترخوان تکر
خرقہ درویش تا قبائے سیم وزر....
سربستگی ہو محفل آرائی دے سفر بچ
آ بجوئے برنگی کوٹپ کے
بحر ہند دے ساحل تکر
زُلفاں دی ٹھنڈی چھاں،
مخملی ہتھاں داد لگدا زلمس،

پاکیزہ آنچل دی عنبریں خوشبو،
 ہک اڈیکوان اکھ دے موتی دے علاوہ
 کُہر، آنگن پنج کلکاریاں کردے گلاب
 اوہ ماہڑے جسم دے پنجر پنج اسیر...
 ماہڑی بے تاب ہو رہے چین روح!
 بتوفیق ربانی
 اپنی کوشش ہو ر مقدور دے مطابق
 جے کجھ لبھیا
 تڑیاں قدماں اگے ڈھول دتا
 اوہ ماہڑی منگی دی چندڑی!
 ہو ر آکھ!
 جستجو تلو کس شے دی ہے؟
 جس کو تڑی درگاہ اُتے قربان کراں؟



ٹیلیفون

شام، سویرے مندی عادت
تُساں کو کہنہ لگ گئی ہے؟
موبائل ہو ر لینڈ لائن تے
لمبیاں گلاں کر دے ہو
تر پاندے ہو
تر ساندے ہو
مٹھیاں، مٹھیاں گلاں کر کے
ماہڑا خون بھی گر ماندے ہو
فون تے اتنی بیباکی ہو
منہ اگے شر ماندے ہو
ایہہ عادت کجھ چنگی بھی نہیہ
دل سڑا ہے
بیل چڑھا ہے

ماہڑا رسیور شرمندہ ہے
ہتھاں بچوں چہڑ پیندا ہے
راز دی گل ہک آکھاں جانی!
ایہہ کشمیر ہے باغ انوکھا
جسراں صیاداں دی بستی
جسراں گلچیناں داسکن
مال پرایا اپنی ہستی
ماہڑیاں تو ہڑیاں مٹھیاں گلاں
کوئی پرایا سُن نا جاوے
دیواراں دے کن ہوندے ہین
اس بستی دے پیارے لوکو!
دلاں اُپر لکھ پہرے ہین
پیار، محبت دے افسانے
دلاں بچ ہی رکھنے ہوسن
اپنے سب ارمان پیارے
پھاہیاں تے لٹکانے ہوسن

راز و نیاز کو دل دے چلے
اپنی اگ تہکھانا ہو سی
چپ رہ کہہ مرجانا ہو سی
نہیہ تاں پھیر چھتانا ہو سی.....!!



دل دی کتاب

اپنے ماضی دی الماری کو
مدت کچھ کھولیا تہ
دل دی کتاب دیاں ورقاں اُپر
توہڑیاں بے حساب تحریاں
توہڑیاں ہتھاں دے خشک گلاب
ماہڑے اشعار اُپر
توہڑی 'لپ سٹک' دے نشان!
کچی پنسل سنگ
فرصت بچ
بنائے آسے تہاں کدیں نقوش
اظہارِ محبت دے سارے مضمون
توہڑے جذبات دے ترجمان

اوہ بے نام خطوط
 ماہرے ہجر، فراق بچ تو ہڑے ہنجواں دے نشان
 تو ہڑے رُسے تہ ماہرے منانے دیاں تریکاں
 بسراے تہ تروڑے دے وعدیاں دا بیان
 سحریاں گلاباں تہ شبنم دی تازگی دی طراں
 نرم کلیاں دے سینے بچ پوشیدہ خوشبو
 تیرے ناں دی ہر ہک تحریر
 دل دی کتاب دیاں ورقاں اُپر
 اج تکر محفوظ ہے مگر....
 اپنے ماضی دی اس الماری کو
 وقت دی تھوڑا بودا کر رہی ہے
 اس تھیں پہلاں جے
 ایہہ ساریاں یاداں مٹ، مٹ کچھن
 ہک گزارش ہے...
 ماہڑی اواز دا ماتم سن سکوتہ سنو!
 وقتِ رخصت ہے

ہنس کہہ ملو
پھر ایہہ جذبہ، ایہہ بے تابی
رہوے نارہوے
پھر ایہہ موسم دارنگ گلابی
رہوے نارہوے



ارماناں دامن



زندگی دے اس انوکھے موڑتے
دو کھڑی ماضی د دفتر کھولیا
ورقہ ورقہ سب کتاباں ٹھونڈیاں
ہر سطر، ہر لفظ بچ لے لیا عذاب!
درد دے انبار، تکلیفاں دے ٹھیر
ہجر دے کنڈے، جدائی دے بٹے
تھو کھیاں دے کھوہ، فریباں دے پہاڑ
جسم دا تھکھدا چمن، مکدا شباب....
دوستی، ہمدردیاں، مہر و وفاء
حق پرستی، صاف گوئی دانشتہ
خیر خواہی، حسنِ غمخواری دی مے
ہک محبت ہو دل خانہ خراب

ہو کے ہر سود و زیاں تھیں بے خبر
 اپنی ہر تکلیف و غم تھیں بے نیاز
 لے کے ایہہ سامان میں ٹردار ہیا
 ساڑ دتی اپنی نیندر، اپنے خواب
 زخم گننے دی بھی فرصت نالی
 درد دا احساس تاں آسا مگر
 درد کو محسوس نا کیتا کدیں
 مست ہو گئے پی کے ہنجواں دی شراب
 زندگی دے اس انوکھے موڑ تے
 سارے غم دنیا دے وکھرے چھوڑ کے
 آپ دا ہر جدھ تہیان تھوڑا ماریا
 بہہ کے دو چھٹ اپنا کیتا احتساب
 سسکیاں، ہنجو، لہو دریا ہے جان
 ہے چراغِ سحر کہ صحراء ہے جان!
 ریگزار و آتش و آہن ہے دل
 اپنے ارماناں دا ہک مدفن ہے دل

اُمید



نشاں کوئی ہے منزل دا
نہ کوئی نقش پیراں دا
نہ رستے دا پتہ کوئی
نہ ساتھی ہے، نہ سنگھی ہے
ہنیرا ہی ہنیرا ہے
غماں دی رات ہے....
نظراں دے بچ تارا بھی نہیہ کوئی
ماہڑے پیراں دے بچ چھالے
میں ٹر دا جارہیا ہاں پھر بھی اپنے تیز قدماں سنگ
اُچھلدا،
جوش بچ اودھم مچاندا، گیت گاندا
گنگنا ندا ہور مسکاندا....

کہ ماہڑے دل دے ہک کوئے دے بچ سا حل
اجاں امید اناکا جالشکارا تہ باقی ہے
کسے دینہہ، چن تھیں یا تارے تھیں بھی روشن
مکو منزل دی جانب ہے جھیر اسدا
اُسے تارے دی لو اندر سفر میرا بھی جاری ہے
کہڑ دا جارہیا ہاں میں بھی اپنے تیز قدماں سنگ
اُچھلدا،

جوش بچ او دھم مچاندا، گیت گاندا
گنگنا ندا ہور مسکاندا



دلا سہ

ماہڑے محبوب! توں وکھرا نہیہ میں تھوں
زمانے دی نظر دا ہے پہنلکھا
سمجھدا ہے جدادوہاں کو جھیرا
زمانے سُن کھڑا کیتا بکھیڑا
جدا ہوندی ہے خوشبو بھی ہوا تھیں؟
جُدا سرگی بھی ہے بادِ صبا تھیں؟
کلی دے سنگ سنگ ر ہندی ہے شبنم
جُدا ئی بچ ملن دی آس جسراں
لباں اُپر لبیاں دی پیاس جسراں
وچھوڑا، وصل دی لذت تھیں پہلاں
دوہاں دے درمیاں لمیاں اڈیکاں
ایہہ سب ہے لازم و ملزوم جگ بچ
ماہڑے محبوب! توں وکھرا نہیہ میں تھوں

توں ماہری تریہہ دی خاطر آبِ زمزم
توہری، میں تھوں جدائی.. جشن ماتم!
توہڑا ایتھوں کچھڑنا.. ہک قیامت!
توہڑا رُسنا ہے ہاڑا، بجواں دا
توہڑا ملنا ہے ملنا دو جہاں دا
توں شامل زندگی دے ہر قدم بچ
اگر ہاں چن میں، توں ہیں چکوری
میں سورج ہاں تہ توں ہیں لاٹ ماہری
چمک باقی ہے ماہری دم توہڑے سنگ
ماہڑے سینے دے اندر، دل دے وانگوں
ماہری کشتی دے سنگ ساحل دے وانگوں
ماہڑے محبوب! توں وکھرا نہیہ میں تھوں



معمول!

ٹُنوں دا بُوٹا!

میں ہور تو ہڑا خیال

تپدے ہاڑ دی گرمی!

ٹُنوں دی چھاں اُتے

توہڑی زلف دا گمان

جیویں توہڑا ریشمی پیار

تصور دے دیو قامت پر دے اُپر

توہڑیاں یاداں دے عکس

مُکدے ساون دے بدلاں بچوں

مسافر چن واہنگوں

لُگ، چھپ کر دے ہین

داروغہ زندان دی گج دی آواز

اکثر خیالاں دی مالا تر وڑ دیندی ہے

کھلریاں رنگاں،
ٹٹے دے تہا گیاں

ہور

چور، چور خواہاں کو جوڑ کے
روز، نویں ہک تصویر بناندہاں
'لاک اپ' ویلے
توہڑی اس تصویر کو
ٹنوں سنگ سنگ آندہاں
ٹنوں دا بوٹا
توہرا ٹھنڈا پیار

☆

نوٹ: ٹنوں، امپھلہ جیل پنج قید تہائی دے باہر ہک رکھ آسا، جس دے سامنے اپنی اسیری
دے دوران بہہ کے میں اکثر کھنر بار دے بارے پنج سوچدا رہندا آسا... ساحل

☆☆

وصیت!



سرگی دی بادِ نسیم دے نال ہی
دل دے گلستان بچوں
زلفاں دے تازہ گلاب
گلاں دیاں مُشکبارمالاں
سجھرے، سجھرے کلمات تہ
مٹھے بولاں دامکھیر
محبت دی رنگی چنگیر بچ سجا کے
جذبات دے تہا گے بچ پروکے
سجھری سویر دے اُجالے سنگ تھوکے
حوراں دی پاکیزگی
پریاں دی معصومیت
جنت دیاں نہراں داسُتھر اپانی
سمندر دے دامن دے سچے موتی!

ہمالہ دے کورے دی ٹھنڈک
کشمیر دے باغاں دی سبز مچل
ست آسماناں دی عظمت!
ریشمی بستر بچ سستی
الہڑ مٹیاردے خواہاں داسرور
ماہڑی عمر رفتہ دا ایہہ اثاثہ
عرق ریزی دا ایہہ ماحصل
تڑپدی تہ لرزدی
انسانیت دے صدقے!



عرضی دل دی

مُدّت ہو گئی
ایہہ دل ماہڑا
بے بس بھی ہے، بے کس بھی!
واہنگ فقیراں خاک بسر بھی
ہجر تو ہڑے بچ اس دی حالت
حدِ نظر تھیں بھی مچ کھلے
سرد، لداخ دے صحراء وانگوں
سارادن ہے سڑوا، تپدا
لمیاں راتاں، یاد تو ہڑی بچ
لوں لوں ماہڑے تن دا کمبدا
سُکے، پیاسے، ننگے، مُنگے
لیہہ دے ننگے پہاڑاں واہنگوں
پیار دی ہک بارش دا پہنکھا

اتھروں بگدے اکھیاں بچوں
کر گل دے دریاواں واہنگوں
فو تو لا دے پہاڑاں واہنگوں
ہجر تو ہڑے بچ حال ہے ماہڑا



تُسدی گل کے آکھاں دلبر
باغِ نشاط دی ہو پھل کھیلی
چشمہ شاہی دی خوشبو ہو!
مرگاں دے گل، بوٹے سارے
دامن تُسدے بچ آ بیٹھے
ڈال ہو رو لردے اوہ دوسر!
دلبر! تُسدے نیناں واہنگوں
تُسد اقد، دیواراں واہنگوں
جو بن لکھ بہاراں واہنگوں
تُسدے رُخساراں دی لالی
نرگس ہو رُگلاب ترسدے....!

تُسدا غصہ! کہہ آکھاں میں
جہوں دے میداناں اندر
جسراں ہاڑ دے موسم دی لُو
تُسدا رُخساراں دالاوا
ہوٹھاں دے دو پہنکھدے شعلے...
پیار تو ہڑا ہے کتنا مٹھڑا
پتی ٹاپ دے دیوداراں دی
ٹھنڈی واہ دے ہو لے واہنگوں



پھر بھی ہک مشکل ہے جانی
ماہڑی، تیری ادھی کہانی
میں ہک تپدا صحرا ہاں، ہور
توں جنت داستواں طبقہ
ماہڑی بے چینی، بے نوری
تُسدا ایہہ رونق، شادابی...
مل جاو ن تاں اسراں ہوسی

خوش، خوش رہساں دونیں اسراں
صحراء دے بچ چشمہ جسر اں !!



نوٹ :

ایہہ نظم لیہہ (لداخ) بچ قلم کاراں دے دس روزہ بین الریاستی کمپ دے
دوران ستمبر ۲۰۰۹ء بچ لکھی گئی۔ ساحل



ننڍر

ہک اوہ ویلا، جدھ میں جمیاں
سب ہسدے سن، میں رونداساں
ہک ایہہ ویلا، جدھ میں تُریاں
سب روندے ہین، میں ہسد اہاں!
عمر گزاری پارے واہنگوں
نہ رُکنا، نہ تھکنا سکھیا
یار دیاں حکماں کو لے کے
تُر دے رہے ہر کارے واہنگوں
اج ہر کم تھیں فارغ ہو گئے
سارے کہوڑے بیچ کے سو گئے
ڈھونگی ننڍر بیچ مُسکانا
ایہہ ماہڑے مکھڑے دی رونق
وصل دیاں خوشیاں دے باعث
یار دیاں دیداراں کیتے

اتنی فرصت، اتنی نیندر!
منزل اُتے پُج کے اکثر
سوگیندے بے خوف مسافر



اے ”یاد داری کہ وقت زادن تو، ہمہ خندان بودند و تو گریان
انچنان زی کہ بعد رفتن تو، ہمہ گریان شوند و تو خندان



بے مثال!

مثال تُساڑی ٹھونڈن لئی میں
سب دُنیاں دی مٹی چھانی!
باغِ بغیچے، گلشن دیکھے....
پُھل، کلیاں ہور، غنچے دیکھے
جنگل دے گل بوٹے لوڑے
تہرتی داہریا لاٹھل
ماہلی داسر سبز دوپٹہ
میداناں دی گرم ہوا، ہور
برفیلے پہاڑاں دی ٹھنڈک
ٹور چہنگالاں والی دیکھی!
بادِ نسیم دارستہ ڈکيا
ندیاں، کٹھے، دریا جھرنے
پازِ بیاں دے گیت سُریلے
کہنگی ہو کوئل دے نغمے!

ست آسماناں دے چن تارے
 کوہ قافاں دے سوہنے سارے
 جنت دے من موہنے پیارے
 دیکھے، ٹوٹے، چھانٹے، پرکھے
 پھر بھی نہیہ ہک لبھیا ایسا
 تیرے ورگا، تیرے جیسا!
 ایہہ سارے ہین تیرے واہنگوں
 سوہنے، سندر پیارے پیارے
 پر ایہہ سارے، تیرے واہنگوں
 شاطر تہ چالاک تہ نہیہ ہین!
 بے شرم و بیباک تہ نہیہ ہین!
 تیغ، تفنگاں بھی نہیہ رکھدے
 ہو رخنجر بردار تہ نہیہ ہین!
 پُر شوروی نہیہ
 مہنہ زوروی نہیہ
 بے عاروی نہیہ..... دل توڑوی نہیہ...!



گیت.....



پرچھانوواں

آپے سوچو، آپے سمجھو، میں بوہتی شرمانواں
آکھن دی تہ گل نہیہ سکھیو! پھر بھی آکھ سنانواں
رستے بچ آکھلیا ظالم کھول کہہ لمیاں باہنواں
میں کل ہک پرچھانوواں تکیا، میں کل ہک پرچھانوواں

وقت نماشاں د اسی، گجھ بھی صاف نظر نہ آیا
ہوکا پھر کے رہ گئی میں جدھ ساہ سنگ ساہ ٹکرایا
ہولیں ہولیں نیڑے آیا، ہولیاں چار نگاہواں
میں کل ہک پرچھانوواں تکیا، میں کل ہک پرچھانوواں

کہنلم، کہنلی جان سی ماہری، اوہ ہک بانکا راہی
نا پچھیا، نا تکیا، آپے بن بیٹھا چن ماہی

اسراں لکيا، کونج بچاری کھیری بازاں ، کاناواں
میں کل ہک پرچھاناواں تکیا، میں کل ہک پرچھاناواں

کھندا سی اوہ نال میرے توں کردل اپنا سانجھا
توں ہیں ماہڑی ہیر سیانی، میں دیوانہ رانجھا
لکھیا ہے میں اپنے دل تے تیرا ہی سرناواں
میں کل ہک پرچھاناواں تکیا، میں کل ہک پرچھاناواں

آکھن لکيا، عمراں ہونیاں، بیٹھ اڈیکاں
نا تده سُنیاں آہواں ، ہوکے، نا فریاداں چیناں
تیرے لئی میں سجدے کرکے، منگیاں روز دعاواں
میں کل ہک پرچھاناواں تکیا، میں کل ہک پرچھاناواں

سچ، سچ دا شہزادہ سی اوہ ، ایہہ گل منو میری
ہک مدت تھیں میں بھی اُس دے ناں دی تسیج پھیری
دل کردا سی میرا ، اُس دے قدماں بچ دل ڈاہواں
میں کل ہک پرچھاناواں تکیا، میں کل ہک پرچھاناواں

اس دے بعد نا پُچھو سَکھیو! کے گل باتاں ہوئیاں
مرمر کے میں جیندی رہیاں، جی جی کے میں مویاں
ہک پل خوش ہو کے پچھتاواں، ہک پل میں شرمانواں
میں کل ہک پرچھانواں تکیا، میں کل ہک پرچھانواں

لو، لو دے بچ رستہ پُٹنا، لو لو مُڑ، کھر جانا
نہیہ تاں ساری عمر ہنیرے بچ بہہ کے پچھتانا
رب ڈاہڈا مُچ چرکا ساحل! کردا معاف خطاواں
میں کل ہک پرچھانواں تکیا، میں کل ہک پرچھانواں



کس کو دساں حال؟

کوئج بچھڑ گئی، قسمت سڑ گئی، پیار ہو یا پامال
تیرے، میرے راہ بچ بہہ گئے دشمن ڈاہ کے جال
نا کوئی دردی اگے، کچھے، نا کوئی ساتھی نال
کس کو دساں حال نی ہیرے! کس کو دساں حال

کالے ڈھونگے کھوہ دے اندر ساتھی چھوڑ کے ٹر گئے
بے دردی، سنگدل ہر ناطہ، رشتہ تروڑ کے ٹر گئے
خط، پیغام نا ملیا کوئی، لنگھ گئے کتنے سال
کس کو دساں حال نی ہیرے! کس کو دساں حال

دو روہاں کو جوڑن دے لئی، میں لکھ جنگاں لڑیاں
پیراں دے بچ پے گئی بیڑی، ہتھاں بچ ہتھ کڑیاں
چور ہوئے شمشیراں نیزے، بچ گئی ہر ہک ڈھال
کس کو دساں حال نی ہیرے! کس کو دساں حال

تیرے ناں دی لگن لگی تاں چھٹ گئی دنیاں ساری
تاج، حکومت بیچ، بٹائے، لت تختاں کو ماری
درتیرے دا جوگی بنیا، رکھ رستے بیچ تھال
کس کو دساں حال حال فی ہیرے! کس کو دساں حال

دل دے اندر ناں تیرے دے نغے، گیت سمبھالے
اگے تیرے نجدے، نجدے پے گئے پیراں چھالے
جوڑے ماہڑے گیتاں سنگ ناتھ اپنے سر، تال
کس کو دساں حال حال فی ہیرے! کس کو دساں حال

بس گئی دل دے اندر رتیرے رُخساراں دی لالی
چن مکھڑا تہ قد سرو دا، اکھ چھنگالاں والی
ہک واری پھر دیکھاں تیری موراں والی چال
کس کو دساں حال حال فی ہیرے! کس کو دساں حال

اپنے آل، دوالے لہیا میں اپنی منزل کو
تیرا مکھڑا تکیں، تکیا کھاڑی اُپر تل کو

سینے بچ اس دل نے ماری مچھیاں واہنگوں چھال
کس کو دساں حال فی ہیرے! کس کو دساں حال

نا مکن دے امیداں کو، ناٹن دے آساں
ہک دن ہجر، جدائی مکیسی، رج رج جھیاں پاساں
نا رو مترا، نا کر ضائع ایہہ ہنجواں دے لال!
کس کو دساں حال فی ہیرے! کس کو دساں حال

تیدی گرمی دے موسم سُن کھائی ماہری جان
راہ ساحل دی بہہ گئے مل کے داروغے، دربان
میں ہاں جموں پنجرے اندر، توں رہ گئی اڑ حال
کس کو دساں حال فی ہیرے! کس کو دساں حال؟

اتھروں کھڑا پونچھے...؟

مطلب دے سوداگر بہہ گئے مل کے گلیاں، کوپے
بے یاراں تہ مسکیناں دے اتھروں کھڑا پونچھے!

کیوں کوئی ماہڑے ہجر، وچھوڑے بچ روئے، پچھتاوے
 کیوں کوئی ماہڑے درد دے کیتے اپنا ہوش گماوے
 جیواں یا مر جانواں میں، کوئی اتنا بھی کیوں سوچے؟
 بے یاراں تہ مسکیناں دے اتھروں کھیڑا پونچھے!

مُج تیرے ناں منٹاں منیاں، پڑھیاں روز نمازاں
 اج بھی ماہڑی غیرت سُن دتیاں آوازاں
 ہجر و جدائی بچ کوئی اپنی بوٹی بوٹی نوچے؟
 بے یاراں تہ مسکیناں دے اتھروں کھیڑا پونچھے!
 پھیڑا ویلا آیا، اج کجھ گدڑ، چیتے بن گئے!
 جھیڑے گدے، بگدے آسے، چُپ چُپتے بن گئے
 کاگاں دے سر بلبل چڑھ گئے، چڑیاں، باز دبوچے
 بے یاراں تہ مسکیناں دے اتھروں کھیڑا پونچھے!

پیارے پیارے مکھڑے تک کے نا کوئی تھوکھا کھاویں
 زہر پیالہ پی مر جاویں، دل نہ کسے سنگ لاویں
 مہلک سب ہتھیاراں نہاں دے، سب ہتھکنڈے اوچھے
 بے یاراں تہ مسکیناں دے اتھروں کھیڑا پونچھے!

کے لینا، کے دینا یارو! ظالم دے بازاروں
سر نیواں کر کے لنگھ جانا دلبر دے درباروں
کھیڑی بانہہ بچ اتنا دم ہے، اس گردن تک پونچے
بے یاراں تہ مسکیناں دے اتھروں کھیڑا پونچے!

جس چہرے کو چن سمجھ کے واہنگ چکوری تکیا
اس چہرے سُن ساحل! ماہڑا مان نہ کوئی رکھیا

جس ہتھ کو میں بوسے دتے، اس ہتھ زخم کھروچے!
بے یاراں ہور مسکیناں دے اتھروں کھیڑا پونچے!

میری اڈ گئی کوئل کالی وے

میری اڈ گئی کوئل کالی وے
میری رہ گئی ڈالی خالی وے
میں کس گلشن دا رکھا نی؟

میں کس باغے دا مالی وے
میری اڈ گئی کوئل کالی وے...



میں تِلا تِلا چُنیا سی
پھیر کوئل دا کھنر بُنیا سی
رَت اپنی دے کے پالی وے
میں کس باغے دا مالی وے
میری اڈ گئی کوئل کالی وے...



کس ڈالی کوئل جا بیٹھی
اوہ کھنڑا کھنر سجا بیٹھی
ہُن ہُونڈاں میں کس ماہلی وے
میں کس باغے دا مالی وے...!
میری اڈ گئی کوئل کالی وے...



آجا سوہنے ماہی آجا

گل بچ پے گئی پھاہی آجا
آجا سوہنے ماہی آجا

ٹٹ گئی ماہری لیر سلیٹی
لٹ گئی کوہساراں دی بیٹی
مڑ شہراں دے راہی آجا
آجا سوہنے ماہی آجا

ہجراں اندر جنڈری رُل گئی
اکھیاں والی گاگر دُھل گئی
چھٹ گیا تختِ شاہی آجا
آجا سوہنے ماہی ، آجا
من بچ تیرے پیار دی آری

تن دی دشمن دنیا ساری
بن کے ٹھول، سپاہی آجا
آجا، سوہنے ماہی! آجا

سر گئی ارماناں دی نگری
کھنچ گئی پریت بھی سحری سحری
مچ گئی خوب تباہی آجا
آجا، سوہنے ماہی، آجا

نا کوئی سنگی، نا کوئی ہدم
نا کوئی ماہڑے دل دا محرم
دلیسی کون گواہی، آجا
آجا سوہنے ماہی! آجا

دس تاں سہی، توں کدھ آسیں گا
اُٹھ گئی محفل، تَدھ آسیں گا!

نا کر ایہہ گمراہی آجا
آجا سوہنے ماہی ، آجا

زخماں دا بازار مرا دل
ڈھونگا ساگر، دور ہے ساحل
نہ کر لاپرواہی! آجا
آجا سوہنے ماہی! آجا



چل دور زمانے تھیں (دوگانا)

ماہڑا لگدا نہیہ اتھے دل بجنی!
توں چھوڑ کے ایہہ محفل بجنی!
چل دور زمانے تھیں
اس دیس بگائے تھیں

کیناں لگدا نہیہ تیرا دل بجنی!
کیناں چھوڑ دے ہو محفل بجنی!
ایہہ ہے دنیا حسین بڑی
دم لے لے کھڑی، دو کھڑی
ایہہ جہان بزار ہے نفرت دا
اتھے ناں نہیہ کدھرے اُلفت دا
چل دور زمانے تھیں
اس دیس بگائے تھیں
ذرا رُک، نظراں تہ ملا بجنی!
اتھے اپنا جہان بسا بجنی!
ایہہ ہے دنیاں حسین بڑی

دم لے لے کھڑی، دو کھڑی

میں مسافر دور مکانات دا
نہیں رکنہ کم جواناں دا
چل دور زمانے تھیں
اس دیس بگائے تھیں

میں دُبیَا غم دیاں موجاں بچ
بدنام ہے ساحل لوکاں بچ
چل دور زمانے تھیں
اس دیس بگائے تھیں

☆☆

فریب.....گیت

توں بھی ہیں فریب، تیرا پیار بھی چھلاوا ہے
یار بے وفا ہیں، ماہڑے دل دا ایہہ دعویٰ ہے

کہن کے سکون، ماہڑا، دتیاں ایہہ دوریاں
ساریاں مراداں تھ چھوڑیاں ادھوریاں
توں ہیں کول ماہڑے، ماہڑی اکھ دا پہلاوا ہے
یار بے وفاء ہیں، ماہڑے دل دا ایہہ دعویٰ ہے

اکھ دی شراب نہیہ، اوہ نظراں دا تیر سی
تیرے نال میل ہويا، پھیر سی تقدیر سی
مٹھری اواز تیری، موت دا بُلاوا ہے
یار بے وفا ہیں، ماہڑے دل دا ایہہ دعویٰ ہے

رُک میں نہ پایا، مکور و کدے رہے لوک وے
تن کو تہکھا کے تو ہڑے پورے کیتے شوق وے
اج ماہڑی راہ دے بچ، خاک دا بچھاوا ہے
یار بے وفا ہیں، ماہڑے دل دا ایہہ دعویٰ ہے

چھوٹھیاں محبتاں کو دل بچ پالیا
تکو سینے لاکے جیویں سب سینے لالیا
توہڑیاں اداواں اُتے زہر دا سجاوا ہے
یار بے وفا ہیں، ماہڑے دل دا ایہہ دعویٰ ہے

تکو ویکھ، اکھیاں دا صدقہ اتاریا
کھڑ، جند، جان سب، تیرے اُتوں واریا
تُدھ باہیا سنگ کسے ہور دے کلاوا ہے
یار بے وفا ہیں، ماہڑے دل دا ایہہ دعویٰ ہے

کر کے ہمار، کدیں پچھیا نہ حال بھی

موسماں دے نال تہہ بدلے خیال بھی
اج ماہری موت اُتے اپنا بھی دکھاوا ہے
یار بے وفاء ہیں، ماہڑے دل دا ایہہ دعویٰ ہے

چھوڑ کے طُفاناں بچ ساحل اُتے سو گئے
لاکے ماہڑے نال یاری، بے ایمان ہو گئے
بجناں دے کن باہیا کس ایہہ سکھاوا ہے
یار بے وفاء ہیں، ماہڑے دل دا ایہہ دعویٰ ہے

آجانی چکور یے

آجا نی چکوریئے! چن چڑھیا
ٹھنڈی ٹھنڈی رات بچ دل سڑیا

کالیاں کھٹاواں، توہڑی زلفاں دا جال ہے
چن جیہا مکھڑا ہے، یا توہڑا جمال ہے!
کھاڑیئے دے تل ماہڑا دل کھڑیا
ٹھنڈی ٹھنڈی رات بچ دل سڑیا

مٹھڑیاں یاداں کیتا سینہ چور چور دے
سامھہ کے میں رکھے سارے زخم حضور دے
کالا، لماں ہجراں دا سپ لڑیا
ٹھنڈی ٹھنڈی رات بچ دل سڑیا

رات دی بھی رانی توں ہیں، دن دی بہارتوں
اکھیاں دا نور، ماہڑے دل دا قرارا توں

میں تو ہڑا، خیالاں بچ بُت کھڑیا
ٹھنڈی ٹھنڈی رات بچ دل سڑیا

میں تو ہڑی اڈیک بچ جنڈی گمائی وے
لائی تو ہڑے نال یاری، یاری کنیاں لائی وے
سارا جگ چھوڑ، تیرا ہتھ پھڑیا
ٹھنڈی ٹھنڈی رات بچ دل سڑیا

پہل گئے تسی تاں چناں ساریاں تریکاں نی
شام تھیں سویرے مکو، تیریاں اڈیکاں نی
قافلہ مسافراں دا کھڑ مڑیا
ٹھنڈی ٹھنڈی رات بچ دل سڑیا

شرمیلی اکھ کو تہ نک دی کٹار کو
نظر زمانے والی لگ گئی پیار کو
جادو ایہہ جدائیاں دا کس پڑھیا
ٹھنڈی ٹھنڈی رات بچ دل سڑیا

ساحل کولوں اُچی ہوئی موجاں دی روانی اج
چانی دا رنگ ہويا پيلا دل جانی اج
سوہنیاں کو پار لے کے آجا کہڑیا
ٹھنڈی ٹھنڈی رات بچ دل سڑیا



رُت بہاراں دی



باغاں دے بچ کول بولے، کٹھیاں پھریا پانی
جنگل جنگل پکھنوں بولن، کر کے چھب مستانی
چک لے تھوڑا آٹا چاول، گاگر ہور مدھانی
آگئی رت بہاراں والی، ٹھوک چلاں دل جانی

مرگاں ٹر گئے آند، گواہنڈی، بستی ہوگئی خالی
ڈنگر، بچھے کھاگئے سارے کھیتاں دی ہریالی
اس جا ماہڑا دل نہیہ لگدا، نہ کرتوں من مانی
آگئی رت بہاراں والی، ٹھوک چلاں دل جانی

دُودھ، مکھناں دا موسم آیا ر پُہر پُہر بنڈاں پھانڈے
چھیڑن لگے راگ دلاں دے مست ہوا دے پھانڈے
رستہ تیرا تک تک بلیا! مرگئی میں مرجانی
آگئی رت بہاراں والی، ٹھوک چلاں دل جانی

باہنواں کھول بلاندی ہے اج نیلی نیلی ماہلی
نغمے ماہرے ناں دے گاندے بلبل ڈاہلی، ڈاہلی
مرجاساں، جے اج وی ناتھ دل دی رمز پچھانی
آگئی رت بہاراں والی، ٹھوک چلاں دل جانی

زلفاں واہنگوں کالے جنگل، لمے لمے بوٹے
تیرے لئی میں پہننگاں لائیاں، آ لے لے دوچھوٹے
رل مل دوہاں نے جنڈی دی بیڑی پار لنگھانی
آگئی رت بہاراں والی، ٹھوک چلاں دل جانی!

کم زیادہ ہین، ویلا تھوڑا، جلدی، جلدی ٹرنا
منزل اُپر پہار پہچا کے پھر واپس کھر مڑنا

رُتاں بدلن، موسم بدلن، مکدی جائے جوانی
آگئی رت بہاراں والی، ٹھوک چلاں دل جانی

شہر تیرا ہے تہواں، تہواں، ایہہ کس دا دل سڑدا؟
شور شرابہ چار چو فیری، سپ بن بن کے لڑدا
تیری بستی ہن نیہہ بسدی میں پہاڑاں دی رانی
آگئی رت بہاراں والی، ٹھوک چلاں دل جانی

ساحل! جلدی مڑ وطنان کو، چھڈ دے دیس بگاہ
تیرے باہجوں اس گوری دی قیمت نیہہ ہک آنہ
توں ہک پیار دا چڑھدا دریا، میں ہک موج طفانی
آگئی رت بہاراں والی، ٹھوک چلاں دل جانی!



اورب ڈاہڈے!

(مزاحیہ)

دنیاں جنگی، دنیاں والے ہو گئے چغل خور
اورب ڈاہڈے! تیری دنیا بچ جیواں کس طور
لوکاں نے دستور بنایا، اپنا چھڈ، بیگانہ کھا
دو بجے دے کھراگ تھکھا کے اپنے کھربچ چانن باہ
حاکم سارے تھلے بہہ گئے، کرسی اُپر چور
اورب ڈاہڈے! تیری دنیا بچ جیواں کس طور

ناچنری، نا چادر کدھرے، نا آنچل، نا دامن ہے

ابرو، پلکاں، بال کٹانا، ایہہ کڑیاں دا فیشن ہے
نک، کن کٹ کے سرکٹاؤن، مرضی تے کہہ زور
او رب ڈاہڈے! تیری دنیا بچ جیواں کس طور

”فیشن شو“ بچ ریپ دے اپر لک مٹکا کے ٹرنا سکھ
جٹی، سنڈل تھلے رکھ دے، سیٹی سن کے مڑنا سکھ
کس نے تکی پنڈوگڑیے! تیری بانگی ٹو ر
او رب ڈاہڈے! تیری دنیا بچ جیواں کس طور

کالج دا ناں لے کے سارا دن گزارن راہواں بچ
کھلم کھلا پھر دے رہندے باہنواں باہ کے باہنواں بچ
نا شرمندے، نا کہہ براندے، نا کوئی چکدا شور
او رب ڈاہڈے! تیری دنیا بچ جیواں کس طور

رسم چلی ہے حق غریباں ہور مسکیناں دا کھانا
بدمعاشاں کو عہدے ملدے، ہور شریفان کو تھانہ
سچ لکھ لکھ کے کٹوا لئے میں، دس انگلاں دے پور
او رب ڈاہڈے! تیری دنیا بچ جیواں کس طور

سجے آکھو، کھجے جاندے، اکڑا نہاں دی مُکدی نہیہ
سج آکھن وِ دوان، سیا نے عادت مندی چھڈی نہیہ

کم عقلاں کو وعظ، نصیحت کر، کر ہو یاں بور
او رب ڈاہڈے! تیری دنیا بچ جیواں کس طور

ناتن تھکیا، نامن پچیا، نا میں چھڈیاں اُمیداں
جس کُہر ساحل! ماتم ہوندا، اس کُہر بھی آون عیداں
ہک دن آسی، جد پے جاسن چوراں اتے مور
او رب ڈاہڈے! تیری دنیا بچ جیواں کس طور



ماں اگے فریاد...

نکی عمری بچ ہک پُھل اجاڑ دتا
مائے نی میرا کنڈیاں دامن پاڑ دتا

تیرے میرے بچ اچیاں دیواراں نے
بجلی واہنگوں چمکدیاں تلواراں نے
ہجر تیرے دی اگ سُن سینہ ساڑ دتا
مائے نی میرا کنڈیاں دامن پاڑ دتا

رنگ رنگ دا گُل بوٹا، میوہ لایا سی
اپنے ہتھاں میں ہک باغ سجایا سی

قسمت نے دل دا ہر پھل اُجاڑ دتا
مائے نی میرا کنڈیاں دامن پاڑ دتا
ماہڑے گورے رنگ نے بھی مکو لٹیا
مکھن نوں بے ایماناں نے گھی کر سٹیا
سجرے تن کو دُده سمجھ کے کاہڑ دتا
مائے نی میرا کنڈیاں دامن پاڑ دتا

بے قدراں کو میں چا دتا اپنا دل
ہن روون، پچھتاون بچ ہے کہہ حاصل
اپنے ہتھوں، اپنا کم بگاڑ دتا
مائے نی میرا کنڈیاں دامن پاڑ دتا

ماہڑی خواہش سی ہک دل بچ بسنے دی
سپاں کو جلدی ہوندی ہے ڈسنے دی
پیار میرے دے بدلے لکھ کھلواڑ دتا
مائے نی میرا کنڈیاں دامن پاڑ دتا!

میں منگیاں سن سائل! کچھ ٹھنڈیاں چھانواں
ہتھ ماہڑے لگا ہک چھوٹھا پر چھانواں
ساون دے بدلے ہک تپدا ہاڑ دتا
مائے نی میرا کنڈیاں دامن پاڑ دتا



چن چکوری!

نا کوئی زبردستی کیتی، نا کوئی سینہ زوری
قدرت نے دے دتی میرے ہتھ بچ تیری ڈوری
ونگاں نال سجا کے پھڑ لئی وینی تیری گوری
چن چکوری، اس دنیا بچ ملدے چوری چوری

تیرا، میرا بت بنیا سی جنت دے باغے بچ
تقدیراں دا میل بنا کے بنھیا ہک تہاگے بچ
ست اسمانوں اُتری ماہیا! تیری میری جوڑی
چن چکوری، اس دنیا بچ ملدے چوری چوری

اپنی یاری ویکھ کے سارے ایویں سڑ دے رہندے
راہواں ڈکدے، اگ تہکھاندے، ہورا کڑدے رہندے
ہتھ مل مل کے کردے رہندے دشمن چغل خوری
چن چکوری، اس دنیا بچ ملدے چوری چوری

آجا دل دا رلجہ بن کے، لے جا اپنی رانی
تیرے ناں کردتا اپنا تن، من جند جوانی
دل دی دنیا دا حاکم ہے نا باہر، نا غوری
چن چکوری، اس دنیا بچ ملدے چوری چوری

زلفاں دی چھاں دیدے اپنی، رکھ دے بانہہ سرہانے
ماہڑے لئی چھکا دے اج توں اکھیاں دے پیانے
زخمی دل کو چین آجاوے، گا ہک مٹھڑی لوری
چن چکوری، اس دنیا بچ ملدے چوری چوری

کھول دے اج دل دا دروازہ، کھول دے اج دو بانہواں
آمیں اپنے سینے لاکے ہر ارمان مٹاواں
ست رنگی، رنگ دیواں تیری چادر کوری کوری
چن چکوری، اس دنیا بچ ملدے چوری چوری

اج نفرت دے قلعے اُپر پیار دا جھنڈا چڑھیا
اج رانجھے سُن اپنے دوارے ہیر دا ڈولا کھڑیا
ساری دنیا من گئی ساحل! اج تیری شاہزوری

چن چکوری، اس دنیا بچ ملدے چوری چوری

ہامیر.....

چنگ سیالاں ٹھونڈوہ کچھ نیلے اندر جاؤ
تخت ہزارے دے شہزادے کو پیغام سناؤ
ہجرتیرے دے ہاڑے نے فکراں بچ ہیر ڈبوئی
سارے کیدو بن گئے تہ رانجھا نا رہیا کوئی!

بستی سعدے کھڑے دی دوزخ دا ہک نمونہ
پہریا سپاں ناگاں تھیں اس کھر دا کونہ کونہ
دیس بگانے بچ میں بنناں! پھردی موئی موئی
سارے کیدو بن گئے، تہ رانجھا نا رہیا کوئی!

میرے آل دوالے بہہ گئے سوداگر شیدائی

جوگن تیری لٹ جاسی گی، جے تده دیری لائی
ماہڑے نازک تن پر پچھی نا چادر، نا لوئی
سارے کیدو بن گئے، تہ رانجھا نا رہیا کوئی!

ڈورے کنناں بچ اج تیری بنجلی دے سُر بجدے
سونا چاندی، محل بچے، سارے مندے لگدے
ہر دم اس جا یاد کراں اکھیاں بچ ہنچ لکوئی
سارے کیدو بن گئے، تہ رانجھا نا رہیا کوئی!

کر فریاداں ہار گئی، نا رحمت دا درگھلیا
ہر گز کافر نا آکھیں جے سجدا رب دا پُہلیا
اپنی تسبیح دے تہاگے بچ تیری یاد پروئی
سارے کیدو بن گئے تہ رانجھا نا رہیا کوئی!

ہک تیر کلیجے مار گئیں، کیوں رُس کے گلیوں پار گئیں
کیوں سچرا پیار بھار گئیں، کیوں اس دنیاں تھیں ہار گئیں
لے ہجر، دے کھوہ بچ ساحل! میں دیوانی ہوئی

سارے کیدو بن گئے، تہ رانجھا نا رہیا کوئی!



ماہی دے وطنائ

کھٹیاں، مٹھیاں بیریاں
گجھ تیریاں، گجھ میریاں
آ چل پھر سبناں! چلیے ندیوں پار وے
ماہی دیاں وطنائ آئی مست بہار وے

پیار دی منزل دُور بھی ہے
اس نگری دا دستور بھی ہے
جگ جیتن والے، جاندے نے دل ہار وے

ماہی دیاں وطناء آئی مست بہار وے

نا ہجر، جدائیاں دے چھالے
نا دنیا، نا دنیا والے
بس دودل ہوون، اکھیاں ہوون چاروے
ماہی دیاں وطناء آئی مست بہار وے

چل میلے سوئی حیاتی دے
تیرا ناں لکھواساں چھاتی تے
تیرے لئی لیساں چُنری گوٹے دار وے
ماہی دیاں وطناء آئی مست بہار وے

کشتی کو کنارہ مل جاسی
بیماراں کو چین آجاسی
ہک وار چلا دے دل تے نین کٹار وے
ماہی دیاں وطناء آئی مست بہار وے

ہک ہاسے تے قربان گیا
میں پہنیت دلاں دا جان گیا
دل بچ اقرار ہے، بلیان تے انکار وے
ماہی دیاں وطناء آئی مست بہار وے

میت کوئی، نا کوئی سخی!
اس باغے اندر چار بکھی
سر اُپر نچدی ہک ننگی تلوار وے
ماہی دیاں وطناء آئی مست بہار وے

کونجاں وانگوں گر لاندی ہے
وعدے کر کے پُہل جاندی ہے

تہو کھے دیندی ہک چھیل چھیلی ناروے
ماہی دیاں وطناء آئی مست بہار وے

ہے وطن مرا کشمیر میاں!
میں اُس باہجوں دلگیر میاں
فریاد میری نہیہ سُندی ایہہ سرکار وے
ماہی دیاں وطنآں آئی مست بہار وے

عمرآں دے ہجر، وچھوڑے نی
اس جندڑی دے دن تھوڑے نی
بے درد نصیباں ساحل! دتا مار وے
ماہی دیاں وطنآں آئی مست بہار وے



رُت ساون دی!

کٹھیاں، ندیاں دھوم مچائی، دریاواں بچ بلچل
پنچھی، پکھنوں شور مچاندے ماہلی ماہلی اجکل
نغمے چھیڑے تیز ہواواں، بدلاں بزم سبائی
ساون دی رت آئی ہے، اج ساون دی رت آئی

مڑ، مڑ پھر وطنان نوں آگئے پردیسی، سیلانی
درد، فراقاں بچ رو رو کے ہوگئی اکھ نمائی
یاداں دے سوہنے میلے بچ ہجراں گل گمائی
ساون دی رت آئی ہے، اج ساون دی رت آئی

درد دلاں دے جاگ اٹھے، ارماناں ٹیساں کڈھیاں
روان، رواں ماس بدن دا، چورا، چورا ہڈیاں
چُپ رہ کہہ مرجانا بہتر، آکھن بچ رسوائی
ساون دی رت آئی ہے، اج ساون دی رت آئی
کچیاں عمراں، مستی دے دن، تن، من کھلم، کھلے

مٹھیاں، مٹھیاں گلاں کریئے، بیٹھ چناراں تلے
رم جم کردی اس بارش سُن دل بچ اگ تھکھائی
ساون دی رُت آئی ہے، اج ساون دی رُت آئی

سجناں رشتے تروڑ دتے، پردیسی ہوئیاں سکھیاں
جوگن واہنگوں ڈاہ کے بہہ گئی رستے دے بچ اکھیاں
اُجڑی، اُجڑی دل دی بستی، ہر پاسے تنہائی
ساون دی رُت آئی ہے، اج ساون دی رُت آئی

بلبل واہنگ چن بچ پھر دا ہک آزاد پرندہ
قید و قفس چُج پہارے پے گئے، مر مر ہوئیاں زندہ
شکر خدا دا، سوہنے سجنا رَج رَج عید منائی
ساون دی رُت آئی ہے، اج ساون دی رُت آئی

اس پیارے موسم بچ سجناں! یاد تیری تڑپاوے
بن بن کھنگی کو کو کردی، دل میرا دُب جاوے
کول گا گا گیت سناندی، میت میرا ہر جائی

ساون دی رُت آئی ہے، اج ساون دی رُت آئی

باہ لئی سر تے چُڑی تیری، لا کے سُرْمہ، لالی!
تیرے رنگ بچ رنگ کے ہوگئی چال چہنگالاں والی
شیشہ تکیں تکیں مُنڈیا، اج گوری شرمائی
ساون دی رُت آئی ہے، اج ساون دی رُت آئی

اللہ جانے، میت میرے دی کتنی دور ہے منزل
پریت، پریت، بستی بستی ٹھونڈاں اپنا ساحل
میں اسدی نادان چکوری، اوہ اوہ ماہڑا چن ماہی
ساون دی رُت آئی ہے، اج ساون دی رُت آئی

☆☆ (ڈسٹرکٹ جیل امپھلہ، جموں ۱۱/اگست ۲۰۰۷)

میں تیرے کُھر جانا!

تہیاں ہوں تہن پرایا، بڑیاں دا فرمانا
آگئی دل دی گل بلیاں تے، اج نہیہ میں شرمانا
ہمت کر کے پکڑ ماہڑی وینی شیر جونا!
میں تیرے کھر جانا بھنا! میں تیرے کھر جانا

تیرا کھر، تیرا چوبارہ، ایہہ ہے میرا گھنا
ایہہ کھر ماہڑے پیکے دا ہے، میں نہیہ اتھے رہنا
چھڈ دے ہن توں لگ، چھپ ملنا، لگ چھپ آنا، جانا
میں تیرے کھر جانا بھنا! میں تیرے کھر جانا

ماں، بابے سُن سال اٹھارہ دُده، کھناں سنگ رکھیا
رُت بدلی تہ مٹھڑا میوہ پیار تیرے دا چکھیا
گاگر بن کے ارماناں دی، تیرے تے دُھل جانا
میں تیرے کھر جانا بھنا! میں تیرے کھر جانا
میں اج توڑیں ملدی رہیاں لگ، چھپ ویراں کولوں
تیرے لئی تعویذاں، تہناگے منگے پیراں کولوں

تیرے ناں لکھوایا عمری دا میں پانی، دانا
میں تیرے کُہر جانا سبنا! میں تیرے کُہر جانا

نظراں ملیاں، تیر چلے، تاں کھل گئے دل دے تالے
اکھیاں دے سنگ تھے چُٹھے، دل بچ خط سمبھالے
تیرے ناں لکھ سٹیا اپنی جندڑی دا افسانہ
میں تیرے کُہر جانا سبنا! میں تیرے کُہر جانا

فکراں دے بچ پے گئے اپنے، غیراں مارے طعنے
اماں، بابا، پھین، پہرا تہ نالے چاچے، تائے
کدھ تک چُپ، چُپتی تکاں میں اندا گُرلانا
میں تیرے کُہر جانا سبنا! میں تیرے کُہر جانا

ماہڑے نک بچ رج رج مارے لونگ تیرا لشکارے
میرے متھے سج گئے ٹھولا! تیرے ناں دے تارے
میں بوہٹی، توں بن جا شوہالہ، سکھیاں نچنا، گانا
میں تیرے کُہر جانا سبنا! میں تیرے کُہر جانا

ساحلِ سجناں! اج ارماناں دی بارات سچی ہے
اج ماہڑے دل دی منجلی پنج مٹھڑی تان بجی ہے
تیرا چولا گل پنج باہ کے چھڈیا دیس پرانا
میں تیرے کھر جانا سجناں! میں تیرے کھر جانا



ہیر چڑھی چو بارے!



میلہ لکيا تيرے آنگن، تہرتی سچ گئے تارے
جان ہتھیلی اُتے کھن کے آگئے ہجراں مارے
تیری حویلی اگے کرسن اج جگراتا سارے
اج اسمانی چن نہیہ چڑھسی، ہیر چڑھی چوبارے

بستی بستی اگ تہکھاندی تیری تیز جوانی
مہنگی نا پے جاوے بیٹھی ایہہ تیری من مانی!
ہار کے بہہ گئی پلس ساری، فوج منگی سرکارے
اج اسمانی چن نہیہ چڑھسی، ہیر چڑھی چوبارے

ڈر لگدا ہے حسن تُو نہ بن جاوے افسانہ
سارے شہر نے دیکھی تیری ٹور، ہويا مستانہ
انگ انگ تیرا لاٹاں مارے، دل پر چلدے آرے

اج اسمانی چن نہیہ چڑھسی، ہیر چڑھی چوبارے

تیری چُنری بچ دسدے کشمیر دے باغ، بچے
تیرے ہاسے اُپر کھلدے دل دے بند درتچے
سر، اکھیاں تے چانواں نخرے، ناز تیرے دلدارے!
اج اسمانی چن نہیہ چڑھسی، ہیر چڑھی چوبارے

دل دا سودا کر کے میں سنگ تیرے لائی یاری
اپنی جوڑی دی دشمن کیوں بن گئی دنیا ساری
ایویں ہی راگیراں دے کیوں چڑھدے رہندے پارے
اج اسمانی چن نہیہ چڑھسی، ہیر چڑھی چوبارے

تیرے لئی شہزادے! گل بچ باہیاں پھٹیاں لیراں
تیرے ناں کردتے اپنے باغ، محل، جاگیراں
چھول مری بچ باہ دے اپنے سب ارمان کنوارے
اج اسمانی چن نہیہ چڑھسی، ہیر چڑھی چوبارے

دُور اُدیکاں والا پینڈا، مَچُ دل ماہڑا سڑیا
پے گئی شام جدائیاں والی، پُہانڈا بھی نا پُہریا
نازک جندڑی کو کھا جاندے بھر، وچھوڑے پُہارے
اج اسمانی چن نہیہ چڑھسی، ہیر چڑھی چوبارے

مُرُ وطن کو اوہ پردیسی! لگیاں پھر برساتاں
ساحل! سبناں، سَپنی وانگوں دس دس جاون راتاں
بے رنگ ہو رہے رونق لگدے تیرے بانج نظارے
اج اسمانی چن نہیہ چڑھسی، ہیر چڑھی چوبارے



کون دلاں کو جوڑے؟

رب نے آپ بنا کے جوڑے، کیوں دکھ رہے کر چھوڑے

کون دلاں کو جوڑے ربا! کون دلاں کو جوڑے

اکثر پنچھی کیوں لا لیندے شاخ بگانی ڈیرا
اکھیاں دی لو، دو اکھیاں کو کیوں دے جان ہنیرا
یاد تڑی بچ دل دے ارماں، ہنجواں راہ نچوڑے
کون دلاں کو جوڑے ربا! کون دلاں کو جوڑے

ہر ساون بچ میں تیرے لئی اپنا آپ سجایا
جس ساون دی میں راہ نکدی، اوہ ساون نہ آیا
کس ہتھ بچ ہے اتنی طاقت ویلے دا رخ موڑے
کون دلاں کو جوڑے ربا! کون دلاں کو جوڑے

تیز ہوا سنگ مہینڈیاں گھلیاں، دُھل دُھل جاوَن اکھیاں
تیرا ناں لے لے کے سبناں! روز ستاون سبیاں
کس کو آکھاں، کس دے اگے کھولاں دل دے پھوڑے
کون دلاں کو جوڑے ربا! کون دلاں کو جوڑے

دو دن پیار، محبت کر لے، دو دن حسن، جوانی
دو دن تھیں زیادہ نہیہ رُکدا اس دریا دا پانی!
زُلفاں واہنگ جدائی لمی، دن جندڑی دے تھوڑے
کون دلاں کو جوڑے ربا! کون دلاں کو جوڑے

نال لب کھولاں، نا گُجھ بولاں، نا گُجھ پی واں، کھاناواں
ماہڑے بس بچ ہوئے تاں میں چُپ رہ کے مرجاناواں
چین ادھا پل لین نہ دیندے ایہہ ارمان گلوڑے
کون دلاں کو جوڑے ربا! کون دلاں کو جوڑے

ماہلی، ماہلی ٹھونڈاں میں ہور، بستی، بستی لوڑاں
نارُس میں تھوں، اگے تیرے میں اپنے ہتھ جوڑاں
ہُن میں بچناں! سہہ نہیہ سکدی ایہہ بیدرد وچھوڑے
کون دلاں کو جوڑے ربا! کون دلاں کو جوڑے

سوہنے تیرے وعدے، قسماں، سو ہنی تیری یاری

میں ساحل دے رستے تک تک عمر گزاری ساری
دل بچ بہہ کے، اپنا کہہ کے، رشتے، ناٹے تر وڑے
کون دلاں کو جوڑے رہا! کون دلاں کو جوڑے



ہجردی رات

بستی، بستی شام سویرے ہک دُھیاری گاؤے
ہجردی رات نا آوے رہا! ہجردی رات نا آوے

کونجاں دا ہک جوڑا تکیا میں کل کچھلی ماہلی
پنجاں جوڑ کے گلاں کردا، پھر دا ڈاہلی، ڈاہلی
ہسدے گاندے ہک دوجے سنگ ایہہ جندڑی نبھ جاوے
ہجردی رات نا آوے ربا! ہجردی رات نا آوے

غم دا ہاڑا اج پھیر چڑھیا، جند ماہڑی لے جاسی
وید ماہڑے زخماں دا، اللہ جانے کدھ تک آسی
جے میں مرگئی، لاش سجن دے باجھ نا کوئی چاوے
ہجردی رات نا آوے ربا! ہجردی رات نا آوے

کاش توہڑے کجھ کم آجاوے ماہڑا حسن، جوانی
اپنے سردی، تیرے لئی میں دے دیواں قربانی
اس چن ماہی دے قدماں بچ ایہہ گوری مرجاوے
ہجردی رات نا آوے ربا! ہجردی رات نا آوے

کس پردیسی دا ناں کہن کے کہنگی بن بن گاندی

کس مچھڑے ساتھی دے غم بچ ہک بلبل گرلاندی
کوئل دی ایہہ گو گو دل دے سٹے درد جگاوے
ہجر دی رات نا آوے ربا! ہجر دی رات نا آوے

میں سر نیواں کر کے رب تھیں منگیاں روز دعاواں
نہ کوئی رووے، نہ گرلاوے، جسراں میں گرلاواں
ماہڑے واہنگوں نا کوئی جگ بچ دل دے کے پچھتاوے
ہجر دی رات نا آوے ربا! ہجر دی رات نا آوے

گجدا، وجدا ساون آیا، پھر لگیاں برساتاں
گہر گہر دیوے بالے، نالے بنڈیاں سو خیراتاں
ماہڑے کھر دے نیڑے کدھرے اوہ رستہ پہل جاوے
ہجر دی رات نہ آوے ربا! ہجر دی رات نہ آوے

مرجانے ساحل سُن دتیاں، مٹھیا مٹھیاں یاداں
باٹے دل دا مالک سوہنا، نہیہ سندا فریاداں

ماہڑے واہنگوں رب اُس دے دل بچ بھی اگ تہکھاوے
ہجر دی رات نہ آوے ربا! ہجر دی رات نہ آوے



دُنیا ہک پر چھانوواں

ایہہ دنیا ہک پر چھانوواں یار
ہتھ خالی، مکیاں ساہواں یار!

ہک گل بچ مکیا افسانہ
چھڈ محفل، ٹُریا پروانہ

ہتھ جوڑے، ملیاں راہواں یار!
ایہہ دُنیا ہک پرچھانواں یار!

ہک پاسے کُہمن کھیری ہے
ہک پاسے رات ہنیری ہے
کس پاسے ٹھونڈن جانواں یار
ایہہ دُنیا ہک پرچھانواں یار!

روندی کوٹیا نیلے بچ
نت پھنس گئی جان جھیلے بچ
بٹیاں سنگ سر ٹکراواں یار
ایہہ دُنیا ہک پرچھانواں یار!

بانہواں دے ہار بناواں میں
رستے بچ زلفاں ڈاہواں میں
سر اکھیاں کھول، کھمانواں یار

ایہہ دُنیا ہک پرچھانواں یار!

یا ڈکیا اُچیاں لہراں سُن
یا چہنگ، سیالی قہراں سُن
یا تھل بچ، گل مرجانواں یار
ایہہ دُنیا ہک پرچھانواں یار!

کیوں رُس کے گلیوں پار گئیں؟
کیوں سجرہ پیار بزار گئیں

بچ یاد تری، مر جانواں یار
ایہہ دُنیا ہک پرچھانواں یار!

مقبول! توں ساحل چھوڑ کے آ
بچ دُنیاں ماہری، دوڑ کے آ
رج دل دا حال سُنانواں یار

ایہہ دُنیا ہک پرچھانواں یار!



سوکن نالے آویں!

میں مرجاساں پھاہی لا کے پھر بیٹھا پچھتاویں
سوکن نہ لے آویں اڑیا! سوکن نالے آویں!

لگھاں بچوں پُچن کے سبھاں بابل نے لڑ لایا
چھوڑ کے اپنے سارے رشتے، کھر تیرا چکایا
جان پہاویں کڈھ لیویں ماہری، مُول نا دل تڑپاویں

سوکن نہ لے آویں اڑیا! سوکن نہ لے آویں!

روز سویرے ہتھ ہلاکے سبناں! 'بائی بائی' کرساں
سارا دن میں یاد تیری بچ ٹھنڈے ہوکے پُہرساں

شامی کم تھیں فارغ ہوکے سدھا کُہر آجاویں
سوکن نا لے آویں اڑیا! سوکن نا لے آویں!

سارے تیرے گہنے، کپڑے ماہڑے ہی تن سجدے
تیرے تحفے لے کے دل بچ ٹھول، نگارے سجدے
دل دے باغیچے بچ ماہیا! میں نجساں، توں گاویں
سوکن نہ لے آویں اڑیا! سوکن نہ لے آویں!

چور لُٹیرے پھر دے اجکل، گُنڈی دل کو لالے
لُٹ لیندے نے کُھٹ پلاکے، مکھ چٹے، دل کالے
اپنے کُہر، محلے دا توں رستہ نا پُہل جاویں

سوکن نہ لے آویں اڑیا! سوکن نہ لے آویں!

بدلے رنگ زمانہ یا پھر دنیا ظلم کماوے
بدل، بجلی، گرم ہواواں، یا پھر ہاڑا آوے
چُپ، چُپیتا آکے ماہرے خاباں بچ سو جاویں
سوکن نہ لے آویں اڑیا! سوکن نہ لے آویں!

نہ منکساں میں چھلے، چھاپاں، نہ بنگاں، نہ کنگھی
سِدھی، سادھی رہ کے بھی میں ہاں حوراں تھیں چنگی
لکھ بھی پہاویں نا دے بجنا! اکھ نا کدھرے لاویں
سوکن نہ لے آویں اڑیا! سوکن نہ لے آویں!

توں ہی ماہری منزل اڑیا، توں ہی ماہرا ساحل ہیں
باہجھ تو ہاڑے کسراں جیساں، میں ہاں جان نہ توں دل ہیں
زہر پہنا ویں دے دیویں ہس کے، پر نا قہر کماویں!
سوکن نہ لے آویں اڑیا! سوکن نہ لے آویں!



اوہکھا رستہ!

رات ہنیری، جان اکھلی، دُور سجن دا ڈیرا ہے
رستہ اوہکھا، کھلیاں ٹرنا، پینڈا دور بہتیرا ہے

جنگل، جنگل، بستی بستی اپنی جان بچانی ہے
اُس پیارے محبوب دی خاطر ایہہ جند، جان، جوانی ہے
اُس دی دُنیا، ابدی دُنیا ایہہ ہک رین بسیرا ہے
رستہ اوہکھا، کھلیاں ٹرنا، پینڈا دور بہتیرا ہے

جدھ میں آیاں اس دُنیا بچ، میں رونداساں، سب ہسدے سن

اج میں رخصت ہوں لگا تہ سب روندے، میں ہسدا ہاں
جس دن دی کوئی رات نہیہ ہوندی، اج اس دن داسویرا ہے
رستہ اوہکھا، کھلیاں ٹرنا، پینڈا دور بہتیرا ہے!

بچپن چھ آئی جوانی، دل بچ تیری شکل سہانی
تیرے رنگ بچ رنگ کے ہوگئی اپنے رنگ تھیں میں بیگانی
جند، قربان تیرے قدماں بچ، کھیل نرالا تیرا ہے
رستہ اوہکھا، کھلیاں ٹرنا، پینڈا دور بہتیرا ہے

اوہ سوہنا ہے، سب تھیں سوہنا! اُس سوہنے دا کہہ آکھاں
دیہنہ، چن تھیں بھی زیادہ روشن، ہر پاسے مارے لاٹاں
ماہڑا میت، ماہڑا چن ماہی، اُچیاں کول اُچیرا ہے
رستہ اوہکھا، کھلیاں ٹرنا، پینڈا دور بہتیرا ہے!

ہر ویلے، ہر پاسے آ، آ لگ، چھپ شکل وکھاندا سی
اج توڑیں اوہ ماہڑے ملنے کو، اس دل بچ آندا سی

سج، دھج کے اج اُس بستی بچ ماہڑا پہلا پھیرا ہے
رستہ اوکھا، کھلیاں ٹرنا، پینڈا دور بہتیرا ہے!

اپنے خون، پسینے سنگ میں ہک کھرچ سجایا سی
نہ کھر بچیا، نہ کھر والے، میں بھی ہوگئی بن باسی
ایہہ جگ ہک پر چھانواں یارو! نا تیرا، نا میرا ہے
رستہ اوکھا، کھلیاں ٹرنا، پینڈا دور بہتیرا ہے

اج اوہ اپنے محلوں ٹر کے ساحل نیڑے آیا ہے
نال مگو لے جاوَن دے لئی ڈاہڈا جال بچھایا ہے
میں نازک، ترہائی مچھلی، اوہ چالاک مچھیرا ہے
رستہ اوکھا، کھلیاں ٹرنا، پینڈا سخت بہتیرا ہے

چن جیہا مکھڑا

اپنا رستہ پُئیل کے ماہڑے دل بچ ڈیرا لایا ہے
چن جیہا ایہہ مکھڑا کدھروں تہرتی اُپر آیا ہے

کہرتھیں باہر جاون دے لئی پیر جدوں میں رکھیا
ہک پیارا مزمان میں اپنے باغیچے بچ تکیا
اُس دی خدمت بچ پھلاں نے اپنا سر جھکایا ہے
چن جیہا ایہہ مکھڑا کدھروں تہرتی اُپر آیا ہے

متھے دے چن، تارے چمکے، گیت پازیاں چھیڑے

نچدی، گاندی سبز پری آبیٹھی میرے نیڑے
ماہڑے سُتے ارماناں کو دے کے وازگایا ہے!
چن جیہا ایہہ مکھڑا کدھروں تہرتی اُپر آیا ہے

پھلاں تھیں بھی نرم بدن ہور ایہہ معصوم اداواں
جی کردا ہے اُس دی خاطر سارا کھڑ چکانواں
کتنی فرصت نال خدا نے اُسدا روپ سجایا ہے
چن جیہا ایہہ مکھڑا کدھروں تہرتی اُپر آیا ہے

ماہڑی اکھ دے وار تھیں اج تک نا بچیا سی کوئی
سوئی ماہڑی خاطر دُب گئی، ہیر دیوانی ہوئی
نال تواہڑے اکھیاں لا کے اپنا ہوش گمایا ہے
چن جیہا ایہہ مکھڑا کدھروں تہرتی اُپر آیا ہے

شبنم دے قطرے چُن چُن کے تیرے ہار پروئے میں

اندرو، اندری رو رو سبناں اپنے ہنج لکوائے میں
دل دے بوہے اُتے تیرا سوہنا ناں لکھوایا ہے
چن جیہا ایہہ مکھڑا کدھروں تہرتی اُپر آیا ہے

کل تک میرے دل دی تہرتی ہک ویرانہ خالی سی
نا گلشن، نا گل، نا کوئی اس گلشن دامالی سی!
راتوں، راتی کس نے آکھہ تن ہو رمن مہکایا ہے
چن جیہا ایہہ مکھڑا کدھروں تہرتی اُپر آیا ہے

نیت صاف ہوئے تاں آپے رہبر رستہ دسدا ہے
جس دل بچ نہیہ دسدا کوئی، اس دل بچ رب بسدا ہے
جس دل بچ رب بسدا سا حل! اس بچ پیار بسایا ہے
چن جیہا ایہہ مکھڑا کدھروں تہرتی اُپر آیا ہے



چھوٹھی گل

دور جانڈیاں دے قدماں کو روک لے حضور
چھوڑ حسن، جوانیاں دا مان تہ غرور
پُہل پیار کو نہ نت دے خیال دی طراں
توہڑی چھوٹھی گل لگدی ہے
مدتاں تھیں بعد دے وصال دی طراں

کوئی خط مکو لکھ، کدیں سُنیا ہی جوں
ایویں رکھ نا ادھار ماہڑے ہنجواں دا مول

من عرضی فقیر دے سوال دی طراں
توہڑی چھوٹھی گل لگدی ہے
مدتاں تھیں بعد دے وصال دی طراں

کالی اکھ دا فریب، گورے روپ دا چھلاوے
تکو تک کے دل ماہڑا، دُب دُب جاوے
سوہنی زلف بھوئے دے جال دی طراں
توہڑی چھوٹھی گل لگدی ہے
مدتاں تھیں بعد دے وصال دی طراں

اُچا قد، مکھ چن، نالے ڈولدا شباب
مکو لگدی ہے اپنے ہی دل دی کتاب
تیرا جسم ہے پھلاں والی ڈال دی طراں
توہڑی چھوٹھی گل لگدی ہے
مدتاں تھیں بعد دے وصال دی طراں

آیا ظلمی سیال، نت شونکدے پہاڑ
بنے راہواں پنج اُچے، لے ہجراں دے باڑ
اسی کمبدے ہاں پیر دے پنجال دی طراں
توہڑی چھوٹھی گل لگدی ہے
مدتاں تھیں بعد دے وصال دی طراں

دے ڈھونگے منجھار، دے ساحل دے خواب
ماہڑی جندڑی بنائی، ماہڑے واسطے عذاب
آپ بسدے ہو ریشمی رومال دی طراں
توہڑی چھوٹھی گل لگدی ہے
مدتاں تھیں بعد دے وصال دی طراں



ہوئی پوری مدت..

ہوئی پوری مدت آج جوگیاں دی
ٹُر جان دی فقط تیاری ہے
اس نگری بچ ہُن نہیہ رہنا
جتھے دُشمن خلقت ساری ہے

اس دل بچ آج ہک درد بھی نہیہ

لاچار، میں بے بس فرد بھی نہیہ!
اس حال دے بچ ہُن نہیہ جینا
جس حال میں جند گزاری ہے

یاداں دے زخم، عذاب رہے
بس اکھیاں اندر خواب رہے
اج تنہاء جان ہے ہک اپنی
جگ دی ہر چیز بساری ہے
اُس دیس ہے ہر ہک کو جانا
ایہہ جسم ہے روح دا قید خانہ
دنیا کو سمجھاں کے ساحل!
جس دی ہر چیز اُدھاری ہے



ہک واری آکھ...

ہک واری آکھ، تکو ماہڑے نال پیار ہے
جند قربان تیرے اُتے لکھ وار ہے

یاد ہمیشاں تیری میرے سنگ رہندی ہے
میں بھی ہاں دیوانہ، ساری دُنیاں ایہہ کہندی ہے
اکھیاں دے بچ تیرے روپ دا خمار ہے
ہک واری آکھ، تکو ماہڑے نال پیار ہے

تُوے باج لگدے ویران کو میلے چناں!
کہلیاں نا چھوڑ اتھے، نال مکولے لے چناں
گرم اج عاشقاں دے دل دا بزارا ہے

ہک واری آکھ، تکو ماہڑے نال پیار ہے

دُنیا، جہان دیاں رسماں تروڑ دے
لڑنا، چنگڑنا توں نال ماہڑے چھوڑ دے
ہُن تکرار والی ضد بیکار ہے!
ہک واری آکھ، تکو ماہڑے نال پیار ہے

مارگئیں دُور تھیں تو نظراں دا پھٹ نہیہ
من فریاد ماہڑی رستے تے سٹ نہیہ!
جاندا ہیں تہ سُن لے، ایہہ صدمہ اُدھار ہے
ہک واری آکھ، تکو ماہڑے نال پیار ہے

لکھ گلاں والی ہک گل مقبول ہے
سوہنیاں دے نال بیر رکھنا فضول ہے
دُنیا دے باغ بچ انہاں دی بہار ہے
ہک واری آکھ، تکو ماہڑے نال پیار ہے

(جنوری 1989ء)

قطعات،

اشعار،

بیتاں..



قطرہ..

ایہہ موسم، ایہہ تہندتہ بارش، بس دو چار کھڑی رہندے
اسماناں دا رنگ بدلن بچ بوہتا ویلا نہیہ لگدا
کالی رات جدائیاں والی، ناچن تارے ٹھونڈ جندے!
کہنلیاں نہیہ کوئی محفل سجدی، کہلیاں میلا نہیہ لگدا



قطرہ..



روزے ہور نمازاں دے صدقے اس کو
پے جاندا ہے سچ آکھن دا دورہ ہک
میں پچھیا سا ”پیار ہے ماہڑا کجھ دل بچ؟“
تھوڑا جا شرما کے بولے ”پہورا ہک“



قطرہ

تیرے ہوٹھاں دی شربت تھیں نشیلا جام کہہ ہوسی؟
گنھیری زلف تھیں بہتر سہانی شام کہہ ہوسی؟
جواں سالی دا عالم ہے، تسی ہو بے نقاب اگے!
خدا جانے جے اس شب دی صبح دا نام کہہ ہوسی!



قطعہ..

یار دی نگری چھیتی لے چل
ڈیرا لانواں گلیاں بچ
دور ہے اسدے آن دانیٹا لے
ساہ پھس گئی ہے نلیاں بچ
چہرہ اُسدا دِسدا ساحل!
پُھل، پُھلواڑی، کلیاں بچ!

لے!... نیٹا... ملن دی تاریخ.. یوم وصل

قطعه!

کدھ تک کوئی قیمت دیسی
کدھ تک کوئی پک سکدا ہے؟
کدھ تک کچے مٹکے پانی
ٹکيا ہے یا ٹک سکدا ہے؟
اللہ دا انجان خلیفہ
اپنے حال تھیں ناواقف ہے
بندہ چاہوے ، اپنے ہتھوں
اپنی قسمت لکھ سکدا ہے

قطرہ

اوہ رب ڈاڈے! اتنا پہار بھی نا باہ ماہری جان اُپر
ماہرے مہنہ تھیں ایہہ نا نکلے ”میں نیہہ تیرا، چھڈ مکو“
کنڈے، بے، خنجر، تیغاں کدھ تک میں چہل سکدا ہاں
دل دتا ہک پارے واہنگوں، پھلاں واہنگوں ہڈ مکو
اس حالت بچ، اس جا ماہراویلا کٹنا مشکل ہے!
یا میں بھی ظالم ہو جاواں، یاہنیرے تھیں کڈھ مکو!



قطعہ...

شرد مہینہ، دے گیا ماتم باغاں کو
کر کے تازہ کچھلی رُت دے داغاں کو
جال بچھایا دُور تکر رُسوائیاں نے
چار، چوفیری کھیر لیا رُسوائیاں نے
رو رو رب تھیں میں تہ منگیا پیار تیرا
پر اکھیاں دا خالی نا گیا وار تیرا
عمران نکلیاں، لمیاں ہجر، جدائیاں نے
چار چوفیری کھیر لیا رُسوائیاں نے



رُبَاعی

نہ ہُن دل بچ تاہنگ کسے دی، نہ ہُن پیار کسے دا
نہ کوئی ماہڑا رستہ دیکھے، نا میں یار کسے دا
غنخواری ہور دلداری دے موسم چر کے بیت گئے
ساحل! میں ایویں بن بیٹھا ساں غنخور کسے دا



اشعار۔۔!

دو چار کھڑی گجھ دے کے دلا سہ یارا گانہہ ٹر جان دے ہین
بس ادھیاں مُلا قاتاں قسمت پنج لکھیاں خدائے برتر نے!



کاجل باہیا، مہندی لائی، ہُن تاں ہک ہو جاون دے!
ساہواں پنج ساہواں نکلر لے، باہنواں پنج مرجاون دے



نا کر اپنے پنجرے اُپر اتنا مان شکاری!
ہک دن میں اڈ جاساں تیرے پُہرے تروڑ کے سارے



کاغذ دا ہر پُرزہ مکیا، لہورگاں دا لکھ لکھ سکیا
تیرے کن پنج واز نا پوچی، اکھ بھی رُل گئی، دل بھی تہکھیا



خوشی سنگ ترے کُہر تھیں میں ٹر گیا ساں
کسے سُن دو اتھروں بھی ڈولے نہ ساحل!

صلی اللہ
علیہ وسلم



نورِ بنی دی لو جیہڑے اُجڑے شہر گئی
آباد کر کے بستیاں تہ بام و در گئی
لبھیا کہنہ کائنات کو آقا دے آن سنگ؟
آئی بہار، پھل کھلے، خوشبو کھنڈر گئی
چڑھیا جے اسمِ پاک لب تے، دل ہو یا نہال
ہک بے ہنر فقیر دی قسمت سنور گئی
آیا خیالِ گنبدِ خضرا دماغ بچ
اس دل دی کائنات بچ مستی جی پھر گئی
حضرت! کرو قبول ایہہ ساحل دی التجاء
اوہ اُیتاں دے مالکوا! اُمت بکھر گئی



۲

تمت بالخیر
(۱۵/جون۔۔۔۔۔۲۰۱۶ء)

